



五龍山人集卷之一

奏疏

從祀真儒疏

奏為從祀真儒以光

聖治事臣聞太上立德其次立言非不貴言也德為本也孔子曰有德者必有言有言者不必有德此聖賢觀人之大法也我

皇上應運中興聰明膺矢默契道體遠紹堯舜禹湯文武之傳而周公孔子所以明其道於天下者

明崑山王



祖述武父著



國家圖書館. NATIONAL CENTRAL LIBRARY. TAIWAN. R.O.C.



皇上皆身體而力行之

彛倫叙而

大禮明

郊社定而

大祀秩釐正孔廷祀典而大道彰

敬一有箴即精一之旨四勿有訓即克復之功立德

立言垂憲萬世大矣哉

聖人會道之全固如是乎今言官建議乞將前禮部
左侍郎兼翰林院學士謚文清薛瑄從祀孔子
廟廷者真有以仰見我

皇上身任帝王道統之傳故欲從祀先儒以承

德意甚盛舉也然議者謂前代所定從祀必求傳釋

六經之人以合祭法報功之義遂以瑄罕所著

述爲疑臣愚昧不識聖賢大道之要竊以爲著

述多言要非聖賢之所急也古之所謂立言者

非傳釋之謂夫六經自孔子刪述之後大道昭

明猶之太陽當空人所共覩雖千萬年未嘗晦

也自漢興以來諸儒始爲之傳釋訓詁註疏互

有異同而支離牽合反爲六經之蠹是傳釋不

足尚也孔廷侑食稱四配者惟顏淵無著述外

獨稱亞聖以爲真得聖道之傳濂洛關閩
儒惟程顥無著述然獨稱曰明道先生以爲首
繼孟軻之後著述亦不足以盡道也臣夷考瑄
之爲人性質高明學識醇正真知實踐不事矯
飾其脩己教人惓惓以復性爲先至其立朝大
節尤爲俊偉利害不移始終無二誠

聖代之純臣儒者之盛節也其著述誠無所槩見所
可見者讀書錄詩文集而已今之所以崇慕瑄
之學者蓋以瑄能反躬實踐不悖聖賢耳雖微
錄集不害其爲知道也且夫論人者當原始要

終則誠僞見而賢否定矣臣按瑄卒之後監丞
閻禹錫狀其行實稱述甚詳猶曰門人好崇師
說也大學士李賢爲撰神道碑稱瑄身體力行
操履堅定以有道歸之賢與瑄當天順初同時
輔政其言行之素賢知之必真非附和溢美者
則瑄之爲人可知矣自成化以來䟽請從祀者
甚衆輿論所歸久而後定也臣嘗評瑄言行篤
實似許衡出處峻潔過楊時以之從祀誠爲無
忝若議者以爲我

國家之興百七十餘年未有真儒從祀今

則似乎承一代之乏人非天下之公議

以崇瑄也臣聞之議禮之家名爲聚訟

亂折諸聖人臣學術膚淺無所知識竊述鄙見

上塵

睿覽伏望

聖明俯賜采擇折衷群言祀瑄孔廷以訓示來學則

吾道幸甚天下幸甚

嘉靖十九年二月初八日

國學疏

奏爲陳愚見以昭

聖治以禪國學事臣聞爲政之道有緩有急施教之

方有先有後然亦有若緩而實急似後而宜先者是不容以徐議也臣誤蒙

皇上任使俾贊成均以師多士臣受

命以來一月餘矣夙夜兢兢惟恐有負臣敢不勵行飭躬勉盡職業以求稱

皇上所以作養賢才之意所有四事實關乎治體切乎學規誠所謂若緩而實急似後而宜先者也敢以塵瀆

聖聽乞

勅該部議擬舉行臣不勝願望之至

一曰教胄子臣聞之舜命夔典樂教胄

王太子群后之子卿大夫元士之適子凡選皆入太學天子親視學以行禮也太子入國學以齒胄也是惟世臣之子謂之胄子太子入國學之所齒也臣伏見

皇上冊立

皇太子已經歲餘雖在幼齡他日出就師傅

皇上必將舉古帝王之盛典以成

皇太子之德義是惟世胄之教所宜急也臣考之洪武五年令將官子弟承襲年幼者入監讀書成

化十等年令公侯伯并駙馬初襲爵者送監讀書習禮弘治正德年間屢經舉行我

皇上龍興致治崇化其於世胄之教亦既已行之矣但今世祿之家間有一二入監習禮者又往往虛應故事不守訓規其於齒胄之道恐莫之能知也是可以無教乎况世臣祿位崇高驕奢易長使不及其弱冠之年教之詩書禮義以敦其儒素之風約之規矩準繩以移其桀傲之志則他日委任將見膏粱紈袴之餘豈勝分闡之責鮮有不僨事者臣請自今公

十八以上者該部具名

上請送監讀書習禮本監仍每名選撥友伴監

名與之講學相資薰陶規勸每五日一赴監俟諸生立班定友伴引至階下恭揖而退侍立兩傍以觀揖讓周旋之節俟堂儀畢赴廂授書講習其有不率教者憑本監堂上官奏

聞區處三年之後學有成效者本監奏

聞仍加表異該部註記俟異時襲封之後有所委任據以甄別賢否則庶乎彬彬向風知所警勸而國之大事亦有所賴矣

二曰簡俊秀臣竊照近歲因

大工乏用工部議將民間俊秀子弟准令納銀送監讀書此固一時權宜之術然關係政治民生實爲甚切不可不預爲之處也是輩曾經習學舉業者十亦五六其間白丁庸孺所不能無遂使玉石混居蕭蘭並進夤緣雜沓鼓扇士風不惟有玷國學他日授以一官豈能責其治效將來之害有不可勝言者以臣言之苟非下愚可教而入顧所以處之何如耳臣請凡俊秀納到監之日本監堂上官考以四書義

通大義者照常挨次撥歷其有荒謬

限坐班肄業三年以上方許撥歷則人心

而名器不至於濫授矣

三曰葺學舍臣聞古之帝王設爲庠序學校以教民自漢晉以來興脩大備唐貞觀間太宗數幸太學增築學舍千二百間屯營飛騎亦授經業高麗諸國遣子入學史稱國學之盛近古未有宋紹興中葉林上書請興太學且曰計不過費一觀察使之月俸耳我

太祖高皇帝自開創之初百務並舉日不暇給而尤以建學爲先觀監規所載有曰堂宇宿舍俱各整飭應用什物皆已備具其所以養士之意厚且重矣今京師國學自弘治十四年祭酒謝鐸具奏禮部尚書曾鑑等覆題奉

欽依脩理今經四十年雖時或補葺而頽敝滋甚內外號舍見存者十之四五其不可居者半之雖或僅完而垣墻不備關鍵不設今內號之西蕩然無存鞠爲豐草矣是以生徒往往僦居寄處遠近不一憚於奔趨出入無時難於稽覈備舉職業督責課程深爲未便臣伏見

皇上自登極以來兩幸太學

親御彛倫堂講論化理崇儒重道稽古右文走人音而軼三代誠千載一時也而所以脩葺廢墜以光首善之地者詎可後乎臣初履任周視舍宇以爲工力之舉亦不甚難今之議者動以大工未畢妨於措辦爲辭臣則曰此特大工萬分之一耳臣愚計之不必動支正額錢糧但

令工部將援例監生數名銀兩以備物料工食則學舍煥然一新矣

四日均差歷臣據生徒視學宮爲傳舍以訓規爲虛文倏來倏往莫有固志濫費廩祿深負作養是宜議處以肅學規伏乞

勅下吏部查照各處增減事宜將正雜等歷俱復原額八百八十七名其歷事月日俱照正歷三個月上選仍滿十二個月方許具缺正歷之外俱爲雜歷舊之雜歷巡歷清黃續黃寫本寫誥內府天財庫承運庫長差俱十二個月爲滿上選具缺如此則士心歸一而無紛擾觀望之煩事體適宜而有勞逸均平之美矣

靖虜一疏

奏爲陳愚見振長策以靖虜患事臣伏見土

囊俺荅二酋兩犯山西南至大原殺掠甚慘

歲三月初四日太白入昴應在吉囊之死雖

神天加誅以默佑我

皇上而俺荅阿不孩近復擁衆犯邊越過鴈門長驅
深入遂至潞安駸駸乎及於中原矣虜勢猖獗
自昔之所未聞也羽書告急京師震驚我

皇上宵旰憂勤申諭百工以戎務爲急仍俯從本兵
之請起用侍郎翟鵬經督軍務假以便宜重權
允廷臣建言多所采納臣有以仰見我

皇上勵精圖治攘夷安夏之宏謨也天下幸甚目今
山西報稱虜騎出邊復似去年更出迭入之計
未委虛的臣有以占知其必然剝牀以膚且將
爲畿輔大患也蓋黠虜連歲入寇意得志滿逞
其驕慾何所不至兵法曰無恃其不來恃吾有
以待之是不可不思患預防振長策以圖治安
也今諸道援兵遠近畢集京師禁旅簡閱悉精
庶乎有備無患而本兵方畧與言官條奏皆曲
盡事情蔑以加矣臣列職詞林不閑軍旅然日
覩邊患遺我

皇上殷勤誠痛心切齒早夜以思一得之愚亦

臣之所未盡者敢昧死爲

皇上言之臣聞之兵法曰知彼知己百戰不殆蓋以爲勇力智謀兩軍相當斯足以決勝負於合戰之頃也臣觀今之比虜精銳趨捷馳逐便利

中國士馬皆不能當來如風雨止若立山我軍智勇俱困一無所施且今鴈門諸關險隘如履平地內郡無險可據安能禦乎山西趙代古稱良將勁兵所出今亦武勇甲於天下虜入而蹂躪之如驅群羊刈弱草他郡之兵尚足恃乎臣是

以知

中國之兵與虜不敵明矣夫虜勢若此不思出奇制勝長駕而遠馭之而猶循襲故常玩時愒日臣恐虜勢日盛

國威日損將來之患寧有極乎臣愚以爲爲今之計莫若以夷攻夷斯爲上策而簡精銳用長技權時宜皆一時急務不可不速講也臣輒不揆愚陋條陳事宜上瀆

聖覽乞

勅下兵部詳議施行或能少寬我

皇上北顧之憂臣愚不勝幸甚天下幸甚

一臣聞之漢臣鼂錯曰合小以攻大敵國之所
也以蠻夷攻蠻夷中國之形也降胡義渠飲食
長技與匈奴同以當險阻平地通道以輕騎材
官制之兩軍相為表裏此萬全之術也臣以為
此言誠卓識遠見而唐太宗破突厥薛延陀諸
夷皆用此道在

今日尤為切要者也今朶顏三衛夷人世受

國恩生息蕃衍有衆一二萬每歲二次入

貢雖或愆期而去歲猶自有諉則其無背恩叛順之

心亦已明矣撫而用之誠易易也北虜之所畏
者惟黃毛達子每歲入寇不敢空國而來蓋恐
黃毛之議其後也觀今歲捉獲奸細所稱小王
子責俺荅之言可見矣臣以為宜及此時招而
用之此上策也何也蓋以夷攻夷其長技與之
同而感恩嗜利必能為

中國用也臣請各降

勅諭一道賜以綵段命通事人員星馳先往朶顏轉
送黃毛各諭以

中國所以用之之意大畧云俺荅連歲犯邊

不意搶掠繒段數多今

朝廷震怒命將出師大徵諸道雄兵百萬刻日
邊期滅此賊猶恐其四散突走不收全功故命
爾等能以兵助

中國擊殺虜賊者每首級一顆賞綵段二疋得俺
荅首級者賞綵段一百疋其餘酋長首級賞段
有差所獲輜重牛羊爾等自用

中國秋毫無取爾等若順天道助
中國速差的當頭目與同使臣歸報

朝廷朝廷必先加賞賚仍約日大舉各遣大將一

員副將一員親至爾國監督進兵紀驗功次爾
等其各思効力毋失此富貴也臣聞諸夷志在
綵段以多得爲富貴故因而啖之彼嗜利貪得
必能奮勇爭衡不過捐一二十萬繒段而黠虜
可計日滅矣所遣督監大將必若鼃錯所謂能
知其習俗輯和其心者然後可使二虜相持我
軍整束破禁出邊諸道並進乘其疲敝表裏來
攻俺荅雖強何能爲乎又東北兀良罕本係小
王子北部叛去歲久每相攻殺以利誘之可爲
我用迤西則莊浪都督魯經家丁不下二一

人本係

中國爵位羈縻賞格相同亦能得其死力而海西亦不刺一種有衆萬餘先年已許內附因其敗弱而棄之頗爲失計今能招徠以恩義亦足爲用臣以爲失此不爲別無上策必待選將練兵儲材足食而後可以禦虜亦已晚矣此誠老生之常談非經

國遠猷違權應變之機也若平虜之後諸夷來廷則官其渠帥使各治其國仍令遣子入侍待以顯爵以縻其心如唐太宗之待突厥吐蕃高昌

諸國恩威並著格其非心將見化外諸夷長爲中國藩屏矣仍設各該叅將督監之若漢有戍已校尉唐有安西都護皆以流官更代往鎮足以控制今蒞浪叅將亦此意也臣考古證今以爲禦虜長策莫善於此若議者以爲好奇立異迂闊難行則惟有坐守待困而已然則我

太祖高皇帝驅逐胡元

成祖文皇帝三犁虜穴抑又何歟臣惟我

中國大患允百大小臣工所宜同心戮力計除虜患以光

中興至治以垂

聖子神孫億萬年無疆之統者不偉歟

一臣聞兵法曰形人而我無形則我專而敵分
又曰敵所備者多則吾所與敵者寡矣若朶顏
黃毛既爲我用賊拒二虜其衆必分其志必惑
我整兵以待之選鋒以乘之鮮不勝矣臣又聞
之用衆不如用寡用寡不如用精晉馬隆以三
千人遠破樹機能數萬之衆宋岳飛每與金兵
戰以數百人或一二人破其數萬之師蓋扼
其吭而奪之氣也今賊虜動稱數十餘萬大率

精銳者不過十之二三耳惟是臨陣之際其精
銳者悉集於前衝鋒陷陣若鷲搏獸奔勢不可
當故我軍隨而潰敗往往皆然臣請

勅各邊懸重賞以募死士簡銳卒以爲先鋒分左右
翼縱鐵騎以橫擊之則一可當十此勝兵之法
昔衛青擊匈奴以武剛車自環爲營縱五千騎
往當匈奴左右翼繞單于捕虜萬九千級此則
簡精銳左右翼擊而致勝之明驗也

一臣聞之虜之長技在弓馬柰何欲以弓馬勝
之漢臣曰勁弩長戟射䟽及遠下馬地鬪

相接北虜之足弗能當也岳飛與金人戰於

大將王貴曰爾以步卒擊其騎兵然則

中國之長技誠在步兵也古人克敵以弩爲利今各邊鮮有用者以用弩不如用弓之便也臣愚請兩廣善用藥箭弩徵取弩手百人分配各軍教以習弩臨陣則先用以却敵仍選精卒足力健捷者給以長鎗每俟弩箭既發虜騎稍却則驅長鎗並進賊陣既動然後以鐵騎橫擊之賊雖恃弓馬何能爲乎此

中國鎗弩步兵之利不可不務也

一臣聞之漢文帝募民入粟塞下得以拜爵後世援例之始也此雖弊政亦救時之權我

朝行之已久弘治間或納馬納米納銀行之至今不能改也臣以爲宜令民照例納銀得授指揮千百戶等職皆以例試爲名分送各邊立功自効但有斬獲達賊真正首級者定爲等則即實授本官食俸世襲蓋變而通之合乎時宜一以足邊餉一以求竒能人皆踴躍樂於備邊名器不至於濫施

國家亦賴其實用與援例入監無益有損者相

萬萬矣臣又聞近日盡革兩淮餘鹽輕棄課

百萬矯枉道正莫甚於此宜令司計者詳議而復之權時之宜但令商人不分正餘鹽銀俱於各邊上納糧草痛革賣窩買窩等弊則鹽法大行而邊餉無不充矣

嘉靖二十一年八月初一日

靖虜二疏

奏為懇激愚衷再陳滅虜竒策備舉用兵事宜仰祈

天鑒以大振

中興聖治事臣聞自古必有非常之君而後有非常

之舉有非常之舉而後有非常之功故黃帝大戰涿鹿神禹徂征有苗文王赫怒以遏徂莒以荅天下仰望之心宣王中興薄伐獫狁以紹文武建邦之績皆戡禍定亂以安兆民非常之功也臣伏見遼虜猖獗兩歲出入山西如蹈無人之境殺擄人民以百萬計禍害慘酷所不忍言我

皇上因念民生不遂致疾召醫又

面諭勳輔大臣以邊民被虜余毒求非常之處欲加大逐臣有以仰見我

皇上宵旰憂民注意戎務

大奮乾剛期滅醜虜以紹我

二祖攘夷安夏之功基萬世太平之業也

宗社幸甚天下生民幸甚臣過不自量於八月初一

日具奏爲陳愚見振長策以靖虜患事臣自信以夷攻夷乃帝王萬全之道我

皇上聖神文武追古帝王建非常之功端在是矣本

月初三日奉

聖旨兵部知道欽此近該兵部具題欽奉

聖諭事內一款令在廷大小百官各陳所見誠欲求

群策也臣敢極論之臣聞虜雖出邊其意叵測今秋不至明年必來不惟山西可慮而潮河川白羊口等處皆虜要衝畿輔近地大有可憂其勢亦易見也苟不及時早爲區畫以俟來春大舉滅胡日復一日歲復一歲禍患益深將有不可勝言者矣夫以夷攻夷此古今奇策也非常之舉惟斷乃成臣願我

皇上獨斷於上倚決

廟堂責成本兵專任大將勿沮於群疑勿泥於常格如此而虜不滅功不成臣甘受欺罔之誅臣

以前疏所未備者悉心上陳仰祈

聖明親鑒特賜裁決焉臣考之以夷攻夷漢時多用此術輒獲奇功宣帝時常惠持節護烏孫兵與五將軍兵十五萬擊匈奴入匈奴右地大克獲又莎車叛衛候馮奉世矯發諸國兵擊破之元帝時使護西域都尉甘延壽副校尉陳湯矯發戊巳校尉屯田吏士及西域胡兵攻郅支單于凡此以夷攻夷之證也然尚曰漢時事也今朶顏恭寧福餘三衛夷人我

成祖文皇帝靖難時常以兵助順實賴其用故以大寧全地予之至今朝貢不絕爲

中國藩蔽然則我

朝亦嘗用夷兵矣又如兩廣川湖等處邊夷作亂撫臣用兵往往動調土官狼兵協同我軍征勦以夷攻夷百戰百勝此明効大驗也何獨至於北邊而疑之乎臣以爲

降諭朶顏以

明命臨之未嘗損

中國威重也即如臣前疏所陳諭以大義啖以美

利彼亦安能棄

中國百四十年之好而不思自効哉黃毛地界統出韃靼之北去歲聞其曾與三衛相攻則自三衛遣使可以達彼且聞黃毛屋居粒食其人驍勇絕倫達虜之所畏今諭以

中國徂徠之意彼必慕我

皇上聖德嗜利向風未有不至者也若兀良罕亦自三衛遣使直達招諭因其舊與小王子有隙故誘而用之亦兵法因間內間之意也亦不刺一種臣聞其往歲屢叩關遞到番文願爲

中國効力比時邊臣皆無遠見惟恐別生事端不肯接受此宜因而用之駕馭可也今自甘肅差人以達可以呼而來莊浪則吾故屬衛也以上諸夷地方既有遠近夷情亦自不同及今八九月間遣通事人員先入朶顏令與的當頭目俱來詢以各夷習俗性情隨宜招撫旣皆向化則如臣前疏區處事宜調取朶顏夷人五千黃毛三千元良罕三千亦不刺三千各賜旗幟號衣及莊浪三千俱約明年二月間各夷率兵會於大邊外某處地方仍各遣大將一員副將一員

各赴其軍監督賜以牛酒勞之刻日進兵總督大臣與總兵大將督諸道精銳竒正遊兵分道並進表裏夾攻擣青山之巢以殲俺荅阿不孩搜黃河之套以殄吉囊諸遺孽虜其名王歸獻闕下振旅還師冊勲飲至豈非千載一快歟臣以爲此古今一大機會失此不爲萬一虜中有豪傑之士結納諸夷反爲之用其患豈止山西一省而已哉臣以爲謀國者不可不深長思也夫招徠諸夷必先我軍形勢則我爲主而彼爲客合變制權足以役使用衆若寡用寡若衆使人

莫我測而我常有餘此御諸夷之術總督所宜知也臣以爲及今成造戰車輜車堅甲利兵俟明年二月間調發各邊馬步竒正遊兵及保定河間遼寧各處大約十萬分爲三大枝各以大將統領若漢衛青霍去病唐李靖李世勣宋岳飛韓世忠我

朝徐達常遇春者各統大軍責其成功而悉聽總督大臣節制又豫徵天下敢勇材力異常之人州縣給以盤費起送赴部聽征山西雖殘破之餘民尚可用况連歲被虜荼毒皆欲爲父兄子

第報讎快忿其氣必銳令各州縣召募驍勇多者五六百人少者二三百人不時操練以俟發山東等處礦徒臣聞其善用長鎗巨槌輕生健鬪所向無敵精選五千人河南嵩盧等縣礦徒號毛葫蘆者二千人廣西等處土官狼兵善用藥弩犯者立死最爲利器調用一千人四川松茂等處叙瀘等州縣鏢子手資縣勇徒號張蓬頭者各一千人江淮鹽徒精選一千人各隨其技能長鎗勁弩用爲步兵各於兩司或州縣正官內撫按選委素有才望機畧者統率調度給

費前來俱限二月間到於山西鴈門等處地方聽征各都司衛所指揮以下官員及旗軍人等驍勇過人者撫按精選送部聽用天下有罪人犯除十惡不赦外其餘雜犯死罪以下有能赴邊立竒功報效者許宥其罪功多者仍照納銀事例授指揮等官食俸世襲臣前疏中所稱納爵及有罪人等願報効者俱令其自備鞍馬噐械糧料分配各軍効用有功之日方許先支行糧草料如此則人皆奮勇赴敵虜不足戚矣又如總兵叅將等官俸資不足以克費因而朘刻

軍士上下皆困今宜稍豐其祿秩使無俯仰之憂乃可責其死力號令之下賞罰必信驅赴湯火而不敢畏避矣往時大同總兵梁震恩養家丁五百餘人皆精選善戰達虜畏之相戒不敢犯邊今各邊將官祿入有限束縛太急何暇於養士臣請許令各將自行召募精勇戰士以爲羽翼籍名在官給與糧料俟其有功一體錄用則人皆殊死戰矣臣又聞各邊官軍將不知兵兵不服將是以威令不行進退無法先年撫臣許銘張文錦遇害呂經潘倣見辱叅將賈鑑被

殺總兵桂勇被囚去歲副總祝雄三令渡河而士卒不應兵法所謂與上同意可與之死可與之生而不畏危者果安在哉臣以爲召募家丁之法一行則將帥各得羽翼且又出於官養不係私人公私兩利不惟可以克敵而亦能潛制驕兵悍卒輕戮主將之心士皆帖服將令得行驅以破虜莫不用命矣昔漢宣帝時西羌反發三輔中都官徒弛刑及應募飲飛射士羽林孤兒胡越騎三河潁川沛郡淮陽汝南材官金城隴西天水安定北地上郡騎士遣後將軍趙克

國彊弩將軍許延壽擊平西羗是則臣所謂調集邊兵徵募敢勇宥罪報讐之意也夫徵募既精又可得勝兵數萬并諸道大軍如臣前所言分爲三大枝一自宣府一自大同一自固原各出塞追襲宣大則責之翟鵬東北諸夷屬焉固原則責之楊守禮西北諸夷屬焉所募天下兵亦從宜分屬肅隊而行相機而動旣入險地士必有死之志其戰自力一舉滅胡功亦偉矣我皇上所謂非常之處欲加大逐臣以爲必如是而後可以成非常之功大振

中興聖治也若大虜旣平雖有餘孽亦將遠遜不敢犯塞然後脩大邊列亭障築堡寨興屯田畫地而守之

帝王萬世之業也議者失此不爲而直爲此姑息因循遺患掇禍臣竊爲今日惜之夫以夷攻夷如以毒藥攻癰疽危疾也若專守局所歸以和平之劑治之病日益深亡可立待也不若對證用藥以烏附砒霜峻治之病可計日愈矣此古之神醫扁鵲華佗之能也今之禦虜何以異此臣惟我

皇上御世撫民功德並懋而獨夷狄犯邊一事終爲
至治之累猶人身一大癰疽也苟不峻治疾何
由平臣實感激愚衷思出奇策故始終自信以
夷攻夷爲對證之毒藥也臣敢倡言而極論之
伏望我

皇上鑒臣犬馬之忠所論皆經

國遠猷禦戎要畧非敢以浮汎不根之詞迂闊難
行之事依違觀望煩瀆

聖聰也然事體重大特賜

親勅兵部會同廷臣將臣先今所奏事宜逐一詳議

可否取自

上裁或少裨萬分之一

宗社幸甚天下生民幸甚

嘉靖二十一年八月十
三日

五龍山人集卷之一 終

國家圖書館. NATIONAL CENTRAL LIBRARY. TAIWAN. R.O.C.



五龍山人集卷之二

奏疏

大典疏

奏為獻議奉迎

神主禮儀考定

宗柘古制以全

聖孝以成

大典事臣伏覩本月初五日夜忽遇


宗廟災變



國家圖書館 NATIONAL CENTRAL LIBRARY, TAIWAN, R.O.C.

明崑山王

神祖純武父著



太祖

宣宗

英宗

憲宗

孝宗

武宗各廟帝后神主俱即時奉出惟

成祖

仁宗二廟帝后神主俱被火勢封門不能奉護大小

臣工先後奔趨號籲力救不前我

皇上聞變震驚

宵衣旰食屢歷

聖諭文武大臣責躬咎已詞意懇切即

命禮官具儀齋戒

躬行祭告

南北二郊

景神殿

太社稷皆青袍行禮

遣官分祭

朝日

夕月等神臣隨百官後候

駕郊壇列拜庭下恭覩

皇上秉虔將事對越神祇所以仰荅

上天仁愛之意即古聖王遇災而懼克謹天戒之盛
心殆將化災爲祥轉禍爲福矣天下幸甚續該
禮部題奉

欽依

皇祖

列聖神主暫奉安于

景神殿即行奉慰禮

成祖

仁宗廟神主便急恭製詣

陵奉題還安各廟儀物即行補造欽此臣竊惟詣
陵題

主一事蓋出于

皇上獨見之明超越千古動中禮經誠有非尋常之
所能窺測者

皇上之意豈不以

神主者

祖宗神靈之所依

陵寢者

祖宗體魄之所在故題

主必於

陵寢盖倣古禮既葬而題主以昭格

祖宗之神靈是憑是依也此真

大聖人之見燭理精明

大孝純至而於典禮之行達權通變雖古聖王何以

加諸然此禮肇舉萬代瞻仰前後儀文所宜詳

定臣伏見儀注有云

欽遣大臣四員詣

陵題

神主奉迎還京之日百官吉服於土城外行叩頭禮
神主啓行大樂前導及奉安

景神殿

上常服行禮等因臣以爲此禮之大變古今所無倉
卒之際未暇深考臣謹按春秋成公三年新宮
災三日哭公羊高曰廟災三日哭禮也盖痛傷
鬼神無所依歸故君臣縞素哭之重宗廟也禮
官具題嘗舉禮有焚其先人之室則三日哭爲
言矣于時倉卒聞變未及舉行似爲闕典今若
迎

主於

陵而復以吉服從事則於禮恐有未合是不可不講求也臣按漢建元六年春二月遼東高廟災夏四月高園便殿火上素服五日蓋漢時郡國皆立廟故遼東亦有高廟也高園者作於陵園便殿非正殿也武帝猶爲變服况今日

宗廟之變乎唐開元五年太廟四室壞上素服避正殿夫謂之壞者歲久傾毀也猶素服示變况大災乎此迎

主之服不可不變也臣又按周禮大司樂職云大傀異哉令去樂大哉令弛懸晉摯虞議日中反虞迎神而還其凶服鼓吹宜除今遇

宗廟火災正去樂弛懸之時詣

陵題

主宜比日中反虞之義而安可用樂乎此迎主之樂不可不撤也臣以爲

二廟神主迎至土城外百官宜皆烏紗帽素服角帶迎拜於

幄次

神主啓行大樂前導設而不作儀仗侍衛如儀至午

門

上御翼善冠素服角帶奉迎由

左順門入

景神殿東門

上易青袍行安

神禮如

時衿儀于

末孝殿不用樂陪祀官青服行禮禮畢奉

主安

景神殿夫事有常有變此則事之變者也禮有吉有

凶此則禮之近於凶者也曰變曰凶顧安可以
常與吉處之乎是宜變服去樂則經權兩得始
終合宜而天下萬世皆以爲

大聖人之制禮允合乎大道矣臣又伏覩

陛下以

皇考睿宗廟巋然獨安仍

諭大臣以爲

皇考主亦未敢獨安廟中是否合禮卿等盡心言之
此尤足以見我

皇上尊

祖敬

宗

大孝至公之心真與天地相爲流通者也

宗杜臣民幸甚臣竊惟

宗廟被災

祖宗列聖神主既皆權安於

景神殿則

皇考睿宗廟神主豈能獨安誠有如

皇上所諭者臣以爲宜祭告

睿宗廟權奉請

神主同

祖宗列聖安于

景神殿以俟營建

各廟完日同時奉安則禮意庶乎兼盡矣或曰禮廟無虛主惟國有大事則祝取群廟之主藏於祖廟卒哭成事而後主各反其廟象生者爲凶事而聚集同處也考之春秋昭公十八年宋衛陳鄭災鄭子產使祝使徙主柝於周廟告於先君蓋亦因火災而合郡主於祖廟也則今日因變事

祖宗列聖神主皆權安于

景神殿而特奉

皇考睿宗神主與

列聖同安不惟古禮脗合而

祖宗列聖在天之靈必奠安而欣慰我

皇上尊

祖敬

宗之心亦曲盡而無憾矣臣又考之古者宗廟爲石室以藏主謂之宗柘春秋公羊高曰主藏廟室西壁中以備火災左丘明曰主柘於宗廟言廟

有柘室以藏神主也漢儀藏主於西墻壁堦中去地六尺一寸蓋堦即石室也非特備災亦神道尚幽之義然則古者主必有柘明矣宋開寶通禮別廟時享孝明孝惠皇后享日宮闈令入室開堦奉出神主置於座則別廟后主皆有柘室也紹興十六年太常寺言廟制殿南北深七丈從北以南一丈二尺作厚墻隨宜安設柘室詔從之則前殿藏主於柘亦已明矣臣愚以爲今日營建

宗廟須令禮官博考古制相度時宜每

廟於北壁鑿石爲龕室加以厚墻奉安神主於內

皇考睿宗廟一體用石加墻庶於古制有合祖宗列聖神靈妥侑萬世無虞而我

皇上仁孝誠敬之心可以與天地參矣臣學識淺陋無所發明曩歲待罪詞林廢棄日久欽蒙

聖明錄用

簡任

宮僚俾師

國學

天地深恩無能圖報茲遇大災仰體

聖心實懷兢懼偶有所見不敢隱默擬議典禮豈嫌異同伏乞

聖明

勅下禮部再加詳定如臣言可採乞即議行則

聖孝克全而

大典允成矣

嘉靖二十年四月十七日

還宮疏

奏爲仰祈

聖明乘運法

天體元居正以隆

聖治以安

聖躬事臣聞王者乘運而興必體乾元以更化法天而動必建皇極以居中此隆古之道也何以謂之體元臣聞元者善之長也乾道之始也

皇上臨御九有二十一年于茲

聖德神功丕冒海宇無以加矣然適當三七之會故一旦變生榻寢自非

聖德格

天天心眷

聖何以轉危爲安若此哉是以我

太祖高皇帝於

祖訓一書惓惓以警戒爲言良有以也我

皇上受茲眷佑是今日維新之會詩曰周雖舊邦其命維新此之謂也臣願

皇上乘乾元之運一切推恩布德赦過宥罪覃及萬方與天下更始是臣所謂體元以隆

聖治也何以謂之居正臣聞天象有紫微垣乃中宮北極之謂也故王者法天必居中而馭外我

太祖高皇帝祖訓曰乾清宮者朕之正寢也其垂訓

之意大矣臣伏見我

皇上近歲恒居西苑臣以爲西苑僻在一隅宮牆淺隘豈萬乘臨御之所近者致變可爲寒心臣願皇上入居乾清宮書曰皇建其有極歛時五福用敷錫厥庶民此之謂也是臣所謂居正以安

聖躬也臣惟

皇上聖神御極天人協徵微臣管窺何能爲益但臣近觀時變心實驚惶一念之忠不能自己伏惟聖明俯賜鑒納如臣言可采乞勅下禮部詳議可否取自

上裁臣愚不勝幸甚

嘉靖二十一年八月初一日

當

肅皇帝處西苑時內變起不虞幾殆廷臣人人爲

上危顧無敢直言之者司業臣王某獨抗疏請

上還宮改元與天下更始語直切不少避

肅皇帝心諒司業忠而名惡改元下二三相國議相

國某希

上旨謂改元非

國家掌故以激

上怒而甚司業臯竟奪其官夫改元誠非

國家掌故然自漢以來雖治世徃徃有之無非示
天下維新之義何嘗諱言之即

國家掌故亦未有以改元爲諱者乃今觀集中所
載還宮疏不少概見其語何也嗟夫人臣值當
言之會朴忠自效即不敢愛其生曾何計身後
名哉况司業所言明習今昔之務柰何其諱之
而使之湮坳無傳也不佞恤省記其語有年所
矣竊惟太史氏必詳書之以信今詔後又烏在
其湮坳無傳也不佞以詰郡太守臣王炳璿笑
而不對第曰君試跋之璿司業之孫也得無意

乎迺叙述其大都如此令讀是集者有可攷焉

安陸後學劉紹恤謹跋

還宮一疏先大父平生忠悃盡在此茲其文
脫落不全不肖亦不解其故劉瀟湘氏以詰
不肖不肖赧然無以應也姑刻之稍寓存羊
之意俟搜家帙中得其全文翻刻焉謹識於
此

不肖孫炳璿百拜謹識

附錄

辟雍紀事

嘉靖壬寅十月朔國子監司業王公與祭酒張公
同至西苑道經

皇上所居萬壽宮因見宮墻淺隘門禁踈簡官員人
等往來出入無常公意惕然以爲目今遘虜猖
獗多有奸人潛住京師且宮門逼近西安門市
井煩囂一旦竊發禍不可測大臣數年以來無
一人敢勸回宮者臺諫亦不敢言是月二十一
日忽有

御寢大變

聖上幾危獲安爾後大臣臺諫但疏入慰安慶賀而已司業公因竭忠發憤草奏未上猶俟有言之者至十二月十五日以後竟無敢言之人公遂以死自誓以體元居正二事委曲諷諫冀移上心十九日拜叩左順門上疏二十日一更時司禮臣奏上

御覽二十一日早公席藁待罪朝房是日巳刻有旨宣成國公朱希忠京山侯崔元大學士翟鑿嚴嵩申時至西苑諸臣皆入戌時下

御劄密封諭四臣劄云茲召卿等以王同祖之說似可難行則不如傳位改元至正之義夫我

皇曾祖考蒙塵改元是有景泰一代朕昨遇害小同只是傳位爲當庶朕得以仰承

仁愛於安生矣夫彼之所言可取曰三七之變夫此時氣數不古若非至聖之賢不可當也宜熟思焉頃之召四臣入萬壽宮面諭

上曰王同祖所言他主意只是要勸我還宮這是他納忠他又先說改元是要歆動我還宮這也是他忠我只是傳位東宮好四臣叩頭皆云

東宮幼冲豈可傳位

上曰别人不敢言此事他却進言有所恃嚴公曰他是一介儒臣有何所恃

上曰數年前在山陵上李時夏言曾面薦他是真儒朕荅曰古有周程張朱是真儒今日復見真儒矣

上又曰改元之事如何內一公曰似乎變亂

上曰我朝天順改元亦是又曰他既有本如何不在我遇變之後就言今已幫著年如何逼着我要行又言萼璵當時議大禮只是楊廷和不與他

做主以致激成許多事又曰他似急於功名他從容些那一樣官沒有他做四臣皆唯

上曰今不可不處治他恐後面還有人說我四臣出至無逸殿直房內閣臣票擬云國朝原無再改元之制王同祖輒行奏擾好生狂妄都察院叅看了來說二十二日

命下都察院叅題二十五日進二十六日五更上覽過發內閣票有

旨宣四臣戌時至西苑四臣先至東閣

上有密劄諭四臣盖因禮部題請正月初一日食不

及分不該救護請上減禮御殿三老復進閣票
擬都察院本王同祖妄議改元倡邪惑衆本當
拿問姑從寬降二級調外任封入瀕臬至西苑
上又降劄盛怒四臣如何不回答御劄四臣請罪
上又降御劄言乾清宮不祥如何要我還宮四臣兢
兢戰懼待命至四鼓方遣出不得見面二十七
日申時又發下改票曰且擬爲民不許起用是
日一更

奏

覽二十八日留中不下二十九日辰刻

命下三十日早謝

恩司業公初進時自分必死不意

聖上深知其忠曲從寬宥放歸田里優游山林古人
所謂吉人天相良有以也竊因著其顛末如此

五龍山人集卷之三

明崑山王同祖繩武父著

五言律詩

春日周刑部山齋過訪

官舍生春草從君載酒過空慚問竒字聊喜聽高歌
明月流珠幌微風隱玉珂相看情不極遙夜雁聲多
王監宅看紅白二梅

北地春常晚官梅二月花興隨清禁曲開傍玉闌斜
素蕊飄晴雪緋英襯曉霞鄉愁渾欲絕對爾更天涯
遊城南張氏別墅二首

早夏開金谷長郊控玉京地偏風日美林靜管絃清
白鷺凌波去青蒲繞岸生過橋村逕遠疑是到江城
其二

出郭驅青坂臨溪俯白沙遠山晴帶雨暄日暮蒸霞
籍草流鶻急聞鶯挾彈斜不堪歌舞處苔徑有殘花

對月

皎皎孤明月清光生暮寒懷人隔湘浦何處贈琅玕
白苧初迎夏青尊獨倚欄纖雲起天末惆悵若爲看
淮陰祠有感

楚澤遙漢淮陰見古祠天空高鳥盡雲散祖龍悲

百戰酣明主千金報故知翻思執戟日猶勝築壇時

汎西蕩

畫舫侵莎岬清溪繞竹林浮雲千樹濕落日半湖陰
遠渚收漁網荒村急暮砧秋風未搖落歸路細蟬吟
約賞桂花不赴

玉樹含金粟扶踈迥出群香疑天上落影向月中分
把釣臨秋水懷人隔暮雲扁舟江上約脉脉對斜曛
登虎丘寺

虎踞高丘在龍吟絕壁哀薜蘿荒徑合烟霧亂峰開
悟石淪空色慈雲照劫灰秋風吳苑夕回首一登臺

宿金山寺

寶刹臨無地，卅丘倚碧空。古臺虛夜月，禪榻自春風。
山色微茫外，江聲杳靄中。艱難復行役，彈鋏意何窮。
潤守劉士辛邀遊甘露寺四首

昔日卜隣處，京華春草生。謁來三載別，珍重故人情。
雲繞金山寺，潮迴鐵甕城。春風五馬貴，文采是江清。

其二

甘露前朝寺，登臨空復情。薄雲蒸海氣，踈雨帶江聲。
麋鹿春臺靜，蛟龍夜壑驚。蒼茫雙島近，天際碧烟橫。

其三

曲阿偏霧雨，北固繞烟霞。碧石臨江險，青山背郭斜。
六朝空燕麥，三月自鶯花。回首俱愁思，孤雲萬里家。

其四

久識劉公幹，空慚王子猷。相逢春草色，不盡大江流。
風雨還高會，雲霄亦壯遊。匆匆更離別，今古獨懷憂。
泊留城有感

子房桑梓地，論賞此封侯。雨露懷韓德，風雲握漢籌。
早傳黃石畧，晚向赤松遊。千古思明哲，高風不可求。
遊隆禧寺遇閒雲上人

雲外招提境，追遊興轉遐。蒼藤懸日月，青蘚剝烟霞。

峻宇幽藏鳥迴欄細吐花林間逢老衲更喜聽三車

地藏寺

春城迷野望勝地引禪心好景邀康樂高談識道林
藥畦流水足松逕白雲深暝色侵歸路空聞夕梵音
訪徐子盈甫

落日清溪曲悠然見草堂鳥聲深院靜花影碧池涼
江上青蓮舫風前白玉觴山中高士約雲石共蒼茫

七夕

七夕看牛女雲車何處尋銀河天外遠玉露月中深
佳會年年度相思夜夜深空庭正愁絕烏鵲赴遙林

過季札掛劍處

不惜千金劍空懸宰木陰古今三讓國生死百年心
烏雀荒祠靜風烟故壘深經過薦蘋藻感嘆有遺音

昌平道中望諸陵

百里羅嚴堞孤城列峻屏冰蕪寒月白山帶暮烟青
陵寢依天險關河表地靈卅崖滿松栢雲外鬱亭亭

晚霽出左掖二首

雨過周垣淨天迴閣道低青絲縈日薄午漏出雲遲
象闕浮蒼藹龍池散碧漪禁門清切地僊侶共追隨

其二

霽色開宮殿清陰敞禁闈鳥歌風外韵花映日邊輝
簇仗廻丹陛聯纓下紫微萬株空柳碧薄暮淡烟霏

螢火

微月軒窓靜流螢忽自生草間時掩暎花外轉分明
側翅侵團扇含輝傍短檠夜闌清露集蕭灑若爲情
泊楊村驛東沈子一首

落日遙山暝迴波斷岸浮星辰連北闕鴻鴈赴南州
水宿悲長夜天寒怯暮秋不堪衰草渡風雨易生愁

奉使 德府冊封

大典隆親秩分封拱 帝京雲霞開紫極旌節下彤

城五爵侯王貴千年帶礪盟菲才叨侍從奔走荷恩
榮

宴承運殿

帝闕承冊詔王門赴綺筵絲綸迴日月鍾鼓逼雲天
歷下雄名古河間夙望賢皇華應不忝光動紫微邊
遊大明湖登歷下亭二首

鏡湖浮日迴畫舫出雲遙碧樹風前勁青山雨後奇
過橋牽錦纜促席膾銀絲霜節凌空下登臨好賦詩
其二

藩封叨奉使冠蓋此追遊亭榭空遺跡蕪葭生暮愁

幽燕紅日近華鵲紫雲浮感慨登臨地風烟已素秋

登金山寺

地靜午鍾寒山空古木陰大江一浩蕩落日自登臨
雲近鼉鼉窟風清松檜林 先皇駐輦處飛磴薜蘿
深

金山次張祐韻

水向南溟合山從北固分金波空映月玉洞未歸雲
鶴舞清晨下龍吟盡夜聞風塵悲獨醒對酒欲微醺
丁亥予年三十一鬚始白一莖時慈親卧病京
邸情事日乖感而作此

鼓枻汎滄海風波不可行憂親鬚早白去 國夢常
清冰雪三冬暮江湖萬里情艱難仗知己潦到媿平
生

登虎丘浮圖絕頂

緝園凌紫嶠寶塔倚蒼穹萬劫河山在諸天日月空
金銀開象設臺殿湧龍宮不盡登臨興長安雲霧中
千人石

微雲生遠嶼皦月度恒沙已悟三生石空懷萬里槎
泉聲疑破竹春色欲辭花祇樹藤蘿暗鍾鳴集暮鴉
病懷二首

築室清江上烟波望處迷雲隨山鳥沒水共夕陽低
避世辭金馬尋真問碧雞長卿多病在高卧浣花溪

其二

溪水淨可鑑山花濃欲燃雨催雙去燕風咽亂鳴蟬
玄覽忽長嘯幽居唯晏眠閉門人事絕兀坐愛逃禪

翠微閣登覽四首

臺謝還興廢雲山自古今百年重結構落日共登臨
梵宇人天靜江城烟霧深望中欄檻近小築在前林

其二

傑閣凌蒼壁僊臺表翠微月光疑隱樹雲氣欲侵衣

澗水流常滿山禽去不歸夜深涼吹入松竹故依依

其三

憑空山欲盡選勝地仍偏倚扶臨丹壑烹茶漱玉泉
茂林鶡鳩起古洞薜蘿綠撫景真奇絕還疑小有天

其四

峯頭華藏寺迥與翠微通蘭若諸天外桃源一徑中
山雲時着雨野水欲浮空何處能消暑瀛洲碧海東
郡倅南昌李邦秀被檄相水至崑邀登山樓簞

燈讀壁間張孟詩及荆公和篇荆公爲江右
人以舒倅相水秉燭登山與李侯茲行無一

弗同者李侯遂屬和之因次韻二首

靈鷲依天漢，僊槎近女牀。謝公行着屐，荀令坐聞香。
玉宇澄秋色，丹丘耿夜光。采風還省歛，農事欲登塲。

其二

月白山光吐，天空海氣吞。鶴棲時顧影，松老只餘根。
臺殿千年寺，江湖萬里村。昔賢題詠處，絕嚮繼雲門。
同趙常州麗卿衡山內翰登虎丘

天迴孤塔迥，海湧一峰奇。過雨青巒濕，迎風碧樹欹。
燕巢唯有石，龍化只空池。五馬追陪處，蒼烟集暮思。

雪夜泊婁關

水淨侵橋白，窓虛對雪明。城烏飢欲墜，沙鴈宿還驚。
歲晚孤舟夢，天寒獨夜情。蕭蕭風外急，霜葉度溪聲。
雪夜行吳江道

山陰一夜雪，風送子猷船。吳越雲連岫，江湖水接天。
芡歌驚宿鷺，漁火帶寒烟。月出關河靜，懷人獨惘然。
送崇安簿顧信之

好去崇安簿，風流顧虎頭。江花明別酒，沙鳥送行舟。
封壤依南徼，山川據上流。思君欲乘興，同作武夷遊。
塞上

羽林豪俠士，濟濟盡戎裝。繡鎧黃金色，雕鞍白玉光。

彎弓明夜月拔劍凜秋霜莫謾誇英武胡兒在北却
已已

已已臨黃道攬槍入紫宸犬戎曾犯順鳳駕忽蒙塵
日照穹廬夜天回禁籞春百年誰雪耻自古重時巡
小王子犯邊廷臣爭請出師

單于親犯塞烽火入明光將帥求方牀英雄笑舞陽
盧龍山月白花馬陣雲黃賈誼懷長策誰將獻尚方
出塞

虜騎橫沙漠邊烽起夕曛似聞魚鳥陣能破犬羊群
夜渡黃河水朝看紫塞雲至今青海外猶說李將軍

鑿池卜築郭西石川子携酒過訪

世路浮雲變高林倦鳥還躬耕須負郭心賞得名山
茆屋數椽足清池三畝慳過從勞載酒風雨亦躋攀

過南塘徐子和

二月東風煖青林花氣浮遠山當戶出平野抱江流
地古生喬木溪深下白鷗南塘春水發應許試扁舟

宿寺中松雲閣

一宿招提境人天鍾梵遙雲融江閣雨風送海門潮
禪榻夜蕭瑟明燈寒寂寥三生俱夢幻萬里更漁樵
過車塘能仁寺觀可貞書院

野寺寒烟碧江村落日黃古松蒼玉色飛觀紫霞光
勝地依蓮社香林結草堂潛夫欲乘興時汎剡谿航
吳山人子克隱居

地偏堪寄跡歲晚更移家曲澗鳴江瀨叢林散海霞
雨荒三徑草雪舞一庭花日暮山陰棹懷人隔水涯
朱黃門子謙第觀舞

日華籠霧縠風彩逼雲和使節迴南極僊裾照曲阿
柳隨香徑遠花近舞筵多潦倒江湖興從君載酒過
咏梅

玉蕊臨丹壑天花下碧空香分庾嶺外興在越谿中
巧散千林雪愁聞五夜風孤村明月上春色正融融
婁東泛舟

郡邑雄滄海關城控紫溟女墻垂薜荔長塹起鷓鴣
日落江流黑雨餘山色青扁舟望不極雲水靜遙汀
抱病雜咏四首

病卧蒼苔積端居白髮生風塵渾夢寐泉石浪聲名
楚璧曾三獻吳鉤借一鳴虛堂倚修竹相對欲忘情
其二

計拙行藏外身閒汗漫中乾坤雙轉轂今古幾忘弓
魏闕層霄上蓬萊弱水東終然問僊侶飛思逐冥鴻

其三

山色橫林靜堂陰匝岸清掠風簾燕疾映日檻葵明
高卧少塵事放歌非世情昏昏雙白眼雲壑半浮生

其四

隱居還習靜獨樂更忘言自得林泉趣寧聞車馬喧
每懸徐孺榻時種邵平園渺渺三江水春深繞鹿門

雜興二首

幽棲三徑久松菊晚相宜寒月窺林早晴雲出谷遲
烟霞隨杖履泉石奏埴篴機事由來少閒鷗亦自知

其二

地靜歸鴉集林虛落日斜山園宜橘柚江楮盡蕪葭
往事三春夢浮名八月槎閒身多病在尊酒對黃花

山園

海邑棲鷗鷺山園蔓薜蘿月明江水濶風靜夜寒多
別鶴驚魂夢冥鴻避爵羅關河天杳杳高枕聽漁歌

放棹

放棹秋江上烟波落照中江流遙赴海秋色淨浮空
白鳥孤村雨青蘋萬壑風夜深時佇望月度蕊珠宮

野寺

寺靜雲烟繞林深鳥雀鳴蒼藤蟠古木碧蘚藉寒英

幽壑泉聲遠澄潭月色明山僧俱入定日暮獨含情

九日登高次山齋韻二首

樓觀雄名古山林盛世逢嶺雲橫鶴鷲江水淨芙蓉
月近登高目僧鳴入定鍾海天風不息深夜起蛟龍

其二

巖溜侵飛閣山花映舞筵風雲連大海日月近諸天
古洞寒泉積危闌石磴懸上卿臨眺晚天際靄蒼烟

謝東泉朱節判寄新秔

載筆趨金馬鳴珂向紫宸行藏青眼在趨走白頭新
對月懷鄉國停雲憶故人香秔勞遠寄應感歲時春

端午齋居辟雍次崔司成東洲韻

嶺雲浮落景宮月敞層陰壁水濡皇澤清風振子衿
明裡看秩禮燕坐得齋心况是瀛州客同聲倚越吟

其二

橐從曾三殿官聯共一堂菁莪時雨霽蒼檜暝雲涼
急柝嚴城起華燈靜夜張端陽正佳節清賞思偏長

挽蔡鶴江學士

劍珮趨三殿衣冠映六曹日華青禁杳霞彩玉堂高
薤露悲塵世楓江慘暮濤白頭金馬士相憶錦宮袍

單氏家訓

澶水雄東郡清風藹北堂芝蘭迎日茂鸞鷲倚雲翔
白髮微慈訓青衿表義方瀧江看樹碣千載有餘光
登正覺寺白玉塔平臺

白玉層臺起黃金色界浮烽烟榆嶺夕砧杵薊門秋
感慨登高意微茫望遠眸孤鴻雲外急天際一星流

清明節朝陵五首

百里朝陵寢風塵去路長九疑開曙色三月富春
光玉渚流泉碧彤樓映日黃暫辭文石陛驅馬白雲
鄉右出郭

寶刹開陵邑危巖倚夕曛紫臺通御氣丹壑繡春

雲漏靜風初息香銷夜欲分鷄鳴桑樹杪疑向玉堂

聞右宿瑞光寺

先朝弓劍地二仲舉隆祠雨露生春色乾坤感孝思

地雄三輔郡雲護萬年碑彷彿岐山上翩翩彩鳳儀

右入山

鳳沼慙同集龍池偶並臨一亭涵粹澤群木際芳林

霖雨三時望雲霄萬古心山空斜日暝徙倚得高吟

右九龍池

鬱蔥浮王氣呵護走山靈地暖蛟龍蟄峰竒虎豹形

楊裘沾宿霧歸馬戴晨星來徃行宮外雲扉夜半扃

右祀畢
至昌平

送陸素亭之任思南經歷

南徼遐荒外中臺紫極邊都門生碧草幕府出紅蓮
儒雅琅玕並名流閎閎傳異鄉親戚別悵望斲龍泉
冬至郊齋

南郊迎日策北極儼星文禋祀玄冬合齋居靜夜分
寒光仍望月瑞氣欲書雲冠冕通霄漢瞻依意獨勤

送黃德儀任義州

疋馬盧龍道東過山海關一官聊守藏千里亦開顏
嶺傳寒雲外邊烽夕照間殊方念親舊相送各潸潸

送鄭次山憲副兵備賓州

七月都門道霜旌萬里行江山開象郡車馬到龍城
對客傾尊俎籌邊有甲兵粵南聲教地儒術並威名
送龔巽有孚按廣東

紫幟依南極丹符領外臺使華分五嶺公望出三台
渤海流風遠清江宿霧開覽看留粵徼廊廟正掄才
遊天台廣福寺

古寺開天監靈棲萬象遐地空滄海月嶺散赤城霞
勝境常飛錫高臺自雨花昭明讀書處空復演三車

巳亥夏赴 召登金山二首

金山開色界十載此重遊歲月還青眼風塵已白頭
江天迴傑閣海嶽倚高樓北望瀛州近宸居紫氣浮
其二

江山千古寺臺殿敞丹青水噴鼉鼉沫峰迴虎豹形
亂雲橫北固明月照中泠向晚松風寂相看定後僧
遊焦山二首

京口多形勝名山碧玉浮藤蘿綠石壁蘆荻起沙洲
海氣龍蟠窟江光蜃結樓不須尋五嶽到處有丹丘
其二

江漲連山麓雲消見海門風塵千里道洲渚萬家村

水月光如洗天峰勢欲吞同遊並才俊勝賞共清尊
贈天妃宮羽士

碧海通圓嶠青雲倚洞霄龍歸春渺渺鶴舞夜翛翛
月出松關靜泉飛草閣遙九還成大藥僊侶更相招
送顧文郁任銅仁推官

家望魁三象雲旌拂九霄法衡聊贊郡書錦試乘輶
鳥道千盤險龍溪萬里遙都門應惜別春雨暗河橋
涿鹿遇杜道士

曉渡桑乾水西風走馬過寒城歸鳥急古道夕陽多
邂逅班荆地蕭條伐木歌匆匆更南北回首意如何

卜居

卜居雲山裏愛此山中泉猿鶴入秋夢松蘿叅夜禪
遙空飛素練寒雨雜朱絃長嘯自塵外悠悠託金僊

雲崑寺讀書臺

鹿苑通西國龍宮近北丘四花隨雨發萬木際雲稠
石室長年閔砂泉靜夜流讀書臺上月高鎖薜蘿秋

寫懷二首

兀坐空山暝高崑爽氣浮窓虛容鳥入水靜識魚遊
野色開三徑塵心付十洲翱翔天際鶴應爲白雲留

其二

草堂樓隱處溽暑漫相侵新水沒山徑亂雲生野陰
日高猶散髮風至或披襟林下無拘束勞生媿陸沉

秋夜有懷

清夜靜無寐落葉倚雕闌月色南樓爽蛩聲北磴寒
寂寥聞玉笛縹緲憶金丹回首風塵外悲秋戴鶻冠

小吳軒遠眺

叢林期勝賞結伴踏歌游冉冉寒雲暮蕭蕭古木秋
遠山圍震澤危堞擁長洲佇望應愁思憑軒不自由

五龍山人集卷之三 終

國家圖書館. NATIONAL CENTRAL LIBRARY. TAIWAN. R.O.C.



五龍山人集卷之四

明崑山王同祖繩武父著

七言律詩

早朝

閭闔天開玉殿高，衮衣方御紫宸朝。
宮縣並奏蕭韶近，法駕齊鳴綵仗遙。
雙闕參差浮赤日，五雲縹緲護丹霄。
帝城春色應無限，萬國嵩呼祝聖堯。

郊齋

霄漢衣冠集玉堂，齋居寂寂漫焚香。
翠華駐蹕留春色，碧殿鳴鐘起曙光。
一代郊丘成禮樂，九天日月際



國家圖書館 NATIONAL CENTRAL LIBRARY, TAIWAN, R.O.C.



文章詞臣擬奏甘露賦鳳吹龍旂隔尚方

內苑十詠

太液

太液波光漾瑣闈曉寒風細綠漪漪宸居縹緲雲霞
近僊嶠蒼茫日月遲銀漢影懸鳩鵲觀玉泉聲入鳳
凰池瀛洲東望滄溟杳百丈垂虹接御堤

承光殿

寶殿輝輝映綺䟽層城高並玉嵯峨蒼松偃蓋雲霄
切碧草經春雨露多閣道九重迴紫極漸臺千尺瀉
銀河翠華縹緲宸遊迥珠璣金庭蔓綠蘿

廣寒殿

碧岫丹梯紫殿重先朝遺跡盡蒿蓬虛疑顧兔留僊
窟無復鳴鸞到上宮翠栢蒼松深駐景月華星彩靜
浮空瑤臺南去彤雲隔千古嫦娥怨朔風

龍舟浦

十里滄波繞御溝雕闌杳杳瑣龍舟瑤池不見來青
鳥碧海空聞起白鷗錦纜牙樯春寂寂玉蕭金管夢
悠悠橫汾漫有秋風曲 聖主何曾好遠遊

芭蕉園

丹苞映日垂甘露碧葉凌霄拂紫鸞近闕園林風日

暖臨漪亭榭水雲寒湖波倒影流珠幌春雨凝妝上
玉欄寂莫先皇歌舞地細論遺事有中官

涵碧亭

涵碧亭虛綠玉漪飛甍高起碧琉璃孤雲漠漠浮僊
島萬木陰陰繞御堤水碓巧當湍急處魚梁幽趣雨
深時樂成殿宇丹青麗日暮烟光護錦堆

閱射臺

百尺瑤臺對苑牆紫雲飛鶴鬱蒼蒼波光映日浮圓
嶠草色含烟繞建章閱射曾看緹騎入建橐還似彩
虹翔彤城深處迷春望馳道塵生又夕陽

兔園

蒼山隱隱入丹青水滿龍池玉洞遙五粒高松青鬱鬱
鬱鬱萬竿修竹翠蕭蕭漢宮春至花爭發梁苑寒歸雪
暗消回首只應天北極東風吹度紫鸞蕭

南臺

紫微晴望入南臺杳靄平林烟霧開一水遶溪分太
液五雲飛閣近蓬萊行宮錦障圍黃鵠馳道香塵護
綠苔落日瑤池鳴玉地苑禽沙鳥莫相猜

萬歲山

滄波渺渺環僊嶠丹岫巍巍拱帝城日月迥懸雙

闕麗烟霞長映萬峰明登封五夜呼嵩嶽作鎮千年
望鎬京松栢岡陵齊獻祝祥光時傍翠微生

七夕

輝輝素月庭臯靜娟娟微風禁暑秋玉露夜涼驚宿
鳥銀河天遠望牽牛尊前白苧人俱杳江上青蘋水
自流蕭灑絕憐宮漏未五雲光彩碧空浮

萬壽 聖節待班

海嶽秋開萬壽期千官鰲抃拜彤墀金波湛露浮鵠
鵲玉座中天擁鷓鴣寶鼎芝房迴紫極鳳笙龍管出
瑤池清華冠珮仍素從三殿香烟滿袖携

歸省辭朝別友生

詔從歸省辭天闕玉漏遙聽禁苑西賸有殘芻供櫪
馬絕憐清夢到隣鷄百年情事看黃髮萬里恩光照
紫泥回首同遊鵷鷺侶日華東望五雲低

河間曉發

古驛樓高倚翠巒鷄聲何處促雕鞍烟空瀛海人歸
遠家在滄江夢到難殘月入林天欲曙西風吹水夜
生寒北來塵土侵雙鬢愁向孤雲路渺漫

發銅城驛

紫極丹楓燭上台滄江白石倚高臺故園不見梅花

發長路時逢驛使來嶺日沉村喧宿鳥野雲籠水入
荒苔蕭條千古齊封地立馬銅城首重回

至日渡汶水懷太夫人

天涯節序驚長至汶上風流想昔賢戀闕雲深應五
夜望鄉天遠又三年霜迴忽憶迴車阪木落長歌陔
屺篇齊魯舊郊烟漠漠萬山寒擁夕陽前

過沛縣有感

沛水寒烟晝不開泗亭津鼓暮頻催沙邊白鳥雙飛
去天上黃河萬里來日落粉榆空古社風吹烏鵲有
高臺天涯歲晚移歸棹何處歌聲子夜哀

夜泊桃源

月落桃源夜泊時寒流渺渺更棲其歸心不寐聞鷄
早去棹無情逆浪遲衰草白雲空野燒亂峰黃葉自
天涯三年奔走風塵道攬鏡蕭蕭鬢欲絲

抵瓜步

故國樓臺烟霧空廣陵津樹晚溶溶人間福地開金
色月下名花照玉容揚子橋邊新繫纜北來寺裡舊
聞鐘臨風忽漫驚塵眼江上青青出數峰

冬日

澤國寒生日正昏斷鴻哀鴈赴遙村空江夜靜烟籠

水小徑雲深月到門萬里冰霜悲白髮百年塵土愧
青尊西風滿目吹殘草脉脉空餘野燒痕

夜泊胥口

萬疊峰巒倚畫圖烟深胥口黯虛無扁舟風雨驚馬三
峽落日郊墟見五湖渺渺平波飛白鷺荒荒殘壘足
青蕪千年吳越空遺跡感慨長歌清夜徂

實相寺望湖

石林精舍裊藤蘿斜日湖光入望多雙島宿雲侵碧
落片帆隨雨下滄波山中獨悟青蓮偈堤上時聞白
芡歌坐愛晴峰堪拄笏絕勝春苑聽鳴珂

登楞伽山

桃花花開春滿林上方烟繞翠微深憑虛碧殿留山
色終古澄湖駐夕陰萬里浮雲空聚散百年塵世幾
登臨越溪新水參差綠魚鳥無情總會心

弔宋詩人劉攽之墓

大招空賦不歸來腸斷鄉關日九迴詩酒百年渾夢
寐江湖千古幾塵埃蘋蘩落日誰堪薦禾黍中原事
可哀寂寂荒丘埋玉處春風依舊滿蒿萊

月夜遊虎丘

近郭溪山烟霧收月明同汎木蘭舟空壇影落千峰

暝高閣涼生五月秋宿鳥不驚松石靜禪僧初定竹
房幽雙旌午夜臨池上劍氣時看射斗牛

早秋即事 閣試共五首

玉宇新涼送暮鴉井梧搖落更誰家叢林密雨蟬聲
急高閣微風燕影斜宋玉有情空悵望潘郎何事獨
興嗟秋來無限登樓興極目長天看落霞

秋穫喜晴

晚霧晴霞散碧空秋深無雨不妨農盈疇禾黍朱莖
落隔岸鳧鷗紫穗封日暮幾家看野餉月明何處聽
隣春山人不解君王意欲共香芹獻九重

孟冬親享禮成

太廟時蒸享太牢初寒無乃聖躬勞瑤宮乍啓踈鍾
遠玉露齊鳴綵仗高百和香傳薌合酒五雲光動鬱
金袍侍臣獻罷沾芳宴青瑣臨風醉碧桃

春寒

春風蕭瑟曉頻吹忽送餘威入鳳池隔 陛浮雲依
結構捲簾幽鳥下呆愚誰家擣練衣猶薄幾處凌寒
花較遲回首碧烟開玉樹又看晴靄散彤墀

迎春花

清香麗質曉妝新何處移根傍紫宸真似葵花能向

日更憐梅蕊共迎春雲來忽動黃扉色風入時沾彩
仗塵視篆玉堂蓮燭暮一庭芳草獨相親

陳中丞邀登玉峯二首

節鉞光芒霄漢流中丞問俗到南州天空越壘山如
畫雨過江城水欲浮旌旆遠從幽澗出衣冠高並上
方遊登樓極目斜陽外烟霧冥冥古渡頭

其二

翠岫崔嵬俯碧川朱甍縹緲入遙天中臺冠冕雲霄
切南國江山霧雨徧谿鳥得魚閒上瀨野人燒竹靜
籠烟巡行多暇憐幽勝獨向崑崙訪列僊

螢火

高下飄揚繞座飛短檠相對有光輝不隨腐草終黃
土却傍明星入紫微靜室琴書還炯炯小庭簾幕故
依依滄江落葉應愁思莫戀秋風白苧衣

新秋

溽暑已謝新涼生金波玉露秋空明清溪杳杳汎舟
入曲徑時時岬幘行山館雨深雙燕去野塘風急亂
蟬鳴不妨把酒還乘興湖海仍兼吏隱名

送 宮諭顧未齋舅氏赴闕二首

金殿掄魁凌紫虹頻年休沐住雲峰渥洼已見生神

駿滄海還聞起卧龍芸閣夜陪清露下草堂春夢碧
烟封于今宵旰虛前席民瘼應須獻九重

其二

澤國雲寒水不流征人齊上木蘭舟空江明月吳門
夜上苑西風漢署秋綠水行歌悲遠別青山回首憶
同遊枚臯亦忝陪僊蹕遙倚南天望玉樓

阻風京口

京口驛邊春水生石頭城外暮烟青江山今古開形
勝吳楚東南接混溟萬里浮雲寒蔽日一川踈雨夜
占星驚時忽漫迴塵眼天畔亭亭虛翠屏

送熊峰石閣老謝政

帝相功成早拂衣清風滿袖下彤墀安危久繫蒼生
望憂樂還看白髮知丹穴雲深威鳳遠碧天霜冷塞
鴻遲東山萬仞容高卧魏闕遙應起夢思

和石淙楊少師免朝韻

黃閣持衡霄漢切玉階聽履曙光寒即看優老絲綸
重祗爲趨朝劍珮難紫塞風雲曾杖鉞碧山烟霧幾
還丹元臣補袞三台靜明主垂衣四海安

送張太史文邦還楚

上苑春風吹夕陽雙旌南去楚天長金尊已映秦樓

月綵袖猶沾漢署香鄂渚雲深開五嶺洞庭波闊帶
三湘憐君此別堪回首清夢時應到玉堂

庚辰即事二首

吳宮越壘草芊芊走馬長洲記昔年間闔暮雲空寂
寞葦蘿山月更嬋娟臺荒游鹿春遺跡劍去神龍夜
吐涎烏喙不知千載慮鷓夷獨汎五湖船

其二

玉宇輝輝霜月明金城杳杳暮雲平香堤弱柳三春
夢衰壑寒松五夜聲海內音書空斷雁天涯踪跡任
浮萍燕南自古多戎馬薊北于今有旆旌

早朝

赤鳳蒼龍起建章曳裾鳴珮接鸞行丹霄隱隱開宮
殿紫霧冥冥出苑牆玉輅暗分花外色金爐遙散月
中香五雲深處聞韶樂鵠立虞廷意渺茫

張侍御珮玉邀遊唐昌觀瓊花故臺

玉蕊名花天上栽無雙亭下即蓬萊綵雲飛觀空明
月白石雕欄已綠苔春雨殘粧歸絕域秋風遺跡有
高臺登臨懷古俱惆悵落日頻傾濁酒盃

秋懷八首

玉皇宮闕紫霄間聖節逢秋雨露間南極清光瞻帝

座上佳氣接僊班龍飛雲夢千年澤鰲擁嵩高萬
壽山搖落近臣無限意空投枚筆涕潺湲

其二

玉關西北有王庭黠虜連謀敢背盟帳下豈無回紇
馬漠南誰築二師城凋弓赤羽攢雲沒畫角清笳徹
夜鳴天外臯蘭今絕國捷書早晚到神京

其三

極目風烟萬里愁美人何處望悠悠綵雲宮闕徂清
夜明月關山接素秋絕域變衰驚別淚長安迢遞憶
同遊南征車馬無消息落日悲笳起戍樓

其四

江濶天空露氣清憑欄一望暮愁生流雲半入昭陽
殿明月高懸不夜城尚戴鶡冠增旅况似聞羌笛起
邊聲哀鴻別鶴南飛盡銀漢迢迢空復情

其五

九曲池邊野水流摘星樓外碧烟浮山含宿霧迷空
壘堤繞垂楊接御溝杳杳荆榛荒塚暮離離禾黍故
宮秋可憐大業雄圖盡江草汀花猶自愁

其六

土魯遙聞數犯邊蕭關烽火到甘泉百年沙漠關西

地五夜風雲塞北天推轂定看營細柳勒功應擬上
燕然寒霜朔雪黃河道躍馬彎弓總少年

其七

肅州城北總荒蕪塞外襟喉不可無虜市幾年開務
易軍儲千里望樵蘇驢驢西域來竒種貔虎中原翊
聖圖四海建橐方日久經綸須仗廟堂謨

其八

碧漢乘槎事若何藍田射獵記曾過行藏欲問君平
卜來往曾教醉尉詞九陌風塵雙鬢短三江烟月片
帆多淮南叢桂誰招隱寂寞聊為白苧歌

彭城懷古

逐鹿雄爭四海傾楚王都邑在彭城重關尚帶風雲
氣逝水猶疑鼓角聲戲馬臺荒青草合雲龍山遠碧
烟橫霸圖千古空消歇中夜聞雞意獨驚

感事

風塵黯黯接燕山萬里秋空獨鳥還封事近傳青鎖
闥羽書遙赴玉門關治戎自古無長策許國於今有
厚顏匣內只餘長劍在夜深光動斗牛間

送劉克柔任南鴻臚

僊槎南去水悠悠落日蒼茫白鷺洲絳節遠辭鸞禁

曉翠旂高捲鳳臺秋雲霄萬里堪長嘯風雨三山亦
舊游回首不須悲遠別金陵自古 帝王州

侍班

碧殿秋高玉露凝曉隨橐從轉彤城宸旒拂地風雲
繞華蓋中天日月明班接呆愚分鷺影樂傳韶濩引
鸞聲萬年歌頌昇平日趨走長應近紫清

晚泊新橋驛

渺渺平堤接遠天蕭蕭古驛枕長川新寒半入交河
水斜日齊牽上瀨船萬片落霞燕樹外一聲哀雁朔
雲邊驅馳苦恨秋光盡極目吳門生暮烟

別沈司空

青土分封命上卿曉辭橐從得陪行百年禮樂歸齊
魯千里河山入旆旌持節蘇卿應不辱觀風司馬更
多情若爲蕭瑟河梁別落日西風有雁聲

遊靈巖寺

天上招提紫翠浮北來登眺晚悠悠丹崖返照空堂
靜翠壁含烟小洞幽萬象寂寥歸法界五雲縹緲隔
神州泉聲只在遙林外何處尋源訪惠休

登泰山絕頂

岱宗巍巍雲氣浮諸天杳杳接丹丘丈人峯高日月

薄玉女池通河漢流紫極西來應華嶽滄溟東去有瀛州憑高一望空雙眼今古乾坤此壯遊

其二

天門高入青霄外日觀遙臨碧海傍絕壑陰陰常積雪古松鬱鬱尚凌霜丹臺石室千年祕玉檢金書五夜光封禪壇空華表在登臨回首又斜陽

維揚懷古

孤雲靄靄蔽蕪城隋帝行宮烟樹平翠柳似含亡國恨瓊花空記昔年名風前鶴鷲還秋色天上樓臺自月明萬古寂寥歌舞地獨餘江草喚愁生

題姚氏園亭

上苑春風吹碧波習家池館夜寒多遙山過雨生烟靄小洞留雲長薜蘿乘興不妨來看竹能書真欲去籠鵝南歸把釣江湖遠回首天涯柰爾何

戊子元旦

曉聞鍾鼓隔雲霄萬國朝正玉殿高心在江湖猶戀闕亭隨鷓鷯鷺亦分曹美人遲暮空雙淚遠客逢春嘆二毛唯有東風慰岑寂故憑吹綠上香醪

夜泊婁江

闔閭城頭烏亂鳴白日欲暮烟光青長風吹雲烏雀

怒急雨簸浪蛟龍腥野色冥冥入丹壑江聲晶晶空
滄溟遙林欲靜夜將半推蓬起看長庚星

贈遠林楊隱君

南郭茆堂一徑遙庭前松竹晚蕭蕭地偏自是無車
馬心遠何須問市朝越壘雲深看倚杖秦淮月落聽
吹蕭詩籤藥裹生涯外萬里青山望泐寥

木涇周表兄中山鄭子宿草堂

二仲時過蔣詡家青楓丹壑暮雲斜茆堂過雨還明
月苔徑無風自落花半榻茶烟驚睡鶴一溪春水亂
鳴蛙山園事事關幽興天外鍾聲起曙鴉

月夜登翠微

月林風磴紫烟開高閣清秋共舉杯萬里關河吹玉
笛五雲霄漢湧瑤臺長歌采藥山中去浪跡乘槎海
上來懷古不須增感慨風塵回首即蓬萊

得黃太史才伯廣西寄書

滄江木落歲云徂卧病蕭然自隱居日暮不堪聞獨
雁天涯還喜得雙魚楓林夜月懷人夢桂嶺秋風使
者車回首粵南應萬里草堂愁絕馬相如

長夏

蒼梧修竹晚亭亭長夏茆堂暑氣清虛閣捲簾容燕

入碧窓斜枕看雲生千年白苧歌仍在九轉丹砂藥
未成風定日沉山寂寂隔林時聽亂蟬聲

九月

木落霜青野色寒暮雲秋水路漫漫江湖獨汎鷓鴣
棹霄漢誰彈貢禹冠三徑西風吹薜荔一庭踈雨長
琅玕北來鴻雁驚愁思明月高懸首蒼盤

除夕

萬里滄江冰雪寒五龍山人悲歲殘青尊日月向人
盡白首風塵行路難感慨欲持魚腹劔蕭條空戴鹿
皮冠併將春色催歌舞懷抱明朝強自寬

春日

碧海春風吹敝廬青峰古城嗟索居阮生踈放非耽
酒虞子窮愁空著書紫燕明沙白日靜梅花草閣江
雲虛百年何處堪長嘯五嶽尋仙乘鹿車

彈鋏

玉宇瑤樓夢若何醉來彈鋏倚高歌同遊天上皆金
紫逐客山中自薜蘿青鏡頻看虛歲月扁舟長徃任
烟波間門芳草開三徑時有高人載酒過

榆林塞二首

寧夏城邊白日昏榆林塞上黃雲屯千群胡馬圍葱

嶺萬里烽烟入薊門當寧尚聞思李牧中宵空自憶
劉琨壯懷遲暮崢嶸盡風雨滄江獨夢魂

其二

積石河流繞玉關旄頭光照紫薇寒邊人曉候胡塵
起塞草春生野燒殘杖鉞將軍營細柳射雕都尉戰
皋蘭高飛鶴鶴樊籠在長向西風刷羽翰

睡起

玉山草堂垂薜蘿綸巾野服長悲歌囊空却怪徵求
急卧穩翻嫌夢寐多紫閣雲烟時變態滄江風雨夜
增波泥塗霄漢終黃土漫倚清溪採芰荷

雨後即事

白玉峯前隱士家柴門空閉夕陽斜巒光過雨生蒼
靄海氣隨風散彩霞地僻園林喧鳥鵲水深城市起
魚蝦江鄉五月猶春色溪女明妝浣碧沙

癸巳元日

氣轉青陽入紫微江城風日淨輝輝年華世態浮雲
變塞北天高一雁飛浪跡自慙牛馬走全身還喜芟
荷衣遙傳東郭迎春至折得梅花到竹扉

五月

五月卧病菴堂虛黃梅雨深三尺餘鳴鳩杳杳隔雲

樹碧草茸茸侵石渠避世漫爲招隱賦閉門時讀卷
生書江湖滿目風塵地獨對高峯結草廬

南岷王侍御邀同衡山文內翰登玉峯

白玉峯高接上台卧雲深處有樓臺天空碧海風烟
繞地近丹丘日月廻勝饒喜逢驄馬客追陪深媿玉
堂才江城歲晚陽春動應是飛鳧蜀道來

五龍山人集卷之四終

五龍山人集卷之五

明崑山王同祖繩武父著

七言律詩

乙未元旦試筆

落魄江湖歲屢更自憐方朔厭承明寒梅帶雪猶春
色岸草迎風非世情三殿鵷鸞曾侍直九霄鴻鵠任
飛鳴占年更喜昇平樂北望彤雲接鳳城

登玉峯

白玉孤峯丹霧流翠微高閣紫烟收霜寒關塞來青
鴈日落江湖起白鷗名勝遠邀康樂駕風塵空憶仲

宣樓乾坤寂寞雙蓬髮西北浮雲生暮愁

送朱僉憲還蜀

霄漢當年振羽翰即看風采著臺端扁舟風雨吳門別
別萬里關河蜀道難世事糾紛堪拄笏天涯寥落更
彈冠三江不盡相思意斜日流雲空暮寒

寄楊狀元方城時任山西方伯

天上黃河繞太行從臣分鉞領藩邦登龍已見魁金
榜附驥曾叨上玉堂冠冕一時俱困阨風塵千里自
行藏雲泥相望遙相憶還喜三台耿夜光

山人吳子克遊鴈蕩天台賦贈

五嶽尋仙空歲華登臨猶自憶天涯風塵已悟三生
石江漢曾乘萬里槎瀑布晴飛丹壑雨瑤臺輝映赤
城霞謝公昔日經行處幾度蒼苔有落花

送周工部木涇再使滇南

星輶再使滇南道王事驅馳意獨勤金馬碧鷄應入
望夷歌羗笛不堪聞龍旂遠度千峰月鳥道長瞻萬
里雲最羨能詩何水部壯遊山水會平分

顧少叅武祥遺遊金焦詩因憶昔遊作此

古今天塹大江流方丈蓬萊相對浮郭璞高明空日
月焦光遺跡自春秋珠宮遠度蛟龍窟鐵甕雄開鶴

鶴樓細讀新詩驚老眼臨風猶記昔年遊

春暮山園漫興

碧溪亭下采芳芹細雨微風動水紋紫燕黃鸝相對
語亂蜂狂蝶自成群江湖處處生青草巖壑朝朝吐
白雲高卧十年雙鬢在閉門誰爲勒移文

江陰孫蒙泉明府邀同木涇工曹遊桃源二島

臨大江對月

澄江八月丹山秋風烟冥冥雙鳥浮高雲靜度碧天
月大水遙通滄海流翠釜銀罌開錦席玉簫金管出
瑤樓主人青瑣聲華舊今古應看此勝遊

冬日訪拜天方翁墓

石浦雲濤虛翠屏江村烟靄鬱佳城寒原日暮生芻
拜雪夜山陰短棹行高論竟酬懸榻意孝思應見倚
廬情天方池上空延佇風露蕭蕭孤月明

陪周司寇貞翁宿卧雲閣

白玉峯高倚碧空上方登眺有龍宮即看南極臨吳
地正想東山卧謝公雲壑夜深驚宿鳥霜林秋晚見
冥鴻重陽過後還開宴吹帽應憐萬里風

乙亥再遊焦山

京口三山接混溟登臨斜日倚江亭山中不見啼猿

壁石上空留殘鶴銘到海波流千里白隔江烟鎖萬
峯青風塵今古留長嘯松竹泠泠虛翠屏

下邳懷古

當年豐沛起神龍尚憶留侯立大功玉斗竟成三傑
計金椎猶有四豪風行藏已付赤松子勲業終歸黃
石公圯上至今遺跡在臨流懷古月明中

潞河道中

潞河秋水夜潺潺萬里孤臣得賜環五色雲中浮魏
闕九重天外出燕山讎書更照青藜火載筆仍趨玉
筍班淺薄將何報明主六箴持獻候龍顏

和太宰松臯許公韻三首

日上瀛洲曙色蒼僊班齊進紫霞觴儲宮輔翊推耆
舊聖世登崇屬俊良少海波澄清禁曲前星光照紫
微傍校書白首趨天祿旣醉還歌帝德昌

其二

漢庭耆德重張蒼白髮丹顏照玉觴儲貳古稱天下
本賓僚今萃國中良冠裳濟濟雲霄上陟降雍雍俎
豆傍聖主貽謀成燕翼皇圖應保萬年昌

其三

爽氣西山暮轉蒼追隨宮案共傳觴丹心未擬賢疏

傳華髮重來老遂良金馬日高三殿直銅龍天近五
雲傍萬年玉璽 當今聖受命真看荷永昌

星槎館

溪館春風散綵霞高懷應自到天涯星河遠接三秋
水江漢空乘萬里槎招隱名山多桂樹尋山古洞有
桃花行藏莫問君平卜閉肆鈎簾日已斜

送沈鳳峯守寧波

五馬南馳列郡聞越山吳水裊晴雲峰迴綵鳳三山
出江繞青龍一水分持法久稱于定國能詩真似沈
休文明州喜見陽春至滿路棠陰到海濱

送袁補之宰廬陵

汝南聲望出東吳解褐登朝領竹符春雨一帆隨去
鷁水雲千里候飛鳧逢時已售連城壁爲吏應誇照
乘珠尚憶廬陵文獻在清風長日灑冰壺

恭和 聖製朝汎金海

太液波澄曉霧舒綠楊裊裊映紅蕖蓬萊日出諸天
近閭闔涼生細雨餘聲引鳳簫驚宿鳥影搖龍舸逝
遊魚揮毫豈羨橫汾曲賡載歌成一德娛

送趙洪洋巡撫關中

萬里天風送去軺中丞節鉞倚丹青函關朔雪連沙

漠太華晴雲捲次寥分陝古來稱召伯防邊西去有
嫖姚塞帷問俗應多暇好采豳風續漢謠

巳亥臘月過姚氏園出余舊題詩則丁亥臘月
將南還所賦俯仰今昔感慨良深援筆述懷
率爾成咏

華髮登堂老秘書重遊已是十年餘雲霄每下高人
榻松菊猶存處士廬今古乾坤俱夢幻風塵日月自
居諸長歌尚憶留題在開卷驚看走蠹魚

夏至北郊齋宿辟雍

帝城佳節逢端午宸極祥光轉上台方澤明禋真對
越辟雍齋沐更追陪宮雲冉冉披靈藻庭月娟娟映
綠槐鐘鼓嚴更遙半夜九霄清夢出蓬萊

送金東涯遷長汀尹

寶珠山遠碧雲輕鳧鳥翩翩下玉京百里清風誰並
駕十年從政始專城方春更喜桃花發到日應看竹
馬迎循吏古來稱卓魯擬從霄漢聽賢聲

霜降朝陵辭闕

一年兩度朝陵寢春雨秋霜感孝思冠冕晚辭雙鳳
闕旌旗遙望九龍池峴關北枕居庸險滄海東連碣
石竒幽冀古來形勝地河山齊拱萬年基

九龍池

風日淒淒還仲冬燕山峩峩雲萬重青冥天遠溯雙
雁白玉池深蟠九龍亭榭憑虛開錦繡峰巒倒景出
芙蓉年來鳳駕宸遊少馳道長看碧蘚封

送周木涇督學西川

兄弟情親總角時水曹聲望斗山齊文章五色輝丹
藻旌節三川照紫泥錦水遠通明月峽綵雲高傍浣
花溪觀風訪古輶軒使桃李繁陰滿路蹊

寄胡可泉中丞時閒居天水

渭水秦山一渺茫好憑雙鯉問行藏十年霄漢思鸚

鷓萬里風塵老驢驢西嶽倚雲通箭栝東吳隨地長

甘棠聖明側席求賢日早晚徵書出建章

九日有感

魏闕浮空靄翠烟薊門晴望入遙天三秋風物黃花
外萬里鄉心白雁前江上旌旗連碧海漠南烽火向
甘泉元戎杖鉞誰堪寄長嘯登臺一惘然

同水南觀菊于內方館次韻

黃金臺空秋草生白玉堂高秋日明浮雲裊裊燕邊
去落葉蕭蕭風外鳴當戶綠槐猶着影遶闌黃菊故
含情郢中誰和陽春曲擲地時聞金石聲

對菊又疊前韻

采采濃花滿逕生碧雲高映月華明金莖曉露自堪
摘玉砌寒蛩相向鳴南國屈平冷落並東籬陶令賦
閒情風塵滿地應憐汝醉倚吳歌子夜聲

辛丑元旦大雪免朝于金水橋疏問起居

紫清宮殿麗層霄元旦欣看瑞雪飄映日黃扉金
燦爛倚雲丹闕玉岩堯九重問寢通宸極萬國
來庭仰聖朝慚愧白頭叨侍從儼將歌頌答神堯

贈通叅張石川南歸

黃金臺下玉河流平子歸來正黑頭萬里長風吹盡

舫半輪明月照吳鉤尊鱸早遂三江興婚嫁難妨五
嶽遊自媿風塵猶作客送君南望一登樓

送張學士文邦遷南都少宰

附驥南宮二十年追趨猶喜近龍顏玉堂冠冕通霄
漢吏部文章重斗山蓬島迥疑三殿外鎬京只在五
雲間台衡今日應虛席佇看傳宣下九關

讌內方宅

風塵冉冉飛鴻翼霄漢翩翩彩鳳群楚國賢豪還竝
駕漢庭詞賦欲凌雲剡門山色清秋近長樂鐘聲午
夜聞感慨論心揮玉笋一庭槐影夕陽分

新秋邀翰學諸公內方辭疾不至以詩來謝漫

荅

珍重玉堂三學士九霄威鳳出凡群
文園卧病思甘露日暮懷人悵碧雲
蓬徑未勞軒駕入綵毫猶喜報章聞
槐庭想見涼陰滿秋色遙從雨後分

丁酉歲內方任少司成僕以牙章奉寄今僕忝
代內方復返見惠賦謝

雅望昔年推樂正非才今日繼仙群
牙章忽返千金璧璇榜高懸五朵雲
韋陟書體稱五朵雲漢上風流應獨步
郢中歌詠每相聞青宮賓從多才俊
謬許西雍半席分

桂洲夏公被賜內殿直廬有作奉和

上相承恩賜直廬錦芳亭北紫宸居
金莖氣肅寒初重玉律陽生歲欲除
太液風吹靈籟響洞霄雲湧篆文書
傳宣夜半時前席咫尺天顏喜有餘

送胡文江北鎮薊門

獫狁長驅入太原近臣分闡作藩垣
冠纓况復通南極鎖鑰還應重北門
薊嶺烽烟防直擣井陘旗鼓制橫奔
艱危今日須豪傑佇看奇功荅至尊

壬寅歲旦朝賀

即看鳳曆紀壬寅聖主朝元歲歲新
旭日漸升雙

關曉東風初散萬方春
鈞天樂奏中和曲
文石班聯侍從臣
載筆大書王正月
又隨仙仗出楓宸

立春前大雪登鏡光閣

拂曙聽鑣下鎖闥
祇林松栢靜依依
高臺忽湧天花墜
精舍空餘貝葉飛
明鏡倚雲開色相
慧燈和月借光輝
雪峰只在招提境
聊復參禪一振衣

送宋明府任崑山

霄漢飛騰英妙時
卽官初拜出彤墀
輿人佇見歌章甫
聖主何曾爲繭絲
春到江湖波渺渺
花明山郭晝遲遲
循良報政三年事
載筆還能勒去思

送庶吉士入翰林大宴

白玉堂高對苑牆
宰衡冠佩此翱翔
卽看琢玉成瑚璉
還擬掄材作棟梁
閭闔曉開雲蕩蕩
瀛洲春滿樹蒼蒼
金尊綺席陪高宴
聖世詞林自有光

送張世衡判台州

壁水橫經推譽望
天台佐郡想才華
青冥已識雙飛劍
碧漢還乘萬里槎
地勝曉迎滄海日
峰高晴護赤城霞
公餘漫有登臨興
仙洞春風滿樹花

桂翁被命解政館閣贈詩

扈聖功成海宇春
賜歸猶喜得閒身
行藏此日存吾

道憂樂平生見老臣未信碧山棲鸞鶴終看黃閣畫
麒麟扁舟南下休勿處早晚温綸出紫宸

送 孝康敬皇后入泰陵

昭聖仙游駕紫龍靈輜遙駐翠微宮尚思虞舜登庸
日曾是宣仁定策功玉柙珠襦寒映月古松蒼栢夜
吟風泰陵千載陪鸞寢臺殿淒涼雨露中

登錐石口觀屯戍

陵寢西連錐石嶺萬峰迴合劔門開城懸睥睨臨丹
壑地接烽烟照紫臺三峽迴疑通瀚海五雲應復近
蓬萊居庸極北華夷限滿目風塵首重回

過崦嵫嶺

碧石叅差飛燕子翠雲縹緲送溪流三千色界空人
世百二重關是帝州金鼓夜寒驚絕塞風塵秋晚入
高樓青峰立馬還長嘯直北蕭蕭生暮愁

和崔少宰丁香詩

東華塵土漫經年坐對名花靜可憐細雨一庭香自
發春風三月興悠然時飄壁水流丹藻更倚蓬山生
紫烟最美羽儀雙彩鳳每從霄漢想高騫

送國學王科判太平

壁水傳經久著聲又看五馬佐江城清修不媿師儒

職常調翻輕國士名三獻未須傷白壁一麾聊復試

青萍百年世講論心處相送那堪萬里情科曾祖與先曾祖同

姓名同舉進士榜更聯名

送托齋温公歸西川

疏傳歸來白髮生都門供帳日邊明關河乍見征鴻
遠霄漢曾聞彩鳳鳴三峽樓臺類入夢五雲宮闕獨
陳情清朝久係蒼生望莫戀溪堂聽雨聲

內方精舍觀菊

薊北燕南秋思生夕陽黃菊照還明雲開遠岫芙蓉
出露下虛堂蟋蟀鳴紫塞風烟千里望青尊談笑百

年情天涯歲晚看鴻雁何處登臺倚嘯聲

寄周貞菴大司寇

霄漢早時曾聽履風塵歲晚更懸車丹山碧水真僊
地翠竹蒼松大隱居奕葉並推名執法耆英今見老
尚書有懷鳩杖登臨處白玉峰前舊草廬

賀成國公葵亭生世嫡

靖難當年第一功聞孫班爵大明宮即看帶礪宗盟
重始信簪纓奕世崇千葉紅葵傾曉日一枝丹桂喜
秋風啼聲試聽真英物擬辦犀錢賀上公

七夕雨水南大司成携酒夜話

薊門七夕憐風雨碧樹涼生小院幽軒駕漫勞迂徑
入盤飧聊慰異鄉愁三關烽火思戎馬萬里雲霄望
斗牛感慨論心十年事夜深燒燭看吳鉤

五龍山人集卷之五終


五龍山人集卷之六

明崑山王同祖武父著

五言排律

送周使君少安考最歸省十五韻

周子關中雋高名天下聞
千金懸白壁一劍倚青雲
政佐江南美才空冀北
群謝公偏逸興鮑子最能文
五馬長洲苑雙旌震澤濱
百年增氣槩萬里障妖氛
奏課揚丹陛飛聲上紫旻
甘棠遺美蔭慈竹藹清芬
白髮明春酒班衣對夕暉
曲江流浩蕩御宿氣氤氳
燕喜供賢母龍鍾感
聖君光輝懷寸草忠藎薦芳



芹秦地山川隔吳門烟霧分曙旂瞻落月晝錦動涼
薰送別江城遠雲霄望獨勤

送顧黃門舟卿祭告夏王及會稽山十韻

丹極符元命蒼穹協衆祥百王歸祀典五嶽耿恩光
越望東南迥神功歲月長風烟人寂寂江漢水茫茫
野殿冠裳古空山草樹香暫辭青瑣直一奉紫泥章
暮角悲荒館春帆指故鄉班衣真爛熳絳節更輝煌
禹穴探金檢嚴灘繫綵航采風多著作應自滿奚囊

送王惠升改守象州十韻

五馬趨丹徼雙鸞引翠旂海風榕葉下山雨荔花飛
南北留車轍雲霄夢瑣闈象臺登杳杳鶴嶺望巍巍
開憶秦皇略柔稱漢主威春回桑柘地炎轉綵羅衣
路僻逢迎少民淳聽斷稀鬱林仍譽望愚谷有光輝
百里消晨瘴孤城閉夕暉相看頭未白莫戀故山薇

酬蔡徵士九達見懷三十韻

去住烟霄隔棲遲歲月頻風雲曾附驥江海並居鷄
碧水堪垂釣青山好結隣蓬蒿甘自沒魚鳥鮮相親
北極馳清夢東華想後塵屬橐金殿日視草玉堂辰
聖寵溫如纊王言出似綸每依鸞仗曉幾歷鳳城春
一命琚鳴玉三年帶綰銀淺才叨載筆怒臂欲當輪

天地時應泰雲雷道忽屯
薊門空矯首茂苑重傷神
大澤龍蛇遠長林虎豹馴
刺船牽紫荇築室倚蒼筠
綠酒人間世清風座上賓
高軒還任過醉尉不妨迷
露洗青精飯霞明白氈巾
數峯環菴盡三徑繞芳茵
高卧茆堂小遙傳錦字新
索居憐勝地習靜限重闈
獨向空山麓相望一水濱
綵雲聲易過白雪和難循
淮海稱豪士河汾問逸人
瑤華輕霧縠文藻渙波淪
結綬慚先達纓冠備下陳
論心真有得曳尾亦何因
已識行藏理頻驚夢幻身
谿亭閒拄笏野服漫垂紳
招隱來玄鶴遺絨得素鱗
足聞空谷響喜極展愁顰

五言絕句

題畫十首

其二
三徑秋光老東籬亦見花
只應元亮宅相對酒頻賒

其三

逍遙石室仙身卧心了了
嗟彼風塵徒長夢不知曉

其四

蜻蜓掠遊蜂相背各飛去
清晨涉山園草間亦奇遇

其五

白雲倚高春臨風欲鳴阮
有如淵明琴靜對心獨遠

其六

猗猗谷中蘭微風動寒玉佩服羅衣裳清芬照幽獨
其六

突兀立深篠蒙茸被幽徑蕭蕭雙禽棲風枝夜還靜
其七

圖畫本天趣意匠何草草似彼大觀者冥心絕機巧
其八

沁玉紅仍膩含香綠未齊自憐傾國色不到浣花溪
其九

好鳥憐春色桃花相映紅恠來人不識呼作白頭公
其十

誰把瓊瑤質移根向草堂却憐春雨後臺砌欲生香

瑤堦怨

春風度瑤堦藂枝倚虛碧日暮懷佳人芳華空自惜

白苧曲四首

白玉雙連環素腕映明月寂寞陽臺雲臨風欲愁絕
其二

垂垂珊瑚枝結根珠巖側殷勤持贈君日暮長相憶
其三

繡幙生春寒美人朝慵起對花空自憐顏色還相似
其四

春風拂綺疏盈盈歌白苧徒倚獨含情行雲不知處
雜味二首

嵐起楓林噴泉飛草閣寒幽棲塵不到空憶紫金丹
其二

烟蘿入山深白雲諧素心高懷寄玄覽長歌梁父吟
六言絕句

偶題

碧樹輕烟日暮青山小院春陰玉洞桃花笑口金尊
栢葉傳心

七言絕句

閒懷二首

花覆重樓水拍堤春風簾幙燕差池倚闌惟有孤明
月猶似當年對酒時

其二

春雨鳴鳩一徑斜風塵回首更天涯相思日暮臨溪
上惆悵東風又落花

戲簡白貞夫

瑤臺曉霧濕鶯黃半鞦明妝上畫堂司馬多情偷醉
眼春風丹臉碧桃香

荅盧駕部師陳見懷四首

斷鴻哀雁不堪聞
京國看雲苦憶君
才子當今秘叔
夜昂藏孤鶴出鷄群

其二

明月欲上孤雲低
翩翩彩鳳霜林棲
何處光芒動牛
斗知若腰劍刺蛟犀

其三

時來離索一相從
玉漏迢迢紫禁重
秋雨即看飛燕
子寒霜應自落芙蓉

其四

聞道揚雄苦著書
春風芸閣盡生魚
若爲載酒時相

過抵掌仍聽玉露餘

禪院

白雲深處滿蒼苔
靜鎖禪關夜不開
獨坐小庭明月
上一簾松影鶴飛來

上元曲十首

上元燈火滿皇州
翠管銀笙媚玉樓
明月夜深歌舞
歇王孫歸馬擁貂裘

其二

畫戟朱欄甲第新
五侯臺榭照青春
佳人醉倚黃金
瑟百和香銷落絳茵

其三

紫烟繚繞禁城東
游女明妝學漢宮
苑樹月寒風不定
翠翹飛墮玉河中

其四

禁門春色五雲開
錦索珠毬照玉臺
萬里星河臨閣道
九重宮殿接蓬萊

其五

三山雲外碧峻嶒
千峰萬峰明絳燈
先皇鳳輦今何在
空憶霓裳下廣陵

其六

摩陀寶刹對靈峰
舍利金毘出梵鍾
花光遠散三千界
燈影高懸十二重

其七

黃金臺高春可憐
飛絲颺空輕入烟
六街風月渾如夢
醉買笙歌不論錢

其八

太乙祠前春草生
上陽宮裡踏歌行
夜闌金炬都銷盡
玉漏猶聞四五聲

其九

錦鞞瑤環綴寶刀
金鞵玉勒映雲鑣
月明都市頻傾

酒日暮郊原曾射鵬

其十

供奉逍遙玉筍班
綵雲宮闕起鰲山
傳宣盡賜葡萄酒
無限春風入聖顏

無題次陳院長魯南韻七首

合殿春風轉上陽
承恩曾侍御爐香
月明深鎖長門夜
愁對清光覺夜長

其二

綠綺朱絃古調深
郢中誰復是知音
掖庭唯有孤明月
彈出啼烏夜夜心

其三

馬上箜篌怨語頻
蛾眉羞覩絳羅新
君王莫漫憑圖畫
妾是當時畫裡身

其四

百轉流鶯隔上林
穿花飛去碧雲深
臨風莫聽如簧舌
最是春聲易動心

其五

繡戶珠簾動曉風
御衣更進待薰籠
合懽團扇如霜雪
秋至空捐篋笥中

其六

旅雁經春盡北歸，隨陽還向上林飛。
芙蓉帳冷猶殘雪，那得春光到舞衣。

其七

玉顏憔悴掩重門，憶昔花前誤主恩。
羞把千金買詞賦，含情脉脉向黃昏。

送浦君守夔州

萬里乘槎錦水寒，巫山巫峽倚雲看。
使君五馬還朱紱，此去休歌蜀道難。

偶成二首

小徑踈林野老家，衡門無事長桑麻。
携筇獨向溪頭立，閒倚斜陽看落花。

其二

東郭堂成對碧山，蒼梧脩竹意俱閒。
風塵滿目應長嘯，沙鳥無情任往還。

春日二首

春日春山花正開，玉簫空對鳳凰臺。
臨風幾度增惆悵，白鶴無情自去來。

其二

雨過谿山映紫紋，水清魚鳥弄斜暉。
綸巾竹杖人間世，滿徑蒼苔鎖白雲。

謝內方 宮庶惠玄鶴

瀛洲縹渺雙飛鶴
惠養西雍舊講堂
只恐秋風吹健翮
五雲深處看翱翔

荅吳芝山見寄

玉署雲深乳燕飛
退朝猶自憶山扉
美人日暮滄江上
短棹迎風白苧衣

石室幽棲四絕贈荆溪吳隱君

石洞留雲一逕斜
春風初試碧桃花
木田菴屋聞流水
桑樹鷄鳴野老家

其二

山深涼月入松關
裊裊藤蘿靜可攀
石屋不妨雲去住
亂泉高壑夜潺湲

其三

曾聞滄海變桑田
更喜仇池小有天
一曲洞簫明月夜
石林蘿壁鎖蒼烟

其四

水簾飛瀑灑雕闌
玉樹瓊花滿石壇
最愛辟疆千畝竹
王猷乘興數來看

山園白鶴一雙因
奉徵書石川子以詩來聘遣

荅二首

十年高卧碧山雲浪跡常依野鶴群對爾多情應惜
別長鳴時向九臯聞

其二

君今予告斃林丘我捧徵書入鳳樓寄贈青雲雙白
鶴他年霄漢想同游

送人之金陵

幾年不到金陵路萬古江山滿綠苔今夜夢隨君共
去月明長嘯鳳凰臺

夏日即事二首

荒城五月晝陰陰草閣臨溪烟水深飛鳥不歸山欲

暮數聲清梵出前林

其二

水碧山青一草廬眞棲眞似子雲居松牕盡日焚香
坐讀罷黃庭手自書

五龍山人集卷之六終

國家圖書館 NATIONAL CENTRAL LIBRARY TAIWAN, R.O.C.



五龍山人集卷之七

明崑山王同祖繩武父著

雜著

天方先生傳

天方先生居古婁之東郭東郭之民化之恂恂
質任自然外絕矜詡而中令介辨摛雍擷淳直躬卓
行今天民也先生自齟齬握觚管爲文章即剖劂穎
見叔父憲使和叅政穆並當世名士數稱曰吾家千
里駒也庚戌舉進士出牧祁祁巖多俗尚澆漓先生
善拊循率以禮義民用丕變隣郡劇盜發洶洶先生

爲鉤擿立致渠魁環數郡賴以安平徭簡訟與民休息暮年治洽事益簡晨起視事吏抱文牘占署而已祁人士椎樸少文先生導之學構齋居曰洗心日與博士弟子講訓惇禮於是祁始有登進士爲世用者雖文翁治蜀無以過也居久之政績益聞部使者交章論薦列治狀旌其異能考上吏部舉最未幾以母夫人憂去州之人攀號壅道若赤子之戀慈母也遺愛耿耿勒石紀頌入人深矣比終喪不復以用世爲意先業在橫塘不治別貲產緝故廬居之鑿天方池徜徉優游以示終老所親勸其仕先生嘆曰吾始爲

親而仕今已矣吾尚安所求哉遽馳疏引疾乞休得俞旨加金緋致仕異數也先生旣謝事蕭閒曠逸無一切世營平居褰衣直履罕御公服所至名勝輒命駕登臨不憚險遠窮搜遠紹超然大觀有古達士之風子寰辛巳舉進士知任城先生就祿養至則無所事事乃東遊泰山謁闕里慨登封之遺墟式素王之故宮賦長句而返玄覽自適人莫測也寰旣擢內任以先生齒日邁予告侍養推恩得誥封奉直大夫刑部員外郎先生性恬憺於聲利榮名不屑屑芥蒂雅好絃歌引商激徵按節度曲傾耳聽之不知倦也

與物無撻觸無夸毗接見布韋或延禮竟日遇庸俗人雖赫赫攢眉卻走若將浼焉其和而介若此先生少嬰脾疾年未艾即絕慾茹澹迄能延年垂老得張蒼服食之法願神葆光視聽不衰歲丁酉之三月先生年八十有四一旦呼子若孫屬以後事曰吾殆將逝乎援筆大書治命皆法語字畫遒勁若壯時作又二日端坐而逝先生姓張諱安甫字汝勉爲古文詞若不經意而綽有思致所著書若干卷藏於家太史氏曰吾聞之自古在昔屯膏晦耀禪錦懷珎弗爲世究者竊嘗怪之乃今知之士有恒性非夫聲利榮名之所能加也季鷹畏禍尊鱸興思淵明不辱林臯寄傲媿美明哲流芬縉紳世稱逸民信矣若天方先生進靡危機退無降志乃能頓釋塵纓高蹈物表威鳳冥鴻矧燧莫及不亦難哉不亦難哉其於死生之際則固見之審矣

感木先生傳

太史氏曰予讀黃帝書知醫之道大也通乎天地法乎陰陽人之命死生安危係焉可不慎哉古書記稱越人扁鵲和緩太倉公張仲景華佗之流其治驗皆炳炳著見不可尚矣近世若李東垣朱丹溪皆稱名

醫其所著論處方確有定見學者咸宗師之予嘗見
今之業醫者徃徃不務讀書稽古以慎厥術但稍知
藥品即求自銜牟錙銖利見同術者必側目忌之曰
彼之術不予若也嗚呼誠何心哉吾崑有感木先生
者少從予大父訓導公學先生時甚貧從游六年無
以自給予大父命之曰儒與醫皆爲世用未有速效
汝居貧盍先事耕織以免朝夕累以養父母乎先生
於是晝則工織夜則刻勵讀醫書如是者又數年遂
盡通古軒岐以來諸書得其肯綮尤邃於南陽之法
治疾輒有竒效然未嘗計報洎如也其與前所言不

學無術市道人殊哉先生姓沈名筆其先蘇之長洲
人曾大父諱安山國初時法網密慮其族有大禍乃
挈妻子逃之海濱又徙家於胡川塘遂爲崑山人家
漸起世掌鄉賦屢被盜且三遭回祿蕩然矣故先生
少貧暨醫術顯始克有田廬足供粢盛先生貧時父
母俱亡不能營葬且三載偶有病夫延先生治療良
愈得謝金二十餘兩遂購地爲塋荷檐適壤思以易
之忽於河濱得一木不假斲削克濟厥用襄大事焉
先生以親沒不得養乃思臯魚之言曰木欲靜而風
不寧子欲養而親不逮且感得木之異故遂號曰感

木人皆稱爲感木先生云

應齋先生傳

先生姓朱氏諱紱字方來別號應齋其先閩建寧人也商遊崑山因家焉洪武初給戶帖遂土著爲編籍世業儒潛耀不仕至先生之父諱棡始舉進士起家爲蕭山令循良及民有遺愛擢監察御史持風裁爲名執法今蕭山及鄉校皆在記典是生先生弱冠補校弟子員砥礪自奮無統綺習讀書發憤竟夕不寐則以水漬面以警其力學如此御史公卒大母梁母王相繼卒先生舉三喪率禮修具罔有遺憾時諸弟

妹幼誨育嫁娶皆由先生若有父母也先世家中微居宅入他姓御史公復操廉介不立業產先生承緒餘訾省致羨遂百倍御史時復故宅表丘壠人皆以先生能子也爲人任雋直不蓄機巧晚更和易善交游鄉黨咸推其義待宗族以恩禮族之人有加於先生者先生卒以善格及其歿也顧憫恤其孤尤至於是人皆以先生爲厚德長者也先生有才略志於用世凡七舉於鄉皆不偶奉例入太學有子三人端禧隆禧元禧端禧先生不祿隆禧以己卯領鄉薦先生撫掌笑曰而能嗣先統吾願畢矣遂舍舉子業將

謁天曹選沾一秩以適意耳隆禧以丙戌計偕試春
官入式奔其母王孺人喪已丑對 大廷舉進士授
行人司行人辛卯選諸京官可主各省試者維湖廣
爲龍興重地 天子實慎其選曰爾給事中王禎行
人朱隆禧往欽哉行人馳傳將渡江而先生之訃聞
於是復奔喪歸而給事中亦奔其母喪胥失期會人
咸虞其獲大譴 聖天子以孝理置不問別遣竣事
於是行人得殫力大故人多避之曰先生之善誨子
也能方以義而禮得先生不沒矣墓在邑治西去鹿
城百武少宗伯未齋顧公爲之志云贊曰易稱子克

家詩言貽厥孫謀以燕翼子先生敦行樹業以亢宗
揚休且啓後之人率禮弗越昭先衍緒蓋賢矣哉行
人與予同己卯薦且雅善知先生爲詳故論之

唐陸宣公贊

某嘗讀陸宣公傳喟然嘆曰嗟乎當時君臣之能撥
亂反正者其始固未嘗不善而鮮克有終焉其故何
哉夫唐之中葉藩鎮跳梁奸雄睨鼎自天寶以還其
禍極矣迨夫德宗以猜忌任事而盧杞愾邪之徒從
而蒙之澤不下究而人心始離亂於是乎階矣孽卒
一呼畔者四起朱泚首倡入我郊甸奉天之幸乘輿

播遷唐之宗社岌岌乎殆哉斯時也宣公方以侍從之職密預謀謨草罪已之詔誠意惻怛以入人心雖武夫悍卒莫不感激流涕焉卒之李晟之師集而殲厥渠魁光復舊物興元之治燦然一新是皆於罪已之詔基之也既而宣公柄用號稱內相進殷憂多難之規効資理興邦之策舟水之喻思固結於人心韉策之遺介不取乎微物是可謂上不負天子下不負所學矣嗚呼夫豈不由德宗之能信任不疑也耶夫何宴安未幾而驕盈隨之公輔之直不容延齡之奸已售而任賢之志荒矣至於忠州之行誰則爲之嗚

呼信之不篤而任之不專厥施未究而止可不惜哉蘇子稱其知如子房而文則過辯如賈誼而術不踈可謂知宣公者矣某獨慨其君臣相與之際其始何其契合也其中又何其不相入也因感而爲之贊贊曰奕奕唐祚重熙耿光闡厥鴻猷惟茲俊良蟄蟄累葉建中垂堂姦宄肆蠹覆其典常昭哉宣公寒言審司直嵩祥協貞爲邦輔翊口代王言懋示帝式爰撝藻翰以夷荆棘公之謀謨曰臯與夔公之忠誠曰周與伊爾張爾賈疇足方之經綸罔替圖竟厥施緬彼始圖執誼相與以底偉功奠厥鍾虞盍克永終言繹其

緒吁嗟昏昏聿軫投杼公之弗究維天則然嗇泰部
豐罔俾平平嗚呼宣公建則于先炳炳青史爰垂範
旃

鑑泉說贈鮑景遠

昔載石淙公下端揆居京口數延見天下之士天下
之士爭自濯磨以進凡一技一能者罔不賓禮公優
游逸豫靜慮怡神特於奕留意焉以其微旨宏義入
玄通眇怛曰吾於奕而得治世修身之術也永嘉鮑
生景遠方弱冠英資絕倫坐隱決勝莫能出其右者
一時遂擅國手懷刺謁公公喜下榻乃令門下之士

善奕者角藝生從容應敵輒策竒勳公益喜臨流而
賞之顧謂客曰生絕藝也其中靜虛流融蓋洞然也
吾於泉而得比焉遂號曰鑑泉客曰願以命生公曰
靜也者德也虛也者量也流融也者才也吾嘗觀夫
泉之爲物也已非靜則汎濫淆激波濤耳其勢也易
挽非虛則渙忽濺淖如沮耳其畜也難旣非流融則
凝滯壅闕溝澮耳其出也有窮靜以制動德之本也
虛以廣容量之充也流融以制變才之遠也泉具數
者大可以照日月小可以察秋毫無弗鑑矣吾於生
之弈也而有默契焉猶有進於是者矣客曰何謂也

公曰靜以言學也虛以明心也流融以推治道也客曰願聞其旨曰子獨不聞聖賢之言乎不奪於鴻鵠學之不可不專也猶賢於飽食心之不可不用也帝王之治五霸之權治之各有其道也生之奕其殆可以語是矣乎客曰是小數也公無乃言之侈矣公曰噫嘻余聞之解牛可以得養生也斲輪可以方要道也牧馬可以語治天下也術安有大小顧用之何如耳客曰唯唯太史氏曰予聞石淙公之好士也豈不信然豈不信然公昔治邊握竒持衡引天下之士並帷幄論鞞鈴時稱公用兵如神古人論奕率舉戰陣之事公喜談兵故特好之鮑生之獲知於公也有由然哉余亦雅好其事乃爲之說以歸之

遯漁說

飛泉子曰余嘗觀夫古之人之處世也窮達用舍適其意而已苟適其意則無往而不自得無往而不自得則動皆天也是故其在下者農圃可也醫卜可也漁樵可也胥靡可也皆所謂遯也其寓跡於浮溘湛淖之中而罔有汙玷者遯以天而不以人也騰遠黃翁之自號曰遯漁吾盖有取焉或曰翁之隱居於虞浦也未嘗操舟而入於江湖以爭水澤之利家無畧

戩筍篲之儲門無鈞餌綸竿之設而胡爲乎漁也飛
泉子曰有非漁而漁者有漁而非漁者有漁而漁者
是皆各適其意也夫寒氓此窳爲生出沒於風濤之
區震蕩乎蛟龍之窟以至澤梁洿池朝夕足給是之
謂漁而漁者也雷澤磻谿浚其源扁舟鼓枻揚其波
嚴瀨松陵導其流千百載之下清風灑然可望而不
可及是之謂漁而非漁者也若夫高蹈遠引抗志塵
俗徜徉水雲容與烟波不物於物而適意於物是之
謂非漁而漁者也又何必累畧在前泠銛在後而後
謂之漁哉黃翁少有志於用世長而棄其業深居屏
跡植花卉課桑麻以自娛其識見閱歷卓乎一鄉造
廬而諮處者無虛時而翁視之蔑如其心未嘗不在
三江五湖之中也此吾所謂遊以天而不以人也是
獨不可謂之漁哉翁行年六十福履未艾也且將角
巾斗酒烹鮮縷鱸日與樵夫谿叟問荅行歌歌曰滄
浪之水清兮可以濯吾纓滄浪之水濁兮可以濯吾
足不知燧人氏之世歟庖犧氏之民歟石亭先生語
飛泉子圖所以爲翁贈者余竊惟夫世之以才智爲
筌而漁功名富貴者視黃翁之漁爲有間故爲述遊
漁云

說壽

王子屏跡於左峰之圃世故莫可櫻其心者久矣泊然遊乎廣莫以天地爲一瞬齊脩短爲虛妄蓋將誦法乎蒙莊之玄談而去知遺俗也客有過之者曰子奚爲者也王子曰烏知予哉嘗試言天地之間孰爲壽孰爲不壽客曰麗乎天者日月星辰是也形而下者山嶽海瀆是也附乎氣者松柏龜鶴是也其在人則仙聖之流能伏食久視若軒轅廣成彭聃赤松之徒是也是皆所謂壽也雨露霜雪不崇朝而盡溝澮汗潦不終夕而竭菌英蟬蛸之易零殤悼夫闕之靡

恃是皆所謂不壽也是二者其壽否異形其所立異能也王子曰夫壽孰壽不壽孰不壽皆有司之者故夫上焉者得其全而素定乎真次焉者不拂其情而兢兢以保其生下焉者則戕之而已矣夫是者皆有司之者予索居林丘洞視遐覽而得其槩矣而徇夫形者皆妄也已予真蒙莊也耶客曰唯唯

跋周少叅

勅命

勅諭錄

皇明之制凡仕於朝者三載考績類得誥若勅而馳恩之典有差所以榮其身以及其親也凡使於外者必有勅諭而所統之事巨細咸載所以專其

委任責其成功而假之威福也夫仕而秉憲得爲天子宣力四方內而使其親沾鴻恩被隆名豈非爲人臣子之大幸哉廣東右叅議臣周震稟錄其歷官所得勅命所奉勅諭集爲一卷藏諸厥家所以侈榮遇明職守貽訓謀意亦盛矣臣聞之君之命乎臣也貴乎稱其功能則爲不辱臣之受乎君命也貴乎効其職業則爲無負臣頃嘗承乏史官竊觀我國初凡誥勅諭臣之詞雖出自代言之臣而高皇時親御宸翰簡嚴雅飭如絲如綸典謨訓誥無以尚矣馴迄於今勅諭至諄諄不窮殆民瀆日滋法務

日殷無亦殷盤周誥反覆告戒不獲已之意歟觀此可槩見也至于誥勅乃復承傳綴襲詞多溢美雖有東閣專掌誥勅之名漫不得省視文具而已今上御寓歲丁亥命學士更番入中秘撰製王言逮下體裁渾渾煥煥乎休哉是卷首所錄勅命乃先朝頒錫而震之敷歷中外精白黽勉足以當之爲不負焉耳敢并著於篇末

跋劔鼎圖

饗帝養賢鼎之爲用大矣而以錫宗臣銘功德元寶彝器傳世靡革焉帝王之盛節也宋高宗範劔鼎以

賜其相秦檜且銘其功德之隆而祈其子孫之永保德云乎哉傾邪不忠矯殺武穆是已功云乎哉和議是已嗚呼高宗於是乎誣其臣矣檜之子孫卒不能保及今數百年乃爲竹泉所得反以享武穆焉事安可逆料哉武穆英靈在天地間吾固知其不欲覩此劔鼎也而竹泉是舉特以著高宗之不明白武穆之精忠尸秦檜之罪惡微而顯懲惡而勸善春秋之義也或曰武穆當時宜援君命不受之說俟恢復中原討君側之惡而請罪焉可也審如是檜得以藉手於國法形跡疑似之間何以自白是鼎將不得爲仲山

甫器哉而烏能享諸武穆

跋三原王端毅公手東

三原王端毅公成化間巡撫江南德澤洽於民心至今垂五十年兒童走卒皆知公名其遺愛無窮可知也已吾崑李君仁山少時以能書獲侍公几席此三紙乃公懸車後手荅仁山者仁山之子曾期持過草堂索題其後祖正衣冠讀之旣而嘆曰嗚呼祖生也晚不及見公惟於國史得公立朝之忠貞於輿論知公撫吳之德澤蓋炳炳昭著私竊仰止而有不能自已者故雖片紙隻字見之不覺肅然起敬悵然興懷

是宜李氏父子寶藏世守之重也公之去吳也繼而來者可數也而片紙隻字有爲人所稱惜若此者乎不能不重爲慨嘆

跋王元肅所藏畫卷後

佛教入中國學士大夫徃徃宗信而樂與其徒遊談晉宋以下爲尤甚雖靖節攢眉於蓮社而聞遠公議論謂令人頗發深省韓子力排異端而謂大顛有可與言者二公豈畔道哉意可想也此卷乃黃谿王子元肅所藏疑爲吳小僊筆首圖釋迦雪山精脩次昌黎及歷代名僧高士白蓮爲詳餘皆槩見若李翱之

於惟儼純陽之於降龍東坡之於佛印鳥窠獅窟芥壁蒲團筆墨草草類不經意而玄理悉臻真三昧手也余不解空有之旨特喜其工藝展玩不釋手漫爲識之

張即之書跋

宋直秘閣張即之以善書名一時今所見者進學解古栢行亡慮數十大率皆贗本此冊乃同年比部員外郎石川張子所藏張子之從祖叅政公舊物也旣失之二十餘年一旦復得張子裝潢爲冊什襲珍藏曰奚啻青氈也同祖因得而觀之書體率勁拔峭厲

氣象夔然猶之巖巒巉巖下臨萬仞而奇柯困幹蟠
聳干雲誠老筆也去向所覩贗本甚遠其爲當時重
也宜哉太史衡山公叙其家世履歷爲詳無復餘論
因漫識於簡末如此云

題慈谿王氏遺訓卷

先曾祖侍御公宣德庚戌進士也同舉士有同姓名
者爲慈谿人會試中式因以易詩列名第六第七庚
戌距今歲庚子歷百十一年世寢懸遠後人遂莫有
能講其世義者同祖於是歲二月承少司成之乏視
事之暇屬學正王子科謁余論道正誼卓乎不群詢

其家世則與先曾祖同姓名者乃其曾祖也因遂講
世義科且曰嘗聞之二祖同姓名並列巨魁在當時
亦以爲美談今科備員國學從執事後又有不偶然
者而因得講世義焉則更以爲盛事維時曾祖歷官
中外高祖母張太夫人貞淑懿恭示範厥家每遺曾
祖伯仲書必諄諄懇懇誨以忠勤盡職律已愛民今
書之存者僅八篇科慮久而散逸無以彰先世之休
德以示我子若孫於後也遂哀爲卷帙惟執事雅有
世義乞一言以示諸卷端同祖於是獲拜觀旣作而
嘆曰嗚呼賢哉太夫人之爲母也雖戴已之訓鄒母

之賢不是過也是宜爲之子者服膺義方無忝官箴
振振繩繩以施於後式昌弗替也同祖竊惟先高祖
侍御公事 高皇帝有聲不幸早世先曾祖考生三
月而孤母蔡夫人撫育訓誨逮有成立則其事又若
與太夫人同者同祖於是不能不有感焉敬書於右

跋洞庭倡和詩後

具區爲東南澤藪載爾雅及周禮職方氏所掌其大
澗澗汪洋涵浸洄旋八百餘里其中故多佳山而東
西二洞庭爲之甲峰巒林壑竒秀萬狀望之者以爲
蓬萊瀛洲仙神之所棲息非復人間境界也然烟波

風濤吞吐震激舟楫艱阻好事者恒以未得躋攀爲
恨非夫遠契冥搜窮竒攬勝者烏能歷險而追遊若
此哉余夙慕兩山之勝往時一至胥口阻風不能渡
至今耿耿適彭峯王子携此冊過草堂索題余得縱
觀文內翰徐迪功倡和諸詩不覺心目澄爽若身登
縹渺之巔足憇靈源之麓也漫書此以歸彭峯俟他
日償此願當追贖二公篇詠續書諸冊

書李文正公吳文定公書厓山大忠祠詩後


厓山大忠祠祀宋丞相文天祥陸秀夫太傅張世傑
也景炎祥興之際三臣者從二幼主間關嶺海畢力

殫慮而勢弗可爲天祥被執于五坡世傑敗績于厓
山大事已去秀夫乃援死社稷之義負帝赴海死之
旣而世傑死海陵天祥死燕市宋室遂亡三臣者死
雖後先殊其忠一也嘗論夫宋之得天下也以仁其
失天下也亦以仁仁善長也仁之極其弊也始而宴
安終而姑息宋自建隆迄于元祐所以培植漸靡者
亦已至矣南遷之後忍垢諱耻罔克良圖寧度昏弱
權奸秉樞卒移宋祚豈非仁之流弊歟而獨其忠厚
廉耻之風有未泯者故國亡而死節之臣如此其衆
且烈也嗚呼之三臣者可謂求仁得仁矣孔子曰殷

有三仁愚於宋亦云讀文正李公文定吳公詩漫系
於此

五龍山人集卷之七 終

國家圖書館. NATIONAL CENTRAL LIBRARY. TAIWAN, R.O.C.





五龍山人集卷之八

明崑山王

墓誌銘

明故光祿大夫柱國少傅兼太子太師吏部尚書 華蓋殿大學士贈太傅謚文康序菴李公

墓誌銘 代顧文康公作

序菴李公以弘治壬戌舉進士改翰林庶吉士甲子授編脩予以乙丑賜進士及第授脩撰同在史館暨正德中同為宮諭 今上龍飛同充日講官脩 武宗實錄充纂脩官出入承明後先追隨無不同也辛



NATIONAL CENTRAL LIBRARY, TAIWAN, R.O.C.

飛入內閣暨秉鈞越七載戊戌予亦蒙 聖恩入內閣輔政同寅協恭意氣相期也未幾公以勞瘁疾作遂至不起蓋是時 聖天子方倚毗委任以圖治理而公遽有此天不憖遺謂之何哉公之仲子尚寶少卿圻孫中書舍人鎮奉公之同年友前南京禮部侍郎趙公永所著行狀乞予銘公墓中之石子與公雅相知厚同官禁近且三十有四年其尚安能以不腆辭按狀公諱時字宗易序菴其別號也系出隴西始祖諱成高祖考諱忠當元季父子避兵鳳翔曾祖考諱榮有勇略善騎射洪武初授百夫長改縣從事永

樂中徙河間之任丘遂家焉祖考諱溥始業儒宣德壬子領鄉薦授順慶府學教授考諱榮登成化戊戌進士歷官山東萊州知府進階右叅政致仕自考以上三世皆累 贈光祿大夫柱國少傅兼太子太師吏部尚書 華蓋殿大學士曾祖妣魏氏祖妣劉氏妣邊氏皆累 贈一品夫人公幼岐嶷沉默有大度屬文警敏弘達爲提學御史張公西銘所竒舉進士入翰林聲稱籍甚乙丑克 孝廟實錄纂脩官戊辰會試同考官己巳實錄成會以厥考疾乞歸省考卒居憂壬申服闋補 經筵講官甲戌會試同考乙亥

陞侍讀以纂脩 恩加俸一級丙子進右春坊右諭
德兼侍講丁丑主考武舉己卯主應天鄉試辛巳
今上入繼大統遜志於學公充日講官端慎温和得
啓沃體脩 武宗實錄充纂脩官尋陞侍讀學士甲
申陞禮部右侍郎仍充日講官脩 恭穆獻皇帝實
錄充副總裁俄而母夫人捐館 上念日講勞特
命乘傳歸 賜祭塋并厥考祭誥戊子服闋起爲戶
部侍郎復改禮部侍郎己丑陞禮部尚書公掌邦禮
以正風化爲首務先是京城諸刹以節日禮佛聚男
女遊翔褻昵無別公一切奏禁之時肇舉耕籍大禮

與九推之列建設四郊 命公督視壇墀考定禮樂
數九月纂脩 祀儀成典爲監脩官辛卯二月 上
嘉其贊議 郊廟諸禮特 賜玉帶并銀圖書一其
文曰忠敏安慎俾有密疏封識以進久而失之疏請
罪 上不加譴仍 命內局範金 賜之其恩遇若
此七月加太子太保九月四郊工完 賜手勅加太
子太傅兼武英殿大學士入內閣輔政公於 文華
殿致辭 面謝 上語以事天安民脩身講學委任
諸政俾上翊 聖治即 命充 祀儀成典大明會
典總裁官時無逸殿成 上始御之 命坐講周書

無逸篇歷陳稼穡之艱難 上歛容聽之十二月朝
見 章聖皇太后賜白金文綺壬辰 命公祈 聖
嗣於天壽山五月進吏部尚書餘官如故八月彗星
再見條陳三事一曰務安靜二曰惜人才三曰慎刑
罰且以大禮大獄譴謫諸臣爲言給事中魏良弼劾
吏部尚書汪鉉 上怒欲寘良弼於法公委曲解之
遂從末減御史馮恩論列臧否廷臣 上怒其挾詐
取媚罪將不測公抗疏力拯得免死癸巳三月 上
再幸太學充分獻官次日 召見 文華殿 賜飛
魚服 召遊西苑 賜詩扇諸物五月祀 方澤充

分獻官甲午冊立 中宮充副使加少保公弼亮有
年 賜御製諸作甚多請 命中書舍人錄以成帙
上親灑宸翰賜之又以在閣謀議諸大禮及軍國機
務所得 宸翰欲自構一亭奉貯請 賜亭額 上
顏之曰珍謨 命工部給費有司督理焉 上命重
錄 累朝訓錄公爲總視經理官適一品考最 賜
勲階柱國八月南京 太廟災自陳策免 温旨慰
留時大同屢變公籌畫得宜比安靖 給賜男婦二
人乙未二月釐建 廟制知建造事四月 賜麟袍
六月遼東軍士作亂幽辱巡撫都御史呂經 廷議

欲命將剿除公曰是必有倡之者殲厥渠魁勢將自定矣已而果然三月 上脩復謁 陵舊典始 賜蟒衣凡途次帳幕器用悉出自尚方朝夕參乘以備顧問 禮成 回鑾奉 聖母汎舟西湖二三輔臣鼓楫前導君臣同遊爲一時盛事次日 上御文華殿 賜御製諸作越數日 上復詣天壽山脩飾諸陵及剏造 壽宮 兩宮各賜銀幣 上駐蹕沙河輔臣行幕密邇 御幄是夕 召對語 累朝訓錄漏下二鼓 上曰卿等侍從頗勞後或語久可立對公頓首辭謝午日 命勲戚及公等汎舟西苑旣登

岸宴無逸殿侍坐榮寵有加焉 上嘗謂 太祖文集乃經世大典因 命重加編次公分門歸類 謨訓燦然七月 皇史宬成加太子太傅九月進 累朝訓錄 賜宴謹身殿荷彩幣羅衣鞍馬之賜加少傅進謹身殿大學士十二月 九廟成加太子太師廕子圻爲正千戶疏辭改尚寶少卿未幾長子光祿少卿垣卒于任立乞假營塋 優旨慰留仍 賜賻金是月特降 手勅進華蓋殿大學士丁酉二月扈從 山陵春祭 朝見 聖母行殿上奉 聖母汎舟江湖仍 命隨侍 上欲奉 聖母往居舊邸歲

時朝謁公曰 皇上下大孝格天夷夏共仰况 聖母
時違康和正視膳問安之日 車駕豈宜輕出盖
社稷有重於孝也 聖諭徃復竟執前議是月一品
兩考 賜寶鑑羊酒兼支太學士俸廕孫鏞中書舍
人 上視工山陵從幸九龍池有民婦號訟邑宰
上欲論宰罪公曰此風不可長也宜正以犯蹕之罪
宰亦付所司鞫治之 上可其奏先是前星未耀嘗
禱于天壽山至是 皇子屢生特 命公徃謝時
元子未正儲位公疏曰 元子天下之主器宜早定
國本 上然之公體質豐腴舉止凝重數隨侍 山

陵趨走勞頓漸以成疾戊戌九月舉 明堂大禮代
視牲牲甫復 命遂卧病不能起 上聞之遣醫調
治 命中使問視不絕頌 賜羊酒蔬米皆異數也
十二月十六日卒於正寢訃聞 上震悼輒朝一日
贈太傅謚文康 賜祭九壇 命有司治葬事公生
而器宇端重量度弘偉內嚴外和喜怒不形休休有
容物我無間爲詩文渾厚純雅有前輩風協贊 聖
謨代言鳴盛勒金石而敷訓典者咸足以垂無窮其
自禮卿進位宰輔凡人才進退政化興革謀議裁成
多所匡益而 上亦悉其純厚罔有嫌疑珎賜寵異

恩禮極隆用能自効爲一時名臣休哉公娶張氏繼
娶何氏贈封皆一品夫人子二坦圻女四長適劉永
準壽州知州次適于芳國子生次適屈鄰含山知縣
次適路玠國子生子女皆張夫人出也孫男二長即
鑽次鏢官生孫女二公生于成化辛卯三月十一日
至是卒享年六十有八圻卜以辛丑某月某日塋於
北鄩莊之原禮也銘曰 温温李公系出隴西奕世
名德瀛海攸居維公篤生英質偉度敷藻詞林流芬
儒素暨遷宮秩令聞日彰經帷講幄實惟珪璋簡在
帝心命掌邦禮式替廟謨寅恭佑啓 郊裡 廟饗

禮之大端公考成議儀文不刊 帝曰爾勤忠敏安
慎錫公銀章咨爾誠蓋爾惟論道爲朕股肱夙夜匪
懈弼亮天工公拜稽首對揚休命黽勉和衷率康庶
政陟降左右巖巖具瞻曰惟柱石有隆撫謙公之薦
棊洵被寵祐鞠躬盡瘁爰立霜露 帝聞震悼允念
元臣卹典是崇逮爾後人北鄩之原新宮翼翼維檜
與松蔭爾蕤蕤公之藏斯窳窳歸幽我詞勒銘式垂
千秋

明故嘉議大夫禮部尚書石城李公墓誌銘

石城李公初爲史官累遷至禮部尚書時正德初逆

瑾擅權亂政中外承望風旨莫敢誰何公持正不屈弗徇私情以是忤瑾會有宗藩乞封禮部議法不當得瑾納賄力主之乃於左順門出祖訓以詰公公執對愈堅瑾益怒欲罪以離間上念講讀舊臣止令致仕瑾誅詔起才望常所被擯者吏部疏凡五十三人而公居首時方冀其大用公雅志丘壑不可奪矣蓋謝政者十餘年以丁丑閏十二月十五日終於正寢訃聞詔贈太子太保賜祭塋有差皆殊典也距其生正統癸亥八月五日享年七十有五其子光祿寺珎羞署署丞而進中書舍人而遇卜以其

年某月某日窆于虞山之源且乞銘於予按狀公諱傑字世貞別號石城雪樵世爲蘓之常熟人曾祖諱居仁祖諱公濟贈通議大夫禮部左侍郎考諱希潤贈通議大夫禮部左侍郎妣徐氏贈淑人公自幼穎異不凡凝然端重如老成人始就傳讀書即知大義未冠領鄉薦成化丙戌登進士第選入翰林爲庶吉士踰年授本院編脩丙申克經筵官戊戌進侍講丙午選克東宮講讀官丁未進侍讀學士弘治戊申纂脩憲宗實錄兼校正公以剛直觸時忌時實錄垂成遷南京國子祭酒實沮之也未幾相繼丁內

外艱皆 特賜塋祭服闋改太常少卿兼侍讀學士
詔脩大明會典以公爲副總裁戊午 上出閣讀書
慎選講讀公首膺 簡命庚申遷南京禮部右侍郎
壬戌改禮部右侍郎癸亥轉左侍郎乙丑 孝宗賓
天克山陵使實錄副總裁是歲遷南京吏部尚書丙
寅遷禮部尚書以忤瑾去位矣常主鄉試者一會試
同考官三讀廷試進士卷者一知貢舉者一皆明慎
周密將事母苟士類稱之公爲人重交際慎名檢內
和而外莊遇事輒敢言剛直之氣見於顏面不爲詭
隨浮沉以取容於時旣老乃遺却世故肥遯膏肓關

秀野園日與親朋觴咏其中端居簡出無所芥蒂易
簣之夕復起坐正衣冠曰受 聖朝厚恩無以爲報
言訖而逝所著有石城山房藁三十卷秀野園藁若
千卷使東錄一卷藏於家配章氏封淑人繼戈氏子
男三長而達側室曹氏出例授七品散官娶徐氏次
即而進娶趙氏而遇娶徐氏皆戈氏出女五適錢奎
趙原錫劉夢錫顧瑩華翰孫男四元治元貴元顯元
望銘曰 於穆元化聿宣人文生際昌運奕焉有聞
青宮石渠雍容多暇太階秩宗寅恭夙夜皓皓履操
母從依違靡克柄庸肥遯全歸虞山之陰鬱彼松栢

億萬斯年尙此幽宅

明故嘉議大夫都察院右副都御史許公墓誌
銘

公諱銘字德新別號警菴其先爲蘓之吳縣人代有顯者曾伯祖諱思溫爲吏部左侍郎伯祖諱某爲尚寶司丞世族也其祖諱份始來京師遂占籍宛平馬父諱琮不仕以誠篤師里閭母張氏娠公時夢紅雲翼日之祥是夕產公人以是占知其不凡矣公自幼剛毅特立卓然有志暨長不事家人常產勵精于學以壁經魁弘治己酉鄉試丁外艱哀毀成疾人稱其

孝己未登進士第初授南京兵部車駕司主事時值諸進貢者索舟徵取十倍是悉一時權要聲勢恐喝莫敢誰何公執法與抗卒不肯過予同列或危公公曰吾守吾法以憚吾心罔顧害也南都故有歲應造貢物計完而致之京師費以鉅萬公請於部欲輸其直以省運費主者難之公遽上其宜報可至今爲便其守法爲民如此遷員外郎改遷武選司郎中以內艱去服闋除南京禮部某司郎中行間超擢山東副使督學事所造就皆爲時用遷山西行太僕卿其釐革興廢靡不有法馬號蕃育時虜犯偏頭關等處勢

甚急撫按訪以籌策罔不奇中且獨當一面虜不敢犯師遂大捷公作破虜傳以紀之累遷陝西右布政山東左布政公才猷英毅風望彌彰每以勲業自許人亦以是期公居無何擢右副都御史巡撫甘肅甘肅地遠人多不率且財竭於培剋功困於攘奪爲弊已甚公未至其地悉先廉知其實遂䟽陳數事 朝論韙之暨至乃務爲振肅號令嚴明賞罰必信將佐以下畏威股栗同事者以其不便已也多忌之舊則邊兵人月支米壹石或直給銀七錢時米甚賤且銀又不繼公以爲全予之適資培剋者於衆無益也予

之半但令可買壹石於則無損也遂節之衆來告不便公不從一日與同事者議他事衆又告不便公執愈堅衆知不可奪又希忌者意乃緣而爲亂公臨危端坐神色不變遂遇害先是其處有大星墮地黑風暴起旗竿盡折公之遇害實兆焉巡按以聞且請窮其事旣而臺諫交章論其以忠受害 上特憫之詔所在以禮殯殮護其喪回賜之塋祭有加又令推恩得贈右都御史廕其一子入胄監嗚呼公以剛毅之操經濟之才重於當世方今 聖明御極顯賢用能以圖化理而公乃戕於非命不究厥施惜哉公邃

於經術所至爲人士師性不喜酒至沒齒不嘗焉爲
人好善嫉惡殉公忘私踐跡而行不爽毫髮事決於
義罔顧利害故其見危授命真有確乎不可拔者公
可謂社稷臣矣距生於天順壬午十月八日遇害於
正德辛巳十二月二日得年六十娶潘氏繼娶倪氏
教諭裕女封安人子男二長曰澤倪氏出也娶方氏
知縣景女次曰濟隨公幾被害聘呂氏知縣良女女
四長適陸達戶部郎中傑子次適盧榘太醫院判志
子次許嫁倪某知府璋子次許嫁汪某山西布政獲
麟子孫女一尚幼卜將以嘉靖壬午某月某日塋于

城南十里河之先塋其弟錚率其族以張長史行甫
所爲狀來乞銘予雅知公者故不辭銘公銘曰 皇
矣上帝眷我有明篤生英傑爲國之禎矯矯許公夙
負鋒鏑握憲不回期冀朔漠公之有爲實維變通嗟
彼孽醜曷克知公鬱鬱九源顯顯孤阜嗚呼勒銘萬
世不朽

明故鄭碩人唐氏墓誌銘

余友鄭子子約喪其室唐氏余匍匐臨吊之鄭子之
母哭於寢其聲哀以切云天胡斂吾婦之亟也吾老
將安所共哉鄭子泣且謂余曰我乃今弗遑也夫吾

始不任家累日夕事事瑣務罔躬焉吾性狷介寡合而吾妻兢兢焉事之一不以乖刺而失匝盥禮也事吾母早暮無敢怠寢膳燠寒殫力以將之吾卒業太學先後三四載而不以寒暑爲憂者吾妻在也賓客過從脍臠醕醴洵美且潔弗知有處約也吾襦袂襜裳以逮僕御紉綴皆出其手紡績組紉靡變矩矱是悉人莫有知者不幸一夕奄委間不容渺忽嗚呼吾妻往矣我乃今弗遑也夫余聞而嘆曰詩稱無非無儀不越閫限而理何事於表著唐氏之存也人不知鄭氏之有賢婦其旣沒也其姑若夫皆思而哀之而

人始知其賢古之道不是過也余嘗聞之去而思者善乎其爲政者也沒而稱者亶乎其保名者也死而哀者亶亶乎其遺澤者也雖大人君子赫然負當世之譽者猶或難之是故善以崇德德以存身德存則身亡而存德亡則身存而亡嗚呼鄭氏之婦不死矣唐氏爲崑之桐丘人父某薄宦江右其卒以嘉靖庚寅九月八日年三十有五鄭子旣卜祔於先塋慮惟逸德久而湮淪乞余銘其墓昔莊姜美而無子衛人所爲賦碩人也唐氏歸鄭子五娘而不舉竊傷其志系以碩人之銘銘曰 淑而婉生也匪蹇齎爾後命

也匪厚哀而弗諠其亡也若存攝提孟冬庚申先遠
冊旃即途虞歌載挽圓明之墟滄江瀦瀦窳窳永藏
畢如鬲如

明故封文林郎吉安府推官小隱朱公墓誌銘
公姓朱諱苓字用之世爲崑山人曾祖考諱某妣某
氏祖考諱某妣殷氏考諱某號耕樂翁先妣鄒氏繼
吳氏妣黃氏耕樂翁生丈夫子七人公居第六翁善
教子芹以丁卯貢士授永康教諭萱以甲辰進士任
大理評事公年弱冠穎敏負才雋得師家庭間明經
游校以青紫可俯手拾也未幾學諭廷評相繼去世

獨遺耕樂翁顛毛種種老不事事而門祚日衰替公
事之殫力以養耕樂不知有空屢翁歿鬻產以襄大
事宗黨益賢之公任家務又屢躡塲屋嘆曰窮達分
定也固可倖致哉值公之元嗣今憲副君觀爲有司
掄入邑庠公喜曰澤尚未泯哉吾可以休矣乃退而
耕於澱湖之濱因自號曰湖西小隱示終老焉歲丁
卯憲副君領鄉薦癸未登進士第與學諭廷評登科
甲皆相去週甲子公復喜曰是運之復也其無忝於
前人哉憲副君釋褐授吉安府推官吉安號劇郡民俗
俗狃信好訟評者蝟興天下郡惟吉安制設二推官

有由也公每戒憲副君以欽恤簡慎之道憲副君遂
爲名郡理推 恩得封文林郎如憲副君官公可謂
能教其子矣憲副君入爲雲南道監察御史聲籍籍
起擢福建按察司副使以公年齒日躋不忍舍膝下
公厲聲督之勉以忠蓋憲副君遂赴閩中未踰年而
公告徂矣憲副君奔喪回自閩以卒之明年丁酉十
二月十六日辛酉奉公之柩而塋焉哀經踵門語同
祖曰惟先大人存有隱德觀不敢泯惟是墓中之石
敢以屬之子子太史氏也言可以徵於後其母辭同
祖曩獲與憲副君同朝暨鄉居也與公周旋亦嘗側

聞公之賢矣公性樂易醇樸不立崖岸不脩邊幅行
已恂恂罔愧儒素與人言論輒煦煦微辭引義洞見
底裏溫恭自將靡所忤忌與人交自少至老無頽顏
無遽色以故親鄙咸愛而敬之憲副君貴或以請託
賂公公不爲動其自守若此縣大夫飲禮賓焉尊有
德也公旣歿鄉人有睹遺像而仰泣者公可謂鄉之
善士宜後之克昌也公生於景泰癸酉十二月二十
四日卒於嘉靖丙申十月初五日享年八十有四元
配馮淑婉儉勤克脩婦道年三十六而亡憲副君貴
贈太孺人至是合窆禮也繼娶陳子男七觀即憲副

君娶周贈孺人繼娶楊封孺人願爲公兄菊後娶龔
節娶陳繼其皆太孺人出良娶陸蒙娶郊皆陳出師
娶盧益娶唐女一適龔毅祥皆側室周出孫男十邦
奇太學生娶金府經歷王女邦達娶徐邦瑞娶陶邦
雋聘鄔鄉進士克忠女邦庸聘林邦教聘歸庠生有
功女邦禮聘徐太學生有成女餘尚幼孫女十八呂
僉通判繪子屈允升僉憲儒子嚴文鵬鄉進士簡子
張恒思刑部員外郎寰子張世祿通判承秀孫周履
冰邑生嚴紱徐仲金馬綉姚瓚徐某呂某何某丘隅
楊承芳張復祖周某秦某壻也曾孫男一鳴球聘嚴

秀水丞默孫女曾孫女二許聘顧光隆太學生文格
子梁懋先太學生金子公守德行義壽考令終而子
孫繩繩振振衍慶裕澤將無旣也是宜銘銘曰 古
有聞人秉德于獨信履式毅以雍以穆亦有大道延
永于世紬繹其緒而昌而熾天之泚泚鑒實昭昭惟
德不匱母或憺惓江流瀾瀾原田碯碯有厚者藏尚
千百禩

明故太學生金菴徐君墓誌銘

王同祖曰余嘗聞古所謂豪傑之士其才氣識度雄
邁卓犖睥睨當世與人人殊能不爲習俗之所漸改

之人也殆將孟氏所謂大丈夫哉吾於徐君見之矣
君天資英雋穎悟絕人自少習舉子業爲文下筆千
百言亶亶不休年十八補縣學弟子員二十游太學
於是進友天下之士其所得益宏且博聲稱蔚然時
大學士河南賈公爲大司成試諸生見君所爲文大
竒之擢居首列聲益起君亦自負不淺以科第爲可
俯手拾也再試於鄉闈皆不偶其志進取蓋將未已
而不謂其遽止此也嗚呼惜哉君之才長於叙事如
太史公書記翩翩綽有思致如陳孔璋平生好交游
賓客滿座慷慨嘯歌意氣相合遂輒傾倒遇俗士稍

不愜意即拂衣起若將浼然其不能夸毗取容若此
君襟度蕭爽不事猥瑣能仗義輕貲拯人之急見事
不平輒與軒輊待宗黨悉若此以故未免恩怨君亦
不顧也壬辰之秋忽邁危疾迄癸巳春彌劇同祖往
候之君俛首嘆曰余殆將不起矣夫余命也已余之
子君之壻也敢以累君庶全弱孫以延余宗祀余即
死猶不死也同祖慰謝不敏遂以其子歸與君別猶
未旬日也訃至君果長往矣嗚呼惜哉君諱中孚字
盈甫別號東泉後更號缶菴世家江陰之梧塍里五
世祖本中國初以義士徵不就曾祖景高祖鼎永州

府推官父圭乙卯鄉薦亞魁母蔣氏君生於弘治丁巳八月初十日卒於嘉靖癸巳二月二十有九日年止三十有七配趙氏宋宗室圭之女子一韋即聘余女者女一庶出君卒之又明年乙未卜地于由里山之陽塋以是歲十二月二十有八日於是韋亦既長矣余令其歸襄君事韋拜且泣曰先君塋有日矣惟是墓中之石未有刻辭敢以爲請是亦先君遺命也嗚呼余忍銘君哉銘曰 夫人有志爲虬爲龍憑陵震宕鬱而未通乃與化逝命也永終其氣雄烈上干蒼穹長夜耿耿吐爲白虹大江之陰由里是宗舊塋透迤翼然中峰爰旣卜宅若堂高封帷千百禩傳之無窮

明故太學生子先周子墓誌銘

太史氏曰余嘗聞之夫人之生也莫不有命焉其壽夭脩短漫漶不齊皆有莫之爲而爲者亦莫不有數焉鎊已而行乎世均之才也而窮通頓殊長子孫莘莘繩繩傳世不絕雖庸奴猶安享之而躬仁義服善良者或不能庇其身故吾謂命有所司而數有所值要不可以論人也吾於子先氏知之子先視余外屬兄也事余唯謹少好學篤志潛精締思發藻振翰體

裁不群常與余論議輒入閫奧評古今人才傑道化
理亂胸次了了若欲與之並驅爭先者每爲一快不
謂其遽止此也夫以子先之才有大過人者於榮達
何所不致而竟泯泯沒世素艱得子子且生三歲比
子先死三月子亦死嗚呼子先於死矣黃溪王
子元肅子先姊夫也與子先少同學意氣相期傷子
先之旣死也爲之狀其行丐余銘墓中之石且言曰
此非余意也子先之尊翁鶴村先生實介余以請唯
子先素事子謹子固知子先今子先不幸以死死又
無嗣惟是不朽之圖將以累吾子子其母辭余爲掩

袂不能言嗚呼吾忍不銘子先墓乎子先姓周氏諱
允元世爲崑山人曾祖考諱某祖考諱某贈南京刑
部主事父愚鶴村先生戊辰進士起家歷任雲南按
察司僉事致仕嫡母戴氏封安人生母某氏始鶴村
先生亦艱得子年旣壯而得子先穎異秀朗亂時
提學黃公命之屬對曰崑山三狀元子先即應聲曰
直隸一提學公大奇之長入鄉校補弟子員益淬礪
力學志槩卓然以例入胄監與六館士較藝子先三
居首時大司成儼山陸公少司成介立林公愛其文
傳播公卿間稱其才氣似董中峯蓋以魁元待之也

乃竟不偶子先既失志居常怏怏爲歌詩俊逸豪宕以紆寫懷抱暇則游藝揮染毫素或舉白流連長歌激烈寓意自適也嘗與吳人士登金山山僧乞詩子先立賦二篇秀句戛出衆皆歛手詩刻於寺中家藏陰何集字多訛以意訂正後獲善本校之悉合其才識如此所著有玉虹稿子先事戴安人甚孝安人願復之猶已出子先至成童猶不知非安人出也安人嘗暑月病疽劇甚子先視湯藥抑搔扶持衣不解帶安人賴以瘳又數年安人病卒子先哀毀瘠立周之族聚居櫻桃塘子先念墳墓宗黨所在思有以振之

於是營舊業示不忘本也作汝南世譜歲時合族享會有恤其用意醇厚若此子先生平行已儼儻務大義不爲握瑣詭隨其有足稱者而竟早夭未見其止惜哉娶王氏某官愔之女子子先以弘治癸亥七月某日生嘉靖丁酉卒業南雍七月二十日暴疾卒享年僅三十有五子先死無子禮宜爲立後鶴村先生曰俟異母弟兄懷之有子也銘曰 和氏焯爍兮弗爲珪璋梗楠菴夢兮弗爲棟梁文肆質籛兮絕響鶩光跡脩而回闕兮亦天道之靡常惟靈菌與織蜉兮恒致慨於彭殤羗羗命數之適然兮詎諒德之匪臧封原

騰騰兮江流湯湯介丘龍從兮蚴蟉鬱蒼溟濛瀕洞
兮閔茲玄堂載勒貞珉兮萬古永藏

明故太學生越溪梁君墓誌銘

越溪梁君以茂才異等應嘉靖丙戌貢上春官既卒
業南雍甲午赴吏部就銓格待次二載丙申以疾乞
假歸道卒於沛君無子遺命以仲兄州判諱鳴鶴之
次子介爲後有二載戊戌十一月某日介奉君柩權
厝於小虞浦祖塋之次先事緣經詣余乞銘余紈惟
自曩歲學操翰竊見君所爲文義率典雅敷暢綿繹
貫緒謂不可及時莆易黃公如金督學南畿較試君

文輒冠諸士聲一時藉甚以科第可俯手拾也乃竟
摧挫不偶凡七舉於鄉皆無成晚始獲應貢將寄一
命而又偃蹇困瘁卒死於行天之所以靳君者若此
其命也夫其命也夫君諱鳴鵬字九萬應貢後以字
行更字翼卿越溪別號也其先河南人七世祖諱孔
彰元重慶同知生桂陽通判諱仲德始家崑山入

國朝代有顯者高祖考諱孟鏞四川萬縣主簿曾祖
考諱棟祖考諱昱山西平定州知州有遺愛祀于鄉
贈奉直大夫世稱孝友先生考諱統福建泉州府同
知進階朝列大夫前妣周氏贈安人妣陳氏封安人

君生而穎敏稍長益拔異卓犖綴學辨故肯綮若然弱冠即以儒應鄉試不第克邑庠弟子員旣受知黃公彌自奮厲嚮風從游者日廣君樹師道肅禮闡訓多所成就西蜀梧山李公巡撫江南雅相重延以教子姪踰年姪槃以易魁湖省君性孝友事朝列公及陳安人皆能養志待諸兄若弟恭愛靡間至其律已飭廉隅砥節槩儀範儼然雖家庭之間不妄咲語朋友有過每正言相規益不爲詭隨君學行不苟若此咸以遠大期之惜乎天不假年矻矻垂沒無所於見真數竒哉昔顏子早夭賈生自傷亦皆附青雲振鴻

策以施於後君才不遇而更泯焉以沒其命也夫其命也夫君生於成化癸卯十二月八日卒於嘉靖丙申八月十八日享年五十有四娶狄氏所生四子皆不育嗣子介縣學生娶周氏廣南知府墨之女女五適縣學生朱景儼太學生張廷傳嚴汝賢府學生俞允文贅張道隆適景儼廷傳者先卒孫一懋昭娶郭氏曾孫女一朝列公嘗受經於先祖石門訓導公君孫婦又余甥也世講舊矣銘曷能辭銘曰 有彥瓌瑋被儒行兮發藻籍譽驅絕塵兮離朱抗明倅讓工兮獲人仰堅石運斤兮華采稟稟飫咀者兮迅焱疾

霆倏凌厲兮天池崢嶸邈難徙兮六翮崔嵬斂軒翥
兮景駭響震淪杳冥兮斥鷃決飛鷓鴣鳴兮浮湛淹
速生之度兮脩短絕續羗有命兮蒿里纍纍薶蕪茸
兮靈辰復歸吾道竟兮

明故萊州府知事東萊金君墓誌銘

君於乙未之歲過余草堂謂余言嘗遊義興之張公
洞探幽履竒巖穴窅窳盤磴紆屈見所謂石田丹竈
真僊遺蹟儼然在焉若有人撫摩其背者比出洞視
則衣上隱隱見巖空二字以爲有竒遇且屬余記之
余以其事涉神恠而君又惇信人也因唯唯將爲君

紀述不踰年而君竟不起豈尙所值爲之兆也抑若
所謂縣解順化溘然而僊逝也耶余卒負前諾而君
之子應奎乃乞爲誌其墓門之石其能終辭乎君姓
金諱玉字良德世居婁東二舍許今爲太倉州人曾
祖考諱敬祖考諱實考諱某妣陳氏配沈氏君少有
志識稍長不事家人生產雋爽任俠不握瑣計盈虧
父母以爲憂因俾別居歷茹荼苦君更自砥礪以訖
樹立家日益饒父卒弟鏊母獨鍾愛與之居君數迎
養不至君知母愛少子以私藏在不欲頃刻舍白母
曰兒今可自給弟少願以其藏悉與之兒無所覲也

母由是悅往來就養弟嘗携君金义而忘之君與辨且索之急沈氏諭曰兄弟乃爾耶君嘆以爲賢遂感悟不復計沈氏弟藻嘗以金假君而籍記誤以爲君假者藻沒其家按籍償君金君曰非也我實假金遂償之君以婁東地瀕海數有警因徙居崑山其故業在東者巨室爭欲得之君獨以畀從姪章不取其直章難之君度產之歲入計四稔而取足曰母處也夫以空券而棄千金之產誠不易哉族子鯨佚宥無倚君卵翼之爲之娶婦植產鯨弟鵬公逋甚急至收其孥君更代之輸君有宏度凡親交有求于君者未嘗

言匱乏度不能償者或爲之焚券姨子張櫟少好學而力不逮君延師以教之櫟果領鄉薦爲儒官君行義磊磊有古賢豪之風類若此正德中以例補中都留守知印授南京神策門千戶所吏目丁內艱服闋授山東萊州府知事約已馭事事悉辦上官交稱其能居無何嘆曰人生貴適志耳胡自苦形役耶遂請老時巡撫大中丞沈公林方伯姚公謨嘉君志尚特允其請旣歸卜築吳淞江之南親朋過從絲竹壺觴博奕詠歌雜然前陳每興至呼盧竟夕不知倦也自號東萊以故居在東且志所嘗宦游也君爲人坦夷

樂易洞見底裏以是無忤于物與之交罔有不終者
君誠賢豪哉嘉靖丙申正月七日以疾卒距其生天
順甲申十一月二十享年七十有三配沈氏先君二
十一年卒子男三長徽太倉州學生次節俱早世次
即應奎太學生娶周氏德興訓導瑞孫女女二長適
王權南京兵部侍郎倬之姪次側室陳出適太學生
未邦奇福建按察司副使觀之子孫男四復初娶馬
氏先卒性初聘王氏湖廣布政司叅議燾之女秉初
聘陳氏一尚幼孫女二一適徐肩墻吉安府同知懋
子一許嫁周某金華府經歷文達子曾孫女一應奎

卜以己亥正月十六日權厝於太倉州湖川鄉之新
塋禮也銘曰 在昔鷓夷三致千金懷生振業以嗣
徽音亦有天隨淞陵尚隱爰營菟裘實比封畛賢豪
倜儻於維幕君亢宗承休以迨有聞高訾共侔薄游
絳組適志則然曾謂荼苦魚龍雜沓梟雉縱橫寄興
乃爾曷惟櫻寧瑤洞金芝真僊所鑿丹書儼存神游
寥廓

明故福清儒學教諭前南京工部員外郎東白
徐公墓表

江陰之梧塍里有紱德行義之族曰徐氏 國初時

諱本中者實維起家大宗生諱景高皆敦樸執德爲鄉善士生諱鼎任未州府推官莊靜嚴恪守官居家悉確有矩度凜不可犯生三子諱弘道字文卿別號東白其季也與伯兄信卿俱登弘治乙卯鄉薦一時聲稱籍甚八試禮闈卒皆不偶至嘉靖丙戌始就銓曹試公名在第一授南京工部司務公上承大司空下統率群政罔不信度三載考績改任工部司務未幾膺簡命督南京織貢事公飭躬勵法俾典局者毋敢爲乾沒賕賂以售纖紕故章施作服盡符制則竣事擢南京工部營繕司員外郎實異數也公以營

繕所主鳩衆材庀群工經費實殷不精以核之不可也於是持庶秉公將之以嚴而姦黠善尅者皆屏跡索息無所容暮年庶務畢舉大司空屬號稱得人然忌者滋衆思所以媒孽之矣歲癸巳循例考察京官率爲所中謫福清儒學教諭公慨然束裝親有勸之止者公曰職無崇卑顧任與否耳庠序不可以行吾道乎遂往甲午二月始至福清蒞教事與諸生講繹經術周旋禮容歸於大道情者有警貧者有資於是挾策之徒皆知嚮風以勵於學遠邇景行方期有成閏二月庚子忽遘疾不起於是諸生皆哭之慟爲治

棺斂椁含物用精美罔有遺憾是歲福清之舉於鄉者八人而魁解居二皆前所未有公教化之速徵於茲矣有司表其風猷祀之龍江書院辭曰德器寬洪謙冲和易富而知貧尊而體卑載在邑乘曰式端軌範振作士風公之名德可謂不朽矣公生於成化辛卯享年六十有四公自少事永州公及母吳孺人孝謹詳慤永州公出分諸子爲建別墅於北塘遂世居焉娶趙氏石橋鉅族出自宋孝子鉉之後有令德生子中立國子生鑄府庠生栢氏出女二長適楊鈞武進庠生次適李而遇大理寺副常熟人大宗伯世賢

子也孫男二長嗣曾中立出次尚幼鑄出是歲四月樞歸自福清二子卜以乙未十月某日安厝於繆墅之新阡禮也嗚呼公之獲德行誼涵淳葆光內而孚於厥家外而共於厥職雖位卑時絀不獲大究其所施爲卓犖自見蓋與庸瑣常流殊異矣嘗謂士君子之於斯世遇不遇命也任不任所自立也若東白公者誠達夫通塞之道而無忝所生者哉余與公從子爲姻家且式公行履故因二子請叙次其槩表諸墓道以昭示來裔云

五龍山人集卷之八終

國家圖書館 NATIONAL CENTRAL LIBRARY TAIWAN, R.O.C.



五龍山人集卷之九

明崑山王

同祖

武父著

行狀

明故資政大夫南京刑部尚書貞菴周公行狀

公諱倫字伯明別號貞菴世為蘇州府崑山縣人高祖諱祥曾祖諱璣祖諱璩贈資政大夫南京刑部尚書祖母張氏贈夫人考諱紹號芝雲翁封監察御史累贈資政大夫南京刑部尚書妣李氏累贈夫人公始生而穎異比九齡芝雲翁手書大學章句授之即能領悟十二受易于鄉先生黃足菴之門習舉子業



下筆語不凡咸竒之二十八縣學為弟子員累試優等食以廩弘治壬子領應天鄉薦時年三十丙辰禮部會試中式念祖母張氏喪未葬因疾告歸己未入試大廷登進士第觀政工部是歲冬除保定府新安縣知縣公履任即詢民所疾苦均丁差桑絲悉減於舊民甚便之庚申秋旱甚縣南易陽社蜚蝗集如雲公率僚屬徒跣禱于神次日大雨蝗皆負草死辛酉水災上疏乞停派木發寄養馬匹事下兵部議從之長溝等隄被水滄沒為民病公請于巡撫發粟賑濟因令人各負土填隄始授以粟民皆踴躍不日隄成

因通濬諸鄉水道教民庠以灌田於是新安始廣種水稻時民饑穀價騰貴公復請于巡撫倣古常平之法減價糶賣以濟饑民次年秋收穀賤仍令以原價收糶還官官不為損而民不知饑時大理右寺丞吳一貫以河南賑濟道經保定廉其賢特疏薦之壬戌正月入覲領 勅諭還新安議處養馬地土民免於累公始至縣增脩學廟至是改建靜脩書院以祀元大儒劉先生公暇與諸生講論經義士皆向學興行事載文定吳公二記公嘗兩署安祁二州印所至皆得民心巡撫都御史王沂巡按御史喬恕交章奏保

癸亥赴吏部給由考最復任巡按御史陳恪覈實在任政績卓異獲封父母妻室甲子五月行取赴吏部考選除山東道試監察御史十月巡視西城乙丑五月實授監察御史時 孝廟上賓於乾清宮作佛事又近邊州縣正官進香公皆以為不宜上疏乞止之時宣大有警公疏備虜六事一曰清儲蓄二曰足軍餉三曰謹要衝四曰慎用人五曰守漕河六曰安人心皆中一時機宜事下兵部議行十一月奉 勅差往居庸關直抵龍泉關巡視軍務正德改元丙寅奉勅會勘太監李興砍伐禁林山木奏入下法司議覆

上嘉其直特賜羊酒鈔貫七月復奉勅閱實邊關九月聞芝雲翁疾亟遂乞養病滿歸比至家翁已下世矣丁卯循例赴京領孝字勘合至中途見逆瑾新行事例凡養病一年以上者着致仕其友勸公曰子以病歸以憂入京恐不免若貸金以賂或能保全公曰以金市惡名非所欲也遂返棹比歸家已違限一年矣乃以例致仕公嘗會薦革職都御史雍泰正直宜起用戊辰瑾發公疏罰米二百石赴大同上納又以嘗論西庫布花積弊罰米一百石赴京倉上納時有同年某御史巡鹽兩淮或勸公往立可辦公曰是蓋

重吾禍也寧破產以應罰人皆高之庚午瑾誅十一
月起復公以母老不即行壬申八月赴京復江西道
監察御史疏極宿弊以裨 聖政凡五事而囚犯紙
罰遂著為令其一錄遺才薦大學士謝遷尚書劉大
夏編脩許讚謝丕檢討許誥御史李熙等皆以忤瑾
黜謫乞收錄起用上從之又累劾大學士焦芳總兵
官張洪大協輿論癸酉二月巡按山西時虜騎入寇
越過十八隘口副總兵神周輕敵失利公疏論劾及
陳言邊務六月疏處遠軍八事悉從之公又疏論畧
曰宣大延綏鴈門等邊雖各自為鎮其實勢相聯絡

今各鎮遇賊入境則云應合應援離境則曰堅壁清
野一隔藩籬遂分爾我杜門觀望虜志益驕積習如
常深為可慮乞調各鎮遊騎官軍各駐劄近邊酌量
賊勢互相應援則諸鎮一心邊陲可障矣從之時各
鎮皆擁兵自保不相救援虜至往往不能獨禦以至
失守故公言及之復脩築省城南關城新築寧武關
土堡十一處脩代州城及各關梁口月城一萬一千
餘丈挑濬濠塹三千餘丈地險攸賴足以禦虜時劇
盜絀王等倡獮公遣兵勦捕獲其渠魁四十五名撫
散餘黨然皆歸功將吏未嘗施勞八月監臨鄉試惟

公惟明得人為盛脩澤州湯王廟克復祀田脩建平陽堯舜禹祠表揚孝子節婦民知崇尚是歲黃河自平陸縣至懷慶府三百餘里清徹五日公上疏以為地道太寧之象 陛下驗之兩宮其果康寧驗之中宮其果和洽如休徵相應應否遣祀以荅神貺又謂春秋書大有年紀異也不謂其為祥也非不祥也恐因祥以自辭孔子教萬世之道也惟 陛下察之時以為正論公按歷山西一年興利除害激濁揚清不遺餘力若審釋繫囚旌別淑慝風裁凜凜三晉肅清於是聲冠臺端矣其所薦布政孟鳳知府劉文莊通

判韓邦奇等後皆登用為大臣咸稱公知人甲戌秋公復 命赴闕復奉 勅揀選京營官軍公兩疏論選操軍以實營伍及祛宿弊以清營伍八事下兵部議行時 武廟御極朝儀久廢公正旦疏請肅朝儀以表正萬方蓋諷諫也舊例五年一差官審錄天下罪囚自流賊起所在繹騷刑部具奏暫且停免至是十年矣公因災變上言寬恤之典久虛則寃滯之獄不清傷和召異未必不由於此宜復差官審錄則至仁得以旁究而和氣足以致祥矣從之遂著為定例冬十二月遣司設監太監劉允齋送當供往烏思藏

允勢方熾公上疏極論雖留中不報允為稍戢丙子
陞南大理寺右寺丞己卯七月宸濠反南京甚危公
分守定淮門後以保釐重地論功受賞辛巳六月陞
大理寺右少卿嘉靖改元壬午陞本寺左少卿以改
元賞白金一錠郊祀禮成賞文綺一表裡又以改元
恩典奏乞移封 上允之六月陞都察院右僉都御
史癸未四月以母夫人李氏高年思歸公疏乞休致
送母還鄉奉 旨得馳驛蓋曠典也不踰月夫人壽
終于京邸公疏辭馳驛 詔不允公歸居憂喪塋以
禮乙酉服闋十一月改南京都察院右僉都御史提

督操江協理院事 勅起公于家丙戌六月陞本院
右副都御史協理院事七月疏論操江所統地方事
宜下該部議勘十二月齋慶賀世廟表文赴京以災
變自陳不允丁亥四月回南京會同吏部考察南京
職官五月陞南京工部右侍郎六月改兵部右侍郎
九月履任奉 旨清理軍職貼黃十二月 特命協
理都察院事戊子正月陞本部左侍郎奉 旨提督
武學十一月陞南京刑部尚書己丑五月改刑部尚
書八月赴京師 命侍經筵九月奉 特旨改南京
刑部尚書特桂相以諫官論去位有 旨逮問其私

人李夢鶴等事下刑部少傅張請解其事公對已有公道及律例在遂不合會南京刑部尚書缺 特旨改公於是官屬下詔獄去官矣十月抵南京履任庚寅公理刑獄令各司日報囚數朔望稽考勤惰官曹肅然奉 旨會審罪囚矜恤明允又上疏推明律例七事下法司會議施行辛卯三月以郊恩頒賜誥命進公資政大夫閏六月奉 特旨會同內守備三法司審錄罪囚七月上疏應災自陳乞休不允壬辰公年七十秋八月考滿上疏自陳乞休不允九月 陛見上疏引年乞休又不允吏部具題奉 旨復職癸

巳赴南京刑部復任四月會同吏部都察院考察本部屬官五月上疏懇乞休致得 俞旨公既謝政歸故鄉杜門屏跡養高怡神與同邑耆舊數公倡延景約尚簡樸直率其大義厚俗明禮有裨風化興之所至登臨燕賞欣然命駕觴奕唱和樂焉忘疲公出處高潔不嬰情世紛若此嘉靖己亥公始得足疾自是必以小肩輿代步壬寅七月一日疾篤強起巾櫛判析家政猶自診脉云氣脫矣儵然而逝公生于天順癸未十一月十三日至是卒享年八十訃聞 上念公舊臣 賜祭二壇特遣中書舍人徐岱往治葬事

加贈太子少保謚康僖恩典優異允協輿論公為人坦夷端雅不事矯飾外寬中嚴操履耿介得失之際喜怒不形于色其德量誠有未易及者臨政持大體不尚苛猛而讞獄奏當悉比于法遇大辟必虚心按驗無使失入故人皆以長厚稱之或有干請未嘗色拒而執法持正一無所撓與人言無少長皆不失意至崇論宏議每激發抗直無少阿徇此則公之大節也公性儉約雖處貴盛而樸素若儒生居家教子孫以安分謹身為務畧訪范氏義田定贍族事宜以給三族之貧者生平無他翫好獨嗜醫謂能養生可以

及物邑嘗患疫痢公施香連丸賴以全活者甚衆書法行草槩矍晉人而放筆大書逼似山谷求者踵至非其人不予所著詩文詞義典明要以說理為主手自選定貞翁淨業二十卷奏議十二卷西臺紀聞二卷醫略四卷藏于家公娶丘氏繼娶曾氏南豐先生之後也皆累贈夫人劉氏封宜人子男四人鳳鳴丘夫人出甲戌進士歷任大理寺寺丞娶顧氏太保文康公兄孫也鳳儀太學生為弟佐後先卒娶徐氏鳳起以廕為胄子娶秦氏繼劉氏鳳來太學生娶徐氏繼趙氏皆劉宜人出女二長嫁縣學生葉良材先卒

次嫁貢士方玉岡孫男三汝龍娶朱氏汝崧先卒汝
驥孫女六嫁者五其婿為寧州州判朱希魯太學生
柴告縣學生俞允濟張恒慕高驥達曾孫男一本端
鳳鳴等將卜以明年甲辰正月初三日葬公于縣東
南車塘錦里之原竊惟尚書公起家為縣令有惠政
及民至今列祠名宦為名御史忤權遭廢節介炳炳
比登歷部院掌憲執法為天下平雖震撼摧抑而不
為沮屈卒以功名保始終享壽考若公者可謂古之
貞臣矣謹列叙其行實以俟信史采擇焉

明故馬湖府知府誥進中憲大夫桴齋顧公行

狀

公姓顧諱潛字孔昭顧故為吳中著姓七世祖道璋
為元萬戶世家崑山高祖諱大本隱德不仕曾祖諱
士良贈詹事府詹事兼翰林院學士祖諱恂累贈詹
事府詹事兼翰林院學士考諱宜之封山西道監察
御史妣周氏贈孺人繼李氏封孺人公生而穎異九
歲善屬文御史山陰司馬公督學南畿試以經義詞
旨醇暢大奇之選入縣庠時年甫十有四聲藉藉起
以弘治己酉領鄉薦丙辰舉進士內閣諸老閱廷試
策擬寘一甲不果竟得二甲第三尋被命改翰林

庶吉士每閣試輒入首列學士守谿王公碧川楊公
皆器重之將授館職不果戊午授山西道監察御史
初巡視京城奉公執法不避權倖有中貴人嚙之偵
伺無所得以朝儀註誤奏聞下錦衣獄 上特宥釋
之庚申奉勅往山東河南諸郡印信馬匹所至悉心
咨訪馬政及民間疾苦上䟽論列一曰定買戶以寬
民力二曰慎選擇以祛民患三曰易種馬以求善產
四曰嚴黜罰以勵曠職五曰省繁文以革吏弊辛酉
畿輔災變復上䟽論時政一曰恤災傷二曰禁培尅
三曰治豪強四曰飭軍務五曰省供應六曰革監貪

七曰汰冗食八曰崇儉約 上皆勅所司罷行之尋
以疾在告益邃於學以 上方勵精圖治思所以裨
益政理者乃輯唐虞三代至漢唐宋事蹟附以論斷
著為稽古治要十卷凡奉天法祖教 太子處宗室
辨人才恤民困納諫諍節財用接臣下斥佛老重爵
賞慎刑辟御夷狄待戚屬一切政體之要無不畧備
其關於時政闕失者尤加意規諷焉癸亥疾愈復除
山東道監察御史首獻此書 上嘉諭畱備觀覽書
內載 祖宗列聖凡任官命將用刑行政必召輔弼
侍從之臣相與講論商確大學士楊士奇李賢輩所

記可考邇來勢分殊絕君臣相遇不過視朝數刻而已願乞亟接臣下或召對便殿或臨幸內閣于以察納忠言訪求治理 孝廟末年數顧問諸老畱心萬幾人以為此書之助都御史浮梁戴公烏程閔公重其器識凡諸道奏牘悉委詳正甲子復因畿輔災變率諸道上䟽論時政一曰裁革傳陞乞陞官員二曰禁約外戚之家怙寵肆橫三曰禁止鎮守內臣妄乞恩例四曰禁止權要之家私役軍匠五曰禁止鎮守內臣賄賂貪緣六曰罷黜方面有司不職官員七曰減徵各庫不急錢糧八曰禁止內臣多帶人役言其

剗切 上皆采納焉光祿少卿祝祥以附外戚得美官太常卿崔志端以道流累遷禮部尚書即率諸道論劾相繼罷去朝綱為之振肅未幾以學行選奉勅提督京畿學校遂慨然以敦士習育人材為已任持衡秉鑑模範整肅不少假借先是順德永平諸郡士鮮知學乃擇其秀穎者令有司資送至京從明師受業士風翕然多所造就至品定藝業高下尤精確一時出門下者往往宦業有聲至今士論稱學政得體有陳士賢張時敏二先生之風正德丙寅 武廟登極上䟽言嗣服之始當崇敬畏戒逸欲任耆碩屏

佞幸乞令儒臣考求唐宰相宋璟所上無逸圖宋孝宗所集敬天圖繕寫進呈以時省覽不報御史秩滿兩考部院考績並居上上冢宰許襄毅公慎選舉一歲中薦為大理寺丞者一按察副使者四皆不報戊辰冬出守四川馬湖未之任以格例去官時逆瑾用事縉紳守正不阿者輒被摧抑瑾黨劉宇入吏部其子為畿內縣令來謁不能曲意禮之宇以是憾遂為所傾瑾敗後兵部侍郎陳公玉黃公珂御史謝璟華珩沈霽交章論薦竟沮于格例不復起用時論惜之嘉靖庚寅以子夢圭任南京吏部郎中恭遇 郊祀

覃恩誥進階中憲大夫制詞有尼于群奸弗究厥用等語公之心跡亦庶乎臯白矣公生于成化辛卯八月八日以嘉靖甲午三月二十六日卒于正寢享年六十有四公自幼端慤不苟言動年十六周孺人棄背哀毀踰節入官後以親不逮養每過家必慟哭于墓事大父詹事公父御史公必盡孝敬居京師十餘年每得上賜之物及美衣珍味必緘以獻已已罷官後即舍南鑿池疊山以奉御史公日致賓客觴奕為樂不使以家務累其心故御史公得以優游頤養者垂十有二年而終處諸弟妹皆曲有恩意平居自

奉儉約食無兼味衣不重采至奉祭祀葺祠墓宴賓客必致腴潔歎歲常設粥以施饑民族黨有老而貧者以旁近廬舍居之時遺蔬米死不能葬者遺以棺衾鄉先達顧尚書墓為村民竊葬即白有司罪其人封築如故捐貲築巴城湖堤常熟崑山商旅往來皆利便之吳中田糧戶役弊滋久民受其害公屢以稽覈善法言于有司俾施行為民利其他濟人利物事多類此公自束髮入仕即以遠大自期乃竟忤時抑厭弗究厥用故自號桴齋以明志之不行也晚悅玉峰西巖之勝又自號西巖居士公存心制行表裡如

一嘗著慎獨箴朝夕觀省居家闔閭肅然雖家人父子間不妄笑語持已嚴毅方正凜不可犯燕居無事如臨大賓然其中實溫和樂易畧無町畦是故與之遊者皆敬而愛之性不好佚游罕與宴會迨晚年始與鄉縉紳結社歲時宴集為林泉勝事尤好接引後進故後進之士皆仰望其丰采焉公善教子嘗輯古今格言及往事可鑒戒者手錄以示俾知所趨向夢圭入官貽書誡勉以廉仁公勤四事諄懇累數百言其能義方若此臨終遺訓不作佛事祭葬悉遵朱子家禮且作詩示諸子及與親友訣可謂正終矣平生

嗜學至老不倦為文典實純正以理為主所著有靜
觀堂稿續稿讀史新知林下紀聞湖埂醉歌崑山志
玉峯文獻錄惇使夢林若干卷藏于家配龔氏封孺
人先卒加贈恭人繼楊氏封安人子男三夢圭江西
布政左叅議娶皇甫氏夢川府學生娶沈氏皆龔恭
人出夢毅聘魏氏側室刁氏出女三長適王可大次
適長洲陸任皆國子生次許嫁嘉定劉在縣學生孫
男三允熙允默允烈夢圭等卜以明年乙未某月某
日與龔恭人合塋于邑西北巴城村之舊塋公之出
處始終大節顯著有不可泯者同祖在公為中表弟
采擇而表章之幸甚

先考贈翰林院編脩文林郎求可府君行狀

先考諱 字世寶世家蘇之崑山宋侍御彥光之裔
五世祖諱德興高祖諱玉值元僭夏咸隱不仕曾祖
諱遜洪武甲子舉鄉貢乙丑登進士第丞瑞之上高
未幾 召入朝糾儀得憲度擢監察御史風裁卓立
時稱真御史祖諱復宣德庚戌進士釋褐為行人司
副擢監察御史秉操剛直不畏疆禦人皆憚之父諱

曰敏積學有聞貢入胄監授石門儒學訓導士多所
造就簡毅方介不苟容於時特為鄉里所重先考為
訓導公第三子母朱氏建康望族四川叅政貞弟也
先考生而穎敏博學好古恂恂雅飭與常人殊配吳
氏河南叅政遜菴公愈之長女遜菴公服宦中外先
考為贅壻委以家政遂棄舉子業為人明白簡諒弗
營私藏故公罔有內顧憂而成其廉居家上下得所
孝友允洽宗族鄉黨雍雍怡怡無間言中易而弗艱
外恭而弗弛趨義膺善弗移流俗與人交必誠必信
終始弗渝尤嗜施予周恤或有負者寔置弗責其取

息亦弗窮閭里悉感其惠詩詞典則清雅精篆隸妙
圖簣管皆極其趣於物無矯強無詭隨惟其可而已
故自號曰求可生於天順甲申三月十五日卒於弘
治己未八月十七日享年三十有六以正德丙寅葬
于邑東城之原生不肖男一人同祖娶方氏廣東按
察僉事鳳之女女一人適國子生郭受福孫男二人
法治孫女三人先考卒時不肖甫三齡賴母氏撫育
訓迪以克有今日榮焉靡瞻豈不痛哉嘉靖甲申聖
天子推恩逮下得贈先考官翰林院編脩文林郎以
同祖仕也嗚呼先考潛德弗耀遐筭弗臻至今鄉之

縉紳以及氓庶罔不誦而惜之則其為人可知矣而墓未有誌其何以傳永久而昭先緒也同祖用是懼謹述其行實大畧敢乞銘于執事者庶託以垂諸不朽焉

明故光祿大夫柱國少保兼太子太傅禮部尚書武英殿大學士贈太保謚文康顧公行實

公諱昂臣字九和別號未齋世為蘇州崑山人居雍里村力田多行義積德累善聞於鄉顧吳中四大姓之一三國時顧雍為江東名士其後別族散處益衍以昌元之世有千十二公者生德輝俱為萬戶德輝

生八子其季諱士恭公之高祖也曾祖諱大本祖諱良父諱恂號桂軒有隱德列祀鄉賢三世俱累贈光祿大夫柱國少保兼太子太傅禮部尚書武英殿大學士曾祖母蔡氏祖母吳氏嫡母吳氏生母楊氏俱累贈一品夫人公生而穎異警敏數歲即能屬文年十五提學御史山陰司馬公選為弟子負稍長學益進時公與兄子直潛同游邑庠皆負盛名時號三鳳而公年最少遠近稱之弘治辛酉舉應天鄉試乙丑會試南宮中式對大廷賜進士及第第一人時讀卷後孝宗閱公卷司禮臣侍側見卷首鄉貫竊

語曰又是崑山人孝宗顧謂曰彼處有諺云潮過夷
亭出狀元爾等所未知也蓋孝宗朝自庚戌至是
歲凡六開進士科而崑山掄魁者三人故一時傳以
為盛事也釋褐授翰林院脩撰七月丁父桂軒公憂
解職歸正德戊辰服闋克孝宗實錄纂脩官己巳
實錄成五月陞翰林院侍講賜銀幣十二月丁楊
夫人憂壬申服闋復除侍講甲戌廷試進士克受
卷官丙子五月陞左春坊左諭德兼翰林院侍讀八
月受命主順天鄉試時錢寧怙寵擅權令人特帖
子至公所乃一舉子姓名其所親也啗以榮利懼以

危言公不為動徐以數語折之使吏人翼以出寧亦
卒無以加害己邈武宗南巡賜麒麟服辛巳五月
今上入繼大統開文華講讀克經筵官賜銀幣
克日講官賜孔雀服三襲并克武宗實錄纂脩官
公在講筵音吐宣暢敷陳格沃終始有條上每傾
耳聽之嘉靖壬午正月郊祀禮成賜白鷗服三
月疏乞歸省祭上以講官故特命馳驛還鄉
賜銀幣仍令速返供職癸未疏乞養疾家居藏脩者
幾四年目擊東南利弊慨然欲起而振舉之丙戌冬
赴闕丁亥二月復除舊職仍克經筵日講官十

月更定學士制設翰林院學士一員講讀學士各二員遂首擢公為翰林院學士視篆仍充 經筵日講官并分番撰述 誥勅新命也十一月進講范浚心箴 上特嘉悅因 諭內閣云朕因十三日聽講官顧鼎臣解說心箴連日思味其意甚為正心之助昨自寫一篇并假為註釋復 諭曰前日聽講心箴深加愛尚朕自念上荷 天命為人君長當務學以致知待粗有領會之時再註視聽言動四箴後復 御製敬一箴 命於翰林院兩京國子監建敬一亭并前五箴俱勒石其中天下學校皆然 上聖學緝熙

德由天縱公答沃之助不可少也戊子八月三十日 上又諭輔臣曰朕惟洪範一書於帝王為治之大經大法實為親切講解委一人庶得接續貫暢欲令與臣通篇進講分段計日從容講解務使盡其所言以為朕為學求治之助九月八日 上又諭以公所講洪範盡心指解復慮詞語長多恐溫書之日有所失記少為刪去幾句從容講說以發明朕心使有所得直解揭帖內可撰寫精全朕得覽閱以求旨義為為治之助十月賜文獻通考四書大全書傳大全各一部閏十月二十日 上又諭曰今以寒月例暫免

經筵日講但朕以洪範未終篇故未循例暫免又曰
為學貴終始亦在乎篤行不在急迫與徒知也鼎臣
暫免朝參止入講殿進講庶得從容朕亦安聽或得
於領會矣十一月二十一日 上又諭以公進講洪
範終篇盡心指陳陞詹事府詹事仍兼翰林院學士
賜白金文綺又 諭稱公入仕有年故特進三品與
他講官不同蓋特恩云 上又諭公自進講以來忠
誠剴切於經傳多所發明甚為朕進學之助又 諭
以公學行素優侍講有年啓沃良多勤勞簡在特給
賜誥命已丑四月 命校勘續脩 大明會典公文

副總裁考定益損多公手筆云十二月 上奉安先
聖先師神位於文華殿之東室行釋菜禮特 命輔
臣及公等十臣瞻拜復 召至西室親承 天語期
勉賜茶而退繼頒 聖諭令十臣各敷陳經義關切
于君德治道者以獻公撰述中庸首章講義一篇進
呈 御覽大意言圖治者期臻於聖神功化之極不
安於小康也庚寅二月 耕藉禮成 賜雲鶴服七
月 命掌詹事府事辛卯十月陞禮部右侍郎兼翰
林院學士仍充 經筵日講官不妨部事先是八月
上命公專講洪範公極言皇極之用推休咎之徵

上意甚悅 命錄成冊帙以便 御覽 賜白金文
綺遂進秩焉 壬辰十月奉 特旨教庶吉士呂懷等
二十一人舊例教庶吉士率用翰林臣二員獨受
簡命自公始也 十二月陞吏部左侍郎掌詹事府事
兼官職任如故 癸巳三月上以釐正先師祀典再幸
太學 命公充分獻官時取孔頴孟三氏子孫至京
從幸陪祀陪祀公退而上言以為孔子之道為萬世
帝王法在當時門弟子唯曾參之傳獨得其宗觀大
學一書綱領條目昭然明白端可見矣而二千年以
來未有能表章之者我 皇上崇儒重道遠邁帝王





似茲曠典所宜肇舉伏乞命禮部詳議兼訪曾氏
子孫與孔顏孟三氏一體錄用則語道其甚上從
其請於是求得曾氏子孫名質粹者已亥歲吏部臣
具題令主祀事甲午考滿進勲級授資治尹廕孫謙
亨入冑監時大同軍士屢變執政者欲以大兵屠滅
公抗疏言叛者不過二三渠魁誅之則國法正而人
心安矣柰何戮及無辜使玉石俱焚乎上從其奏全
鎮生靈賴以獲免乙未三月孝靜毅皇后梓宮發
引禮部疏請命大學士一員題主上特以命公
是歲廷試進士克讀卷官舊制親賜策問皆內

侍傳捧是年特命公捧下仍勅著為例上復御文華殿親試選進士趙貞吉等三十人改庶吉士內閣疏請簡命主教事者上特擢公禮部尚書兼翰林院學士仍掌詹事府事教庶吉士公具疏懇辭上諭之曰朕以卿講幄舊臣効勞有年特茲加秩專委教讀為國儲材宜從朕命公就職程率訓勵模範肅然冀得真材以稱上意七月公有疾二十三日上賜手札云前因秋享祖考卿以疾奏別委捧主朕意以卿微疾耳昨聞之李輔臣謂猶未愈卿受命教習吉士此非小託宜善加調理可用心教

之以副朕任用焉二十六日復賜手札問疾并手製藥一劑賜公諭意諄諄恩眷有加丙申三月從上幸山陵賜麟服及銀獸繡囊諸物四月賜飛魚服二十七日召見行宮時公教庶吉士因論進學之方作文之法教育人材之要及言宋史浩繁宜加刪削以備御覽上意嘉悅議脩飭七陵并豫建壽宮命公往祭天壽山之神八月上遣祀先師孔子九廟成禮部疏請定各廟特享太廟祫享太享諸樂章上特命公專撰九月重錄累朝寶訓實錄成公為同經理官特加太子太保賜宴於謹

身殿仍賜銀幣鞍馬十月議遷 孝肅 孝穆 孝
惠三后神主奉安陵殿特命公題主丁酉七月公上
疏言東南財賦重地積弊甚多為民蠹害遂條陳四
事一暫議差官總理二查理田糧舊額三催徵歲辦
錢糧四查復預備倉糧皆究極利弊纖悉不遺且曰
所謂更化善治者非作聰明以變亂舊章也法文弊
滋務在整飭振舉以復其舊焉耳公蓋恐行之者不
得其意變亂紛更反為民害故言之惓惓若此公於
丁亥歲嘗以四事建言于 朝雖議舉行而有所虛
應故事因循廢閣至是復有是奏上特命戶部臣速

行之加嚴切焉是歲京師大水毀民居壓死者無數
又天下郡國多被水災而湖廣尤甚公疏言脩人事
以格天心紓民困以消隱禍極論傷痍困窮之狀乞
請優恤京師被災之家其湖廣承天府乃 皇上受
命龍飛之地災沴重大神人震驚宜遣大臣馳往賑
救遺黎埋藏餓殍而天下郡國 勅撫按憲臣嚴督
有司奉行德意加惠存亡庶邦本固而天心可回矣
上嘉納焉戊戌二月奉 命充會試主考官時士子
皆習為奇險之文靡然成風好尚詭異禮部疏言其
事公持文衡崇雅黜浮文體大正時論躋之三月

廷試進士克讀卷宮公簡在 帝心自己丑歲即擬
進輔永嘉嘗以密疏沮之故久未登用是歲八月十
七日 上御平臺 勅吏部宣諭公以太子太保禮
部尚書兼文淵閣大學士入內閣辦事公疏辭 上
諭曰卿講讀舊臣才學茂著朕心簡在內閣重任特
茲委用宜盡心輔贊以副朕意公既大拜與輔臣序
卷李公桂洲夏公同心輔政 上倚任焉重九日
賜上尊珍饌二十五日 駕幸山陵秋祭公扈蹕往
還十一月朔待 駕詣 園丘恭上 皇天冊表復
詣 太廟恭上冊寶 賜銀幣召對便殿復論史事

欲集儒臣類纂脩葺茸公奏請 皇上宜如漢宣帝時
開白虎觀召諸儒講論五經同異親稱制誥決斯文
之幸也 上曰卿言甚合朕意朕思作此等事勝於
他務也二十六日 聖母章聖皇太后遣和 上命
輔臣引醫入視 賜銀幣未幾聖母崩十二月侍駕
幸山陵相度陵園 上駐蹕紅門手賜禦寒首衣途
次賜食器銀杓諸品物是日昭聖皇太后遣中使至
山陵問 上起居以輔臣扈從勤勞各 賜銀幣已
亥元日 賜上尊珍饌與勲輔諸臣被召至 玄極
寶殿觀燈 賜酒饌二十日 上於平臺勅吏部以

昨冬祇薦 皇天冊表命使諸臣虔恭贊佐宜賜殊
嘉加公少保兼太子太傅改 武英殿大學士尚書
如故二十九日 召入內啓祥宮朝見 皇太子及
禧王 景王 賜銀幣銀花二月朔日始冊立 皇
太子及封 二王 詔 賜銀幣新鈔時 上卜
以是月十六日車駕南幸承天 命元輔夏公扈蹕
留公居守京師初八日 賜牙刻留守關防一顆
聖諭畧曰朕將躬詣 顯陵為 親營計吉地日以
期矣特命卿同錚總守北京佐太子代理之重卿職
也宜協心護守一應題奏以關防用使密切要務重

封印記庶別詐偽昨論宋事朕見文人每私檜為忠
卿直以為姦可見卿之公讜也朕此行非有導之者
卿但盡誠守國十三日 召見文華殿面計南巡程
途日行次序手授 几筵祭文及記事一本 賜蟒
衣四襲金寶帶一圍 上以諸邊重地密邇京師欲
遣大臣行邊公曰須重臣乃可 上曰翟鑾何如公
頓首曰 聖諭甚當遂起公於家即拜行邊使奉
勅巡歷九邊是日公䟽以為 聖駕南巡伏蒙 眷
命留臣居守京師輔贊機政臣受命以來早夜兢惕
不遑寧處 責任至重切慮才力綿薄弗克負荷以

傷皇上知人之明私憂過計不容隱默所有合行事
宜開坐七事上呈 聖覽七事悉係內外軍國機務
內一節云 皇太子正位東宮文武官例該朔望朝
參 上曰可怠者薄戒之又一節云內閣於各衙門
舊不統攝臣奉 命畱守事體重大乞降 明旨順
天府五城御史兵馬巡捕叅將把總聽臣約束庶有
體統便於行事 上曰是着暫此悉聽統束其餘事
上皆手批可其奏且諭之曰朕祇為 顯陵南往躬
視土地畱守重託簡付于卿宜夙夜慎恭以匡儲政
條奏各有批示卿其欽之十四日 上召見平臺手

授御筆面勅曰朕恭以二親妥靈之地日夜思念心
甚不寧必親見乃安此必非慢遊也特以畱守至託
簡付于卿宜朝夕慎恭輔贊儲政庶朕心安于行卿
其欽哉慎之又面諭曰朕用卿晚卿受重託凡各衙
門事務皆得預聞官員有不職廢事者重則奏聞區
處輕則取令旨懲戒公奏曰九重密旨人不得聞乞
降 綸音百官悉知警戒臣亦得以行所無事矣
上可其請宣諭百司是日特 勅諭公曰朕茲巡幸
承天恭視顯陵 車駕往回動歷數月昨已冊立東
宮命之監國特畱卿贊輔協同文武重臣居守內自

禁掖外而都城遠及邊陲并大小百司庶務悉以付
卿卿宜遵承朕命應啟請者擬請令旨施行應聞奏
者馳奏行在定奪其有密切緊重事情宜用欽賜印
記來聞卿講幄舊臣又懷經濟朕茲重寄宜欽承之
哉十五日 召見 文華殿賜 皇考御書扁二面
一曰日新又新一曰無極太極又 賜銀圖書一顆
文曰經緯首選十六日 車駕發京師公奉 命居
守整飭紀綱發撻姦伏勲貴豪右斂手以避輦轂之
下肅然清夷屢差錦衣舍人齎 皇太子問 安䟽
及公留守問安密䟽詣行在凡內外軍國機務無不

纖悉奏聞三月二十五日 上在承天以 山陵相
度事宜手諭特先示公一人并 賜御製詩歌三篇
且 諭以衛輝失戒令錄詔勅諸文馳進公䟽謝畧
曰臣仰知聖孝純切諦視 山陵已定大事 聖子
神孫億萬世無疆之福基於此矣臣自忭慰未敢宣
洩至若 聖情悲喜露於述作格律高古思致真切
直追典謨訓誥之作信非漢唐以下秉德好文之主
所能窺測其萬一也四月十五日 車駕回京公率
百官奉迎致詞瞻拜 上慰勞之公居守時律下太
嚴不少假借言者至公引罪辭避 上特慰諭焉時

上 草勅事督責輔臣言公頓首切諫 上為之霽
威五月公以累朝典故文籍俱貯內閣制勅房翻閱
歲久文字漫滅前後脫落二月間 召對平臺奏乞
令中書謄寫進呈 聖覽為萬世法程 上俞允之至
是成二十餘冊上之餘未及就時 皇妣南附 顯
陵舟行遣公至通州題主十二日 賜御批寶璽
聖製詩歌一函皆南巡特作也十九日 特恩賜天
靈茶笋六月公以疾在告 上遣醫視疾中官齋賜
羊豕酒米諸物閏七月朔祀永明後殿先聖先師堂
上命公代拜十五日一品考滿復職 上遣中官齋

賜羊酒新鈔八月南薰殿書 大祖 成祖 睿宗
三聖玉冊寶 賜銀幣九月 賜白花玉帶麒麟服
三襲二十五日 召至 皇極閣視書 皇天玉冊
表賜銀幣二十八日扈從 聖駕親閱壽宮及奉安
成祖陵碑賜銀幣諸物庚子上元日同勲輔禮臣六
人被 召至西苑觀二聖几筵 賜貂皮新製煖耳
三月初八日欽奉 聖諭感於鬼神公具對解疑及
極言上宜視朝 上再賜手札畧云朕自嘉靖十年
因患重咳遂不視朝朕思之朝會不如巡狩為甚也
云云公大驚遂不敢復言一時 君臣相與誠信流

通雖家人父子不是過也五月初三日以夏至有事
於方澤 命公視牲郊壇感寒病噎請告 上遣醫
視疾仍 命中使賜食品如前時公卧病日久不瘥
上屢遣中使齎手札賜問越三月公以例上疏辭俸
上復予告給俸如故八月病甚公懇乞歸休 上温
旨慰留九月十六日公疾少間伏枕呼家孫謙亨語
之曰吾受 皇上厚恩圖畢力報稱今殆不可起矣
吾志之未及為者爾等記之於是口占五言詩一章
云天下幾大事初意勦力為流景若逝波世路况多
岐天造既難明世事不可期後來有傑士一一為為

之為國開太平千載壯鴻基復命書五事於後一曰
復鹽法以脩邊計二曰興南北直隸山東河南水利
開稻田樹蓄積以省漕運三曰經理宣府大同二鎮
薊州遼東山西邊備以保障京師陵寢四曰復河套
經理甘肅以保全陝五曰經理松潘以保全蜀公愛
君憂 國之心惓惓不忘若此十月初五日病革乃
力疾陳遺疏感激 聖恩勸 上親賢圖治加意元
元頤養 聖躬茂登萬壽以貽 聖子神孫無疆之
業以慰天下臣民仰望之心 上荅曰覽卿力疾陳
奏足見忠愛朕已具悉初六日午時卒於正寢訃聞

上為憫悼輟朝一日勅禮部舉恤典以聞賜祭九壇
仍命工部差主事王健營塋贈太保謚文康公身長
七尺虬髯虎視姿貌竒偉風神峻拔自束髮為舉子
時即有大志初名今後更今諱其志也果以掄魁發
身位登宰輔文章功業卓冠一時殆不負所學矣公
性亮直不諧於俗遇事輒敢言人雖敬而畏之亦以
是見沮賴為 聖主所知卒能保全晚歲始入政府
息禮優渥 賜賚頗蕃公亦竭忠報稱故受 命居
守正身攝下不避嫌怨以克荷負蓋輔政比二載而
卒公可謂社稷臣矣公居家篤於孝友父桂軒生公

時年已五十有七公既長以恒恐不待養每夜焚香祝
天願減已年以益父壽桂軒公果登耄耄公狀元及
第得報後不二月而卒卒如其願云公少不獲於伯
兄事之未嘗失禮待宗族皆有恩義與人交洞見肺
腑雖布衣雅敬如新公儻大度喜施予所得俸賜
見貧乏者輒以周之為人外剛嚴而內寬和禮賢樂
善推誠布公獎引寒士孜孜不倦自公之暇屬奕咏
歌寄興蕭遠平居不廢絲竹所至室宇煥然雖紛華
之中未嘗不澹然自得無所係累也公生長東南念
財賦日蠹為 國大患故三舉奏又以故鄉崑山為

東南要地財賦上供者四十餘萬濱海數受警無城郭可守何以保民乃言於撫按憲臣疏請凡沿海縣邑無城者令有司次第修葺而崑山最為要害首議興築三年而城成民用又安百世之利公之功也公生於成化癸巳二月二十五日至是卒享年六十有八配朱氏累封一品夫人有賢行公白首相敬如賓長子履方夫人所出也鄉貢進士娶梁氏次履祥娶周氏側室薛氏出次履貞順天府學生移廕入國學娶陳氏次某尚幼皆庶出女二人皆夫人出長適國子生歸本次適國子生朱端禧早寡孫男二人長即

謙亨以公廕為尚寶司丞娶陸氏次謙益娶周氏孫女二人王世業周允懷其壻也曾孫男四人俱幼公所著詩文應制諸作奏議若干卷藏于家公之卒也上遣禮部主事董子義護喪南還履方等將卜以某年某月某日葬公于潭山之原禮也茲謹詮次其履始終乞狀其行求誌銘勒石以垂不朽望賜採錄幸甚

先妣封太孺人吳氏行實

先妣姓吳氏諱世家蘇之崑山曾祖考諱公式贈行在刑部主事祖考諱凱禮部主事貞介絕俗有孝

行既歿鄉人私謚為貞孝先生考諱愈河南布政使
司右叅政廉慎剛毅才猷敏達歷官中外所至有聲
謝政二十餘年其操履終始不渝鄉黨以為儀表別
號遜菴妣夏氏封安人太常卿景之女夏安人無子
生三女先妣居長欲嬪之在室於是遜菴公為擇館
甥得先君喜曰是世有令人後必昌公時任南京刑
部主事子皆幼乃諉以家政先君廢舉子業以理之
先妣佐于室筭纒沃盥罔有違僭供燕饗祀罔有簡
黷宗黨僕御罔有乖越閨門之間儼如賓客舅姑在
堂饋問以時雖弗朝夕侍而安其孝夏安人捐館時

公出守叙州先妣敦大事必誠必信無遺憾故遜菴
公服宦于外迨先君歿無內顧憂先君一旦嬰危疾
先妣屏禱禱脫簪珥極力調治疾竟弗起哀號盡墮
至不欲生首蒯絢裳僇然在疚矢死弗替遺男女各
一人男即不肖方在孩提女年纔十一齡笄笄子立
依倚外氏先妣晝則哭泣夜則紡績撫育遺孤瞿瞿
焉弗知有寒暑也凡親族往來餽遺一切謝絕足不
踰壺闕如是者數年畢力營塋具始克襄事暨歸女
于長洲郭受福今國子生遵先君治命也不肖齟齬
有知親受句讀始遣就傅蚤莫督課誨以古之人若

何而為賢為可法若何而為愚為可戒曰冀而蚤有
成立以慰而父於幽冥也不肖稍長勗以進取尤飭
勵敦懇每試錄出輒手抄其文俾為法程師友講習
苟有規益未始惜費不肖幼多疾瀕死者數先妣憂
皇至忘食寢泣曰吾命與俱也藥石祈眡苟可獲愈
又未始惜費不肖甫弱冠游校則泣奠以告于先君
曰君之子已階進身矣娶婦踰年而得孫則喜以告
于先君曰君之子已有胤嗣矣遐菴公出分諸子祈
先妣居未嘗計贏虧他物在先妣所者則以迓諸公
曰苟非吾所當得雖一毫莫取也其義如此先妣素

溫和治家不尚嚴刻或慮失之寬曰吾未亡人不當
如是耶故未嘗拮据胼胝而事靡有隳廢凡所經畫
咸得其宜憂勞相仍髮為蚤白歲時薄田所入女紅
所需雖無贏貲而能樽節量制婚嫁往來皆所取給
每少儲蓄以備緩急撤自奉以供賓客且不使不肖
知營業事恐志為所遷又時語以稼穡之難恐遂驕
佚也如是者又數年不肖以正德己卯領應天鄉薦
明年庚辰會試中式辛巳登第改翰林庶吉士先妣
每得音問則必以告于先君曰君之子已幸而舉進
士官禁近矣嘉靖壬午迎養京邸是歲不肖授館職

癸未承 制冊封 德藩奉先妣以歸甲申值 恩
詔得贈先考翰林院編修文林郎封先妣太孺人不
肖竣事北上太孺人以遯菴公老疾弗忍舍也弗能
從不肖陳情願乞終養不報再疏得歸省踰年而遯
菴公謝世時例方嚴弗遑寧處乃歲丁亥赴 闕復
奉以往竊升斗以共朝夕靳遐筭未艾也不幸得疾
迨仲秋痺癘彌痼不肖延療醫藥殫竭心力衣不鮮
帶者五閱月每夜露禱求以身代弗獲戊子正月十
九日疾甚劇語不肖曰吾病在膏肓必不能愈汝三
歲而孤幸已成立吾可以見而父於地下矣顧吾所

念者汝素無父兄之力成之艱難今又鮮助柰何柰
何不肖哀泣太孺人嘆曰吾聞之死生有命吾命在
天哀泣何為汝立身須要端謹治家須要勤儉誨而
子讀書以毋墜先業吾死亦瞑目矣暨處家事井井
不紊且曰今與汝永訣毋忘吾言也遂不復言至二
十一日寅時屬纊生於成化乙酉十二月十四日後
先君二十九年而卒享年六十有四嗚呼縞懷深息
昊天罔極豈不痛哉豈不痛哉先太孺人性慈祥仁
恕亶允樂善憫窮賑乏不啻若已口不言人過且惡
聞夫人之議人者友愛諸弟妹尤至孫法治始生即

實諸懷抱訓之若訓不肖時孫女三人皆鍾愛而未嘗姑息曰吾慮其習於驕盈以貽他門患也平居莊重端恪履如珮玉無遽色無失言勤而不懈儉而無侈衣每敝壞輒補綴服之曰吾思工織之難成也故一衣有終身不棄者好觀書史不釋手皆能通六大理義又能以善惡語諸人俾之勸懲族黨婦女咸取為則凡內外先世典故言之如指諸掌先君手澤什襲藏之雖丘楮不遺故不肖得以考見往事實資焉遜菴公居家嚴厲子孫侍側皆拱立屏息莫敢仰視而與先太孺人論議輒和懌開霽事多所咨益其見重

如此太孺人居京師每覩邸報見於欣戚必引傳古今成敗至疾篤始不欲觀故不肖忤時遭斥太孺人臨終亦不復知豈不痛哉豈不痛哉不肖男同祖奉柩歸自京師卜以己丑十一月庚申合塋于先考府君之塋禮也嗚呼先太孺人貞規靜操無忝於圖箴慈範徽音著聞於宗黨柰何天不假年奄忽棄背俎豆之訓在耳風木之感無及哀痛分崩苟存視息圖所以彰令儀詔世武者謹披淚撰述伏乞大人先生立言銘石以垂不朽幸甚幸甚

河南叅政遜菴吳公行蹟

公姓吳諱愈字惟謙別號遯菴世居蘇崑山之積善鄉曾祖諱子才祖諱公式贈刑部雲南清吏司主事父諱凱歷任禮部主客清吏司主事號冰蘖道人行已端方一介不尚事母盡孝既歿鄉人私謚為貞孝先生祀于里社前母沈氏贈安人繼母沈氏母陳氏贈安人

右家系

成化戊子舉應天鄉試乙未謝遷榜進士出身觀政兵曹十四年三月授南京刑部廣東清吏司主事十五年丁內艱服闋二十年二月復除前職弘治元年正月陞本部山東清吏司署員外郎事主事六月陞

本部雲南清吏司署郎中事主事兩考俱稱職二年本部左侍郎阮公勤以廣東司詞訟浩繁湏才能以理特奏調公三年二月實授本司郎中四年十一月陞四川叙州府知府十六年正月陞河南布政使司右叅政十七年致仕進階嘉議大夫

右歷任

公自幼卓異有大志太常卿夏公仲昭見而竒之遂妻以女弱冠遊鄉校聲稱籍然衣冠言動循循雅飭守冰蘖庭訓毋敢逸登進士有達官要之見許以要職公謝弗往將就選乃私念曰先君嘗為刑曹屬每嘆讞獄之難謂愈曰若他日幸毋作刑官也得如先

君志足矣未幾選南京刑部廣東司主事乃益兢畏弗敢縱撓行之以果斷察之以明知濟之以仁恕案無留牘獄無滯囚一時稱老吏者皆歎服焉公丁內艱服未闋南京六司寇張公瑄移咨冢宰欲復除公南曹用以自輔其見重如此歷陞廣東司郎中諸司章奏必經公詳定乃敢進部有大獄咸倚以決衆務紛委應之矍然各中肯綮他人所不堪而公舉之有餘未嘗言勞守備太監蔣琮暴橫非法憚公欲致公往公不為屈琮為法司叅劾知公主之盛怒遣二武弁謂公曰好好作官公曰使吾作好官吾力止此使

我不作好官吾亦不能改節也卒亦無以加於公他司之官有受賂者司寇以詢公公曰此或誣耳其人聞之詣公謝且長跪求庇公辭焉及見司寇則力爲之請乃解弘治初 詔兩京大臣察吏之可布政按察者以聞大司寇鄭公時舉公心術端謹才行超卓堪掌風紀疏遣上而叙州之 命下矣時論咸惜之公曰領郡重任也苟可以宣力 國家者吾安所計哉叙古夔國民夷雜居最號難治公下車詢訪民瘼察知夷情乃以厚俗節財立教崇信爲已任久之威德著被民庶樂業雖夷獠素稱犷悍難制者亦皆帖

然終公之任弗敢爲亂興學校明禮義人才彬彬輩
出深箐遠夷俱願遣子入學俗好訟公推鞫明允無
敢干以私抑強恤弱人皆稱平慶符盜白晝劫縣治
令捕得二十七人下獄皆已誣服公慮有冤濫乃詣
縣辨審得釋者二十五人未幾真盜果獲人以是服
其明慎馬湖知府土酋安鰲克暴淫害事聞 命撫
巡計擒之有司戰慄莫敢誰何乃以委公公曰毋煩
兵議者堅欲用兵兵果無功鰲宵遁糾諸夷爲亂公
曰此無能爲也乃庶知其迹使勇士就縛之人問公
曰鰲勢甚大而公終始輕之而卒成功何也公曰罪

止於鰲耳若用兵無全族矣及其遁去則一勇士力
耳何能爲乎其府印爲他酋所攘公陳說利害乃懼
以獻馬湖遂改置流官一方獲安皆公之功也而賞
卒不及公未嘗矜伐焉貴州都勻蠻夷猖獗時議兵
興轉餉莫叙爲急公夙夜精理區畫得宜千里餽糧
民不知勞既而南服平定論功行賞 賜以錦綺楮
幣弘治戊午 命建藩府於叙議者謂當遷三百餘
家以江外地居之公曰藩以城立城以人守徙之江
外城孰爲守乃力請於上官度近地仍給工費衆惟
如歸境內脩築塘堰廣植桑桐以興民利府有博濟

縣有預備二倉以俟荒歉歲饑公賑濟有方前後活
十餘萬人長珙疫癘大作夷民不知醫爭事祈禱公
嚴革以法開諭以理給藥療治賴以無死者五百餘
人邊儲數爲豪猾所侵假公行部督責宿廨中起如
廁一人自草間出叩頭置金一囊於地公叱之亡去
乃以金貯庫大索遂得其人實豪滑者所使即按以
法追償殆盡邊儲賴以有備云公在郡招撫流徙墾
闢荒蕪戶口歲增四封無不毛之土且律已甚嚴無
毫髮苟且蒞政三考民愛之如父母敬之如神明雖
古之良吏何以加諸巡撫都御史馮公俊巡按御史

崇公華曾公祿蕭公柯等先後上其政績陞河南右
叅政公益勵初志凡屯田錢穀積弊妨民者咸爲祛
洗政聲肅然先是藩府匿屯田若干御史某往理其
事不服公片言折之立辨中使劉朗守河南日嘗燕
客與公象戲公再勝之同列躡公屣公不顧又勝之
同列出曰得無甚乎公曰吾以杜其後也其不惡而
嚴如此中外冀公大用而在任踰年未殫厥施偶因
流言即抗疏歸休以安義命公之爲人秉性剛直操
履堅定不立異以爲高不詭隨以要譽好面折人過
以是不苟容于時既歸乃歛迹韜彩脫畧世故於所

居營燕翼樓集二三者舊為文會嘯咏終日士林高
之吏茲土者有疑獄大政必就其廬而問焉鄉之後
生必脩容而後敢見肅然敬畏如臨父師公平居夏
不扇冬不爐起必黎明秉燭中櫛處家嚴整有法諸
子侍立語不敢懈御僕從威而有息親朋過從未嘗
言倦雖甚卑幼者亦待之以禮畧無凌倨之色歲時
內外子姓羅拜堂下每遇誕日捧觴稱壽邑里士夫
以次咸集人皆榮之與人語援引今古條理精密疊
疊不怠滿座傾聽皆克然有得也出入舟輿挽卒不
取給於官非公事足不及縣庭租稅之入先以輸官

羨餘以供私用讀書務大義不喜為詞人習然過目
輒不忘弱冠時詣太常夏公所壁縣武功伯文讀一
過太常公曰子稱敏慧能憶之乎公曰試書之不遺
一字公嘗論事誦其故牘雖數十年如指諸掌其疆
識如此年幾八十不操几杖齒不毀髮不盡白媵婢
猶孕以育耳聰目明猶能作細字公可謂全福矣

右行蹟

公生於正統癸亥八月初一日卒於嘉靖丙戌五月
十九日享年八十有四

右生卒

公配夏氏封安人弘治丙辰卒生三女長贅贈翰林

院編脩王 封太孺人次適前進士贈大理寺評事
陸伸次適翰林院待詔文徵明夏安人有賢行無子
置側室姚氏趙氏子男四人東浦江縣丞先公卒娶
周氏繼娶姚氏南太學生為公仲兄靜菴嗣娶鄭氏
繼娶袁氏西天守中太學生娶楊氏皆姚氏出女二
人長適陸潔次適朱希韓贈禮部侍郎文之子皆趙
氏出許氏生一女尚幼孫男四人詩太學生娶王氏
訪娶張氏許天誌聘俞氏孫女三人長適錢鶴徵次
適魏紀廣東副使校之子也一尚幼曾孫男三人女
三人

右子孫



五龍山人集卷之十

祭文

祭霍渭厓文

嗚呼某嘗聞之白頭如新傾蓋如故蓋言久要之難
 而相知者之不易得也寂寥千載寧謂其復見於今
 日耶歲在辛巳公為職方某時竊幸登第雖夙慕公
 未嘗有介紹之識特於班行一舉手相揖而已丁亥
 之冬某獲罪當道不旋踵被斥伏竄草野却掃屏跡
 自謂廢棄餘生不復敢與聞當世之黜陟公方表儀

明崑山王同祖繩武父著



國家圖書館 NATIONAL CENTRAL LIBRARY, TAIWAN, R.O.C.



舊京進秩宗伯每蒙寄聲啓我茅塞某恍然不知其所從以爲誤知者抑亦公之盛德也未幾公特疏薦賢某名列其側某雖淺劣不足以當公之扶植然公實無所爲而爲大臣之義庶幾乎爲國也已亥之春某復以薦得復館職公膺召赴闕某始獲及門瞻拜親炙公禮遇勤倦時加誘掖嘗謁公晤語公未嘗不倒屣出迎談議移日公忠憤所發持論過激四座錯愕莫敢出息某以微詞折疑辯難起櫻鋒鏑謂存大體輒獻忠益公特優容稍降詞色公之所以待某者無亦可謂極矣嗚呼此特某一人之私至在公之忠

亮不回高明柔克上結聖主之知下為縉紳之則誠所謂今之偉人古之遺直也天不憖遺日中遽異人之云亡亦孔之盡醑酒陳詞聊寫衷臆公其有靈洋洋來格尚嚮

祭文康顧公文

維公直諒忠貞為國柱石雍容廟廊維補衮職偉烈豐功尤在監國聖眷日隆公亦畢力公之云亡係國重輕朝野痛惜寔惟老成恩榮終始遭際休明福履若公莫之與京公昔有言齎志以卒平虜復套萬世長策蠢茲天驕猖獗已極祖獨抗言以狄攻狄時議

異同莫知所終維帝神武天啓厥衷有禪社稷我公之功臨風遣奠并告朴忠尚嚮

祭太夫人張母胡氏文

同祖聞之古之人之於友也相親如兄弟不待分形連氣而然也傳曰十年以長則兄事之以友為兄弟也書曰友于兄弟以兄弟友也皆天理人倫之極也同祖之於太夫人之子張子也友也兄弟也故太夫人於同祖有母道焉今聞太夫人之違養也能不重哀以痛乎竊聞之太夫人之儀刑厥家也蘊粹體淑柔德內克秉則垂範貞規表示其為婦而相夫也克

以順正暨其為母而撫諸孤也教以義方是則太夫人之所以儀刑厥家也宜其有張子為之子也同祖於張子同年友也同館友也兄弟也登金門上玉堂一言一行相砥礪一詞一章相琢磨也商確古今馳騁上下相辯難可否也入則對案而食出則聯騎而行其相與之篤非一日也知張子之賢之有自也同祖待罪畎畝張子不以為棄物以為猶有可試者若鮑叔之於管仲也嘗汲汲焉必欲拔泥塗而寘之霄漢同祖固鄙人也無以自効然而張子之愛之猶兄弟也古之人之於友也不是過也同祖於是益知張

子之賢之有自也嗚呼太夫人可謂能毋矣張子方
晉陟清華佇叅密勿太夫人雍容在堂懋享多福
龍章有赫燕喜式共將未涯也是非獨為張子之慶
同祖亦與有幸焉柰何未遂登堂之拜遽聞捐館之
音豈不重哀以痛哉嗚呼塋祭以禮 聖朝之卹典
有加著存不忘孝子之私心亦盡斯固太夫人之所
以瞑目於重泉者也同祖爰羞行潦之誠敢致生芻
之奠幽靈如在尚其嚮之

祭張德之文

嗚呼德之人孰不死也耶死孰不可傷也耶故有壽

考令終者則返其窟宅翁焉全歸乃求天地而與藏
亦有守死善道者則寧舍生以取義耿耿乎與日月
同其光嗚呼德之爾甫年弱冠早植厥家駸駸乎驥
嘗其足而蘭茁其芽爾壽則未遐也養高山丘志靡
纓組衍衍乎鴻冥于遠而鵬戢其羽爾用則未階也
爾何爲乎夭其生而使夫人之莫知也爾何爲乎遺
爾老母弱妻與爾兄弟之悲也吾與爾兄聯跡金閨
同聲玉署朝夕與聞知爾最著爾性孝友篤于天倫
爾其勤勞自同齊民夙敏習書長工屬文卒不克施
以揚清芬豈非人有所不得乎天而天有所靳乎人

也哉嗚呼德之爾尚無嗣爾靈曷歆爾兄爾思泫泫
長喑吾視爾兄同捫厥心寄哀于茲南山惟岑尚嚮

祭郡侯東谷童公文

維公英資表傑粹性含章齟齬朗徹丰神激揚秀徵
雲夢芳孽沅湘起家以素觀國之光茲可謂齊輝於
荆玉而比潔於秋霜者矣爾其昂霄逸群應宿出宰
五教允洽三事毋改感雒田之雉猶恭理乎中牟穢
游釜之鱗同遂清平渤海是宜其端芝之應翼翼乎
效靈其棠之陰萋萋乎流彩也列職即署分總餉司
河濟搶攘士馬需資飛輓雲集轉饋星馳事克以濟

民不知疲是宜其薦剡旌書之上交映於闕廷寶幣
銀章之賚特沐乎恩私也迨乎東交塞帷南粵建轂
兇革柔綏惠敷威肅惟守之良斯民之牧方期顯躋
夫要樞乃炳先幾乎止足脫簪組其如遺搢椒蘭於
中谷邈漢濱之遺風繫桑苧之芳躅是真離榮去知
矯跡於林臯遠厲遐狎遊情於鴻鵠者也公之優游
寔履康衢蓋期頤之可致而何有乎憂虞胡遽奄忽
爰即冥途悼哲人之云亡溘長逝而永徂公則有子
摘藻詞林馳典是請曰俞 帝忱錫爾錦誥煥厥綸
音茲可以垂榮於不朽而瞑目以長歎也某等永懷

令儀潛格幽壤式肴漿以陳詞儼精靈其昭爽尚嚮
祭外祖遯翁吳大叅文

愍余小子早歲失怙母氏劬勞鞠于公所齒齒有知
乃遣就傅扶林唯諾靡間早暮惟時童蒙昏懵寐寤
公曰勉之爾有世祚不絕如綫爾宜自樹淬礪諄諄
弗克是懼陽元蜚聲詎敢自附弱冠游校竊鄙純粹
借計策名幸踵故步濫竽金馬聯纓王鷲公實喜慰
傳我尺素惟忠惟誠懇懇誨諭小子服膺罔敢誕鶩
公登耄年日晏懷慮省覲言還公已不豫奄歸帝鄉
箕尾叅馭嗚呼蒼天何奪公遽涕泗交頤叩呼曷顧

公實考終懋享多結我心曷窮期頤是赴繄惟我公
敬歷津路執法無違晉都粉署遺愛有徵捷為黎庶
旬宣中州厥施未既愴夫媒孽蛾眉見妬明哲惟幾
優游斯裕鄉邦儀刑縉紳矩度家庭肅雍嗃嗃馬瞿瞿
公則長往委形猶寓豈惟厥家人失陶鑄日居月諸
屢逮霜露爰卜今辰窀穸永固凱風寒泉實增痛慕
音容邈然杖屨如故哭奠椒漿公其歆顧

祭守溪王閣老文

曰嗚呼維公冲和靈賦穎異夙成鍾嵩嶽之秀萃吳
會之英紛體全乎碩德繫休媿乎鴻聲早際全盛儲

輔清華編纂雙言校勒成一家濟濟乎天祿石渠之彥
炳炳乎蘭臺金匱之葩歷階黃扉端揆養度規箴丹
泉忠藎畢露睹密勿以論思式雍容以成務蓋其豐
材巨噐致乎玉鉉之勝偉望宏猷宜夫金甌之注也
及乎解組廊廟濯纓滄淵知稱明哲吉享周旋洞庭
笠澤托迹風煙俯仰今古驅馳後先遺榮去利幾十
餘年迨于今上建極嗣服錄舊崇勲恩禮優渥西洛
耆英東山雅泚曷不勲遺遽爾捐感嗚呼公之顯庸
也為國家之楨公之退隱也為鄉邦之刑公之德業
也昭乎昇彝之重公之文章也鏗乎金石之聲是皆
足以傳後而永世夫豈不裕然享乎四朝殊遇之榮
也哉某等鄉之後進咸仰遺風竒莫一尊實感厥秉
尚嚮

祭文康顧公文

嗚呼在昔虞廷道重諮詢夔龍布列為臣為隣暨在
周室詩稱降神維蕃維翰生甫及申百世繼作代不
乏人天佑 皇祚篤啓貞臣公自束髮即有竒志卓
犖激昂蜚聲顛顛入對彤庭名魁多士玉署清華儲
養大噐今 上御極首選經幃開陳啓沃恒謹幾微
心箴洪範大道依歸細氈廣夏咫尺 天威上每傾

聽旰食宵衣遜志典學厥功實希簡在 帝心優渥
禮眷荐歷孤卿遂登台鉉召對平臺訐謨便殿都俞
吁咈千古再見已亥二月 駕幸承天命公居守寄
以重權廼輔 皇儲經綸日宣令行禁止京師肅然
上實委任公亦克肩豐功偉烈耀後光前古社稷臣
公無媿焉維公舊德雍容廊廟弼亮和調期臻治効
上方倚毗爰資輔導俄焉嬰疾隆恩予告賜膳遣醫
相屬於道宸翰溫綸勤惓慰勞 君臣之交禮意俱
到天不憖遺奄忽訃報梁木頽傾 九重震悼卹典
頻蕃易名錫號恩榮始終公其允蹈公之立朝百辟

儀刑公之去世係國重軫祖實無似夙荷誨愛拂拭
提携撓謙下逮治命諄諄耳言猶在匍匐臨喪曷勝
悲慨靈輶載道南歸故鄉虞歌薤露丹旆生光聊抒
衷臆敬潔椒漿陳詞奠獻公神洋洋尚嚮

又祭少保大學士未齋顧公文 代人作

嗚呼吾兄何所之耶其遂長往而不返耶其痛哭悲
號于前吾兄其忍聞耶其之先君大叅公與吾兄舅
甥也其之於吾兄中表兄弟也雖中表兄弟吾兄之
視其猶同胞也其自少即受吾兄訓愛提携之恩以
遂獲齒於士其銘諸肺腑也其自壬辰之春謁選至

京吾兄於時進秩宮詹見某之至喜動顏色遣館授
粲朝夕過從蓋吾兄自時五六年間雖屢陟宮保大
宗伯之職然優游清華不任政事故某得以追陪讌
侍靡間朝夕也戊戌之秋吾兄入踐台鼎每戴星出
入某自是不復得數侍然或憂樂形於色輒以語某
不以某為無所知識也某又困不獲階一命吾兄倦
倦焉欲援而翼之而竟不果遂是則某之命偃蹇也
感吾兄之思則銘諸肺腑不忘也今歲仲夏吾兄遊
疾在告三閱月不瘳特呼某至榻前語之曰吾受國
厚恩無所報稱今殆將不可起矣惟吾家事在念先

人之田廬諸子未有分授吾以累子子為我識之言
縷縷猶在耳也既而疾少間猶日望其平復也不意
一旦奄忽脩然長往某之所以痛哭悲號者其又安
能自己也嗚呼吾兄遭際 聖明位登三事朝贊
皇猷澤及萬物他日銘太常昭信史有不待某言者
其福履之隆子孫之盛在吾兄亦可以瞑目然某之
心望吾兄壽登期願也今遽止此也耶某感吾兄
厚恩有非痛哭悲號之所能盡者敢酌酒陳詞以達
衷曲吾兄有靈庶幾聞而鑒之嗚呼慟哉尚嚮

祭三江毛太傅文

嗚呼我公其無意於吾君與斯世耶胡為乎奄忽而永捐公之生也誠不負其所學明道誼而弗遷故其聲名動乎華夏而善類賴以自堅公之卒也乃順受其正命啓手足而歸全故其訃音震乎朝野而士林莫不哀憐嗚呼我公秉德弗二守正匪偏操清介之一節不隨世而強姪是猶瑤琨之無瑕類而冰雪之皎皎乎其婢媵公之德行如此其靡愆也射策甲科衆莫能先揮毫玉署華藻敷宣紉之則膾炙於一世大之則金石乎萬年是猶慈蓄崇積之富有乎萬寶涵泓演迤之派注乎百川公之文章如此其宏淵也

擢任少宰持衡握銓典司邦禮聿恭且虔觀其立朝之抗言足以懼服乎奸惡大禮之正議耿耿乎可與古昔而並傳是猶龍泉太阿物無不斷而梗楠杞梓重皆克肩公之事業如此其可鐫也嗚呼我公方踰耆艾適罹疾瘧塵中使之臨問感聖意之諄專及其引休乞骸章凡四五上而始獲旋邱賜綢疊勞慰勤憺其若臣之間可謂兩盡而出處之際於茲得焉詎知膏肓之終戕乎二豎精魄之遽返乎重泉是固䟽傳之知幾足師於世而希文之不相實係於天某等辱同郡邑聞訃隕顛悼與刑之長逝惜壽考之弗延

嗚呼我公夫豈特一鄉之士而實乃天下之賢某等
蓋嗟吾君與斯世之未究其用匪直私慟夫吾道之
迤邐肆寄莫柁蒿卑薄攄意柁蕪篇

告奠先妣封太孺人吳氏文

嗚呼悠悠蒼天何終極耶哀哀吾母深恩實同先君
早世吾母秉共姜之操母則有吾姊與不肖哀號矢
死撫育遺孤劬勞萬端依倚外氏垂十餘年而同祖
已成童知學蚤暮飭勵勉以進取吾外大父遜菴公
始析居異爨吾母持室艱辛萬端力紡課耕以給供
儲不使不肖知生事以奪行業又數年而同祖舉進

士陟禁林繫官

天朝星紀屢更白雲相望音容遼

邈吾母遺書未嘗不以守職勵躬爲誨丁亥之歲迎
養京邸冀竊升斗以共朝夕以願桑榆庶幾報深恩
之萬一同祖奉職無狀不能夸毗以趨時遂見擯逐
吾母時已寢疾亦不復知嗚呼痛哉吾母之賢無忝
乎孟陶之懿而同祖學不足以聞道仕不足以顯親
實慚軻佩負吾母多矣嗚呼悠悠蒼天降割于厥家
使吾母志不安柁暮年月不瞑柁地下幽明之間抱
恨無窮嗚呼痛哉塗殯正寢二載于茲謹卜以仲冬
庚申合葬先君之兆明辰啓遷爰就窀穸哀痛摧裂

未訣終天尚嚮

五龍山人集卷之十終

附錄

明故國子司業兼司經局校書王繩武墓誌銘

嘉靖壬寅王子繩武以國子司業上疏言時事忤旨落職歸崑山時已被疾居數年竟疾不起辛亥正月八日也先是甲申乙酉之際

朝廷議追崇

獻廟典禮時宰倡議持之甚堅群臣稍出異論輒以事去之一時死徙斥逐以百數繩武時爲翰林編脩亦在遣中久之時宰死始用薦起爲春坊校書

編脩如故尋進今官及是去僅僅逾年耳嗚呼繩武官翰林以文字爲職初無言語議論之責入仕三十年再奮再躋先後立朝才五閱歲偃蹇顛頓卒以譴死此其人豈握齟選粟苟且自恕者哉君子蓋有以識之矣繩武姓王氏諱同祖繩武其字世爲蘇之崑山人傳自宋王旦族子玄居崑山繩武蓋其裔也高祖遜曾祖復先後舉進士仕洪武宣德間皆監察御史皆以直道斥死祖曰敏石門縣儒學訓導父銀少婚於吳爲故叅政吳公惟謙

贅壻生繩武三歲而亡繩武起孤童敏慧夙成稍長盡孝俄得末疾不良於行日坐帳中閱司馬通鑑病愈則已貫綜諸編於是刺經綴文習舉子業卓有端緒然倜儻踔絕不能委瑣事閑幅几世所謂括帖關鍵悉置不省惟博綜群籍發藻麗燁然成章執友方御史時鳴悅其韶秀挑試所業驚喜即字以女及隸邑學益精進弗懈正德己卯舉於鄉庚辰舉於禮部會

武皇南巡不獲

廷對辛巳

今上入正大統遂登首科進士年才弱冠選入翰林
為庶吉士績學中秘益事宏博諸經子史之外陰
陽律曆山經地志以及稗官小說靡不披閱壬午
授翰林編脩時庶吉士三十人留翰林者才六人
皆精選也繩武在六人中尤雄雋明發為文必先
秦兩漢為法法其意不襲其辭見諸論撰融暢爾
雅居然合作一時文名大噪然其意直欲見之行
事故在官多所建明嘗上䟽請教世胄等四事又

請以薛瑄從祀孔子廟庭以隆正學開教化之原
庚子

九廟災上言春秋哭災漢氏變服今詣

陵題主宜比日中反虞之義不得以古禮從事又言
宗廟為石室藏主謂之宗祏公羊高曰主藏廟室
西壁中以備火災漢儀藏主西墻墻中墻即石室
也今建廟宜於北壁鑿石為墻納主其中以應古
禮人服其見北虜入寇建言宜用晁錯以夷攻夷
之計謂虜既得志寇竊無已宜捐金招納諸夷合

舉深入一軍出晉陽一軍出關外前後倚掖搗扼
奪便務期摧殄曾虜退策不果行時

上又幸西苑視朝稀濶復值嬪御構禍邏者得間謀
言虜將復入中外汹懼繩武言古先哲王深居法
宮臨聽天下左右前後執戟傳警處尊秉權以燭
未兆故能祈天永命熙洽無窮今

六飛回翔久淹外苑黠胡窺伺盜變靡常萬一竊發
爲禍不細伏望

還居大內深拱儲精改絃易轍與天下更始凡所論
奏皆卓有意見發自忠悃願官守閒漫不得盡施
置及蒞國學稍事振植踵故翼新多所緒正會

禁中頒曆國學諸生紛競失儀祭酒坐免而宰相怒
未已將盡逐諸生繩武代署爲核治數人法司希
肯連逮置對將空國學繩武馳詣宰相翟公以大
體力爭得釋故諸生尤德之盖方有所爲而身已
去國矣嗚呼惜哉繩武長身玉立眉目踈秀舉止
詳雅論事英發矢口肆談直達其義然不藏怒蓄
怨故人亦不以爲忤所居在馬鞍山之前有水竹

之勝日遊其中因號前峯道人晚歲居閒益與故人親戚文酒譙談一切世事不復關聞惟好學不倦雖已病廢而卷帙不去手所著有五龍山人集重脩崑山志天元六符圖經東吳水利書東吳事宜載筆錄王氏世譜總若干卷繩武生弘治十年丁巳九月十七日享年五十有五繩武在翰林初考稱職進階文林郎贈父銀如其官封母吳太孺人妻方孺人子男三法國子生娶陸氏治縣學生娶陳氏浩聘戴氏女七人陸暉文元肇徐韋張光

紳朱景昇陳嘉賓其壻也其一未字孫男二人炳衡娶沈氏炳璿聘魏氏孫女四人顧允元周禹叙凌丕其孫壻也其一未字法等以卒之後二年癸丑十二月十有二日塋邑之興仁里銘曰

維王世獻 爰德有聞 亶宋則載 迺燁用殷
維御史公 秉貞用直 事我

高皇

不詭維弼 有子則賢 再世執憲

匪憲則榮

維德之踐 何以踐斯 迺忠則隕

有隕者身

不隕厥聞 顯允司成 維孫孫子

維百斯年 世美則繼 閔閔奕奕 科甲皇皇
豈承則克 亦允有揚 秘書抽史 壁雍司教
綰綸作人 於先有耀 顯允司成 有言有政
正論訐謨 期以身殉 維命不淑 世則我違
鬱鬱世網 悠悠是非 顯允司成 蹇蹇維碩
厄於榮途 無忝先德 興仁之墟 君藏在茲
尚千百禩 鑑我銘詞

前翰林院待詔將仕佐郎兼脩

國史長洲文徵明著

不肖稱孤之又明年值島夷之警板蕩江南有
我祖東山之詩作余與伯兄旣蒙家難畢力二
喪即徂遂兵戈中負先太史公遺書若抱祭器
兄素多病作述哀賦以南征有憶鄉五言風高
吳門夜野曠金陵秋爲流輦騰譽兄工於詩如
此時家爲狐窟滄桑慘然而遺書獨存且得就
諸梓於楚德安郡則吾先太史孫吾兄之次子
也兄又不及見嗟乎太史文章馳聲

肅廟談者評遠出廬陵近接何李派有太史手錄二
編已刊於周府稍有異同全集序則立言家元

美頌述其詳余雖不自矜冠而授簡亦過死
而學詩壯嘗薄遊燕趙齊魯悔不能効子長繼
太史之職窺金馬石渠著作之庭菜色將老賣
碑一世徒守鉛塹盟負名山况遺書未究先君
之志遠淚何忘封介之山乎年也生亦不祥中
歲訪道遂荒穡苑歷十一代之衰是嘆心雄齒
暮惟寄慨於遺文

次男逢年謹跋